

王陽明全集

國學自修讀本



上海新文化書社印行

王文成公全書

卷十八

別錄十 公移（總督兩廣平定思田征剿八寨）

欽奉勅賜通行（嘉靖六年十月初三日）

嘉靖六年七月初七日。節該欽奉勅諭。先該廣西田州地方逆賊岑猛爲亂。已令提督兩廣等官都御史姚鏌等督兵進剿。隨該各官奏稱。岑猛父子悉已擒斬。巢穴蕩平。捷音上聞。已經降勅獎勵。論功行賞。及將該設流官。添設參將等事條陳。又經該部議擬。覆奏施行。去後。續該各官復奏。惡目盧蘇倡亂復叛。王受攻陷思恩。又經切責各官計處不審。行令將失事官員戴罪督兵剿捕。及調江西峯兵湖廣永保二司土兵并力剿殺。務收全功。并勅巡按御史石金紀功外。但節據石金所奏。前項地方。盧蘇王受結爲死黨。互相倚依。禍孽日深。將來不可收拾。又參稱先後撫臣舉措失當。姚鏌等攘夷無策。輕信寡謀。圖田州已不可得。并思恩胥復失之。要得通行查究追奪。朕以事難遙度。姚鏌等前功難泯。後有疏虞。得旨切責之後。能自奮勵。平寇有功。亦未可知。難遽別議。乃下兵部議。奏以各官先後所論事宜。意見不同。且兵連兩廣。調遣事干隣境地方。必得重臣前去總制。督同議處。方得停當。今特命爾提督兩廣及江西湖廣等處地方軍務。星馳前去彼處。即查前項夷情。田州因何復叛。思恩因何失守。督同姚鏌等斟酌事勢。將各夷叛亂未形者可撫則撫。反形已露者當剿則剿。一應主客官軍。從宜調遣。主副將官及三司等官。悉聽節制。治以軍法。明示威信。務要計處合宜。仍令御史石金隨軍紀驗功次。從實開報。以憑陞賞。賊平之後。公同計處。應設土官流官。何者經久利便。并先令撫鎮等官有功有過。分別大小輕重。明白奏聞。

區處。凡用兵進止機宜。及一應合行之事。勅內該載未盡者。悉聽便宜從長處置。事體十分重大者。具奏定奪。朕以爾勳績久著。才望素隆。特茲簡任。爾務以體國爲心。聞命就道。竭忠盡力。大展謀猷。俾夷患殄除。地方安靜。以紓朕西南之憂。仍須深慮却顧。事出萬全。一勞永逸。以爲廣人久遠之休。毋得循例辭避。以孤衆望。爾欽哉。故諭。欽此。欽遵。照得常辟猥以非才。濫膺重寄。多病之餘。精力既已減耗。久廢之後。事體又復濶疏。大懼弗堪。有負委託。及照兩廣之與江西湖廣。雖云相去遼遠。而壤地相連。士夫軍民往來絡繹。傳聞既多。議論有素。况在無嫌之地。是非反得其真。且處傍觀之時。區畫宜有其當。合行諮詢。以輔不逮。除委用職官及調遣軍馬。臨時相機另行。外。擬合通行。爲此仰抄捧回司。照依案驗備奉勅諭內事理。即行本司堂印佐貳及各道分巡兵備守備等官。并所屬大小衙門各該官吏。凡有所見。勿憚聞陳。其間或撫或剿。孰爲得宜。設土設流。孰爲便利。與凡積弊宿蠹之宜改於目前。遠慮深謀之可以於久遠者。備寫揭帖。各另呈來。以憑採擇。各該官吏。俱安守法奉公。長廉遠恥。祛患衛民。竭忠報國。毋以各省而分彼此。務在協力以濟艱難。果有忠勇清勤。績行顯著者。旌勸自有常典。當爵不敢蔽賢。其或奸貪畏縮。志行卑污者。黜罰亦有明條。當爵亦不敢同惡。深惟味劣庶賴匡襄。凡我有司。各宜知悉。仍行鎮守撫按等衙門知會。一體欽遵施行。

湖兵進止事宜（十月）

據廣西桂林道右參政龍誥僉事申惠會稟。原調永保二司宣慰官舍士兵共六千餘員名。八月自辰州府起行。九月盡可到省城。各職即日起程前去全州興安等處接應督押。爲照大兵進止。自有機宜。今未奉節鉞撫臨。莫知適從。查得舊規。兵至即發哨徑趨賓州聽遣。如至賓州而未用。恐接境思田二府不無致生疑變。合無將各兵前赴梧州府屯劄。聽候軍門撫臨調度等因。照得本年八月二十四日。先准兵部咨。該本爵看得先任總督巡撫都御史姚已蒙欽准致仕。而本爵又以扶病就醫。聽候辭本命下。未即起程。况湖兵未至。秋暑尙深。遙計賊情。正

在懈弛。機有可乘。事宜從便。已經行仰各該失事帶罪立功守巡參將及各領兵督哨等官。務要相度機宜。若各叛目誠心投撫。中間尙有可憫之情。朝廷豈以必殺爲事。且宜從權撫插。聽候本爵督臨查處。若是陽投陰叛。詐反覆。度其事勢。終難曲全。則宜密切相機乘間行事。務在獲厥渠魁。不得濫加無罪。各官務要協和行事。既無參錯牴牾。有乖其濟之義。亦無貪功輕率。仰戾好生之仁。又經行仰各遵照施行去後。今據前因。看得湖兵既至。勢難中止。非徒無事漫行。有失遠人之信。亦且師老財費。重爲地方之憂。但聞諸道路。傳諸商旅。皆謂叛目投撫之誠。今已甚切。致亂之情。尙有可原。且朝廷以好生爲德。下民無必死之讎。是以本爵尙爾遲疑。欲候督臨。乃決進止。顧傳聞未真。兵難遙度。各官身親其事。必皆的知。况原任總督雖已致政。尙在統領。老成慎重。當無遺策。若果事在不疑。即宜乘機速舉。一勞永逸。以靖地方。如其尙有可生之道。亦且毋爲必殺之謀。匪曰姑息。將圖久安。及照各處流賊素爲民患。非止一巢。若用聲東擊西之術。則湖兵之來。未爲徒行。各官俱密切慎圖。務出萬全。本爵亦已扶病晝夜速進。軍中事宜。從便施行。一面呈稟撫鎮巡按等衙門一體通行知會。俱毋違錯。

牌諭安遠縣舊從征義官葉芳等（十一月）

往年本爵提督南贛汀漳等處軍務。因地方盜賊未平。身親軍旅。四出剿除。爾葉芳等乃能率領兵夫。來隨帳下。奮勇殺賊。効勞爲多。後遭黨藩之變。爾葉芳又能擊辭賊賄。一聞本爵起調。牌到當卽統領曾德第等及部下兵衆。晝夜前來。遠赴國難。一念忠義。誠有可嘉。備歷辛苦。立有戰功。賞未酬勞。予心慷慨。嘗欲表奏爾一官。以勵忠勤。隨因本爵守制還家。未及果行。今茲奉命總制四省軍務。復臨是境。看得舊時從征軍士。多被忘功之徒。百般屈抑。心殊爲之不平。念爾葉芳舊勞未酬。合就先行獎勵。故特差典史張縉將帶花紅羊酒親至爾家。用旌爾功。爾其益謹禮法。以緝下人。益殫忠勤。以報上德。省諭部下之人。務要各安生理。各守家業。人惟不爲善。未有爲善而不獲善報者。人惟不爲惡。未有爲惡而不受惡殃者。聞爾所居之地。近傍各寨新民。雖云向化。其間尙多與爾

爲讎。爾宜高爾聽垣。嚴爾警備。以戒不虞。爾等嘗與杜柏孫洪舜等不和。各宜消釋。講信脩睦。安集地方。吾所以惓惓誨諭爾等者。實念爾等辛苦從我日久。吾視爾等。不啻如父子。雖欲已於言。情有所不容已也。吾今以軍機重務。即赴兩廣。不得久留贛城。爾等但體吾教戒之意。各安室家。不必遠來候見。徒勞無益。其曾德禮等俱各諭以此意。

批南康縣生員張雲霖復學詞

看得張雲霖原係本院檄召起兵從征人數。立有功次。已經核實造報。皆本院所親知。後因忌功之徒。搜求羅織。遂令此生屈抑至此。言之誠爲痛憤。仰分巡嶺北道。即與查審。教官費廷芳等案。有無干涉功賞。銀兩曾否收給。仍行提學道收送復學。則有功之士。不致於抱冤憤。而本生仗義勤王之節。庶亦不負其初心矣。批贛縣生員雷端詞同。

放回各處官軍牌（十二月二十五日）

照得先因田州等處變亂。前任軍門抽撥兩省官軍。及差官取調左右兩江土官目兵。前赴南寧等處駐劄。聽候征剿。今照各夷皆來告要誠心向順。已漸有平復之機。且各處城池邊隘。缺人防守。往往來告盜賊乘間竊發。亦不可不爲之慮。況今春氣萌動。東作方興。各兵屯頓日久。霜眠草宿。勞苦萬端。應合放回。爲此牌仰本官。即將軍門原調各處官軍機兵。打手及各土官目兵。盡數撤散。放回休息。及時農種。防守城池。惟湖廣永保二司土兵。姑留聽候。俟沿途夫馬糧草完備。然後發回。各具由回報。毋得違錯。

檄諭都康等州官男彭一等（十二月二十八日）

看得廣西某州縣官孫族某官男頭目某等。統領土兵。前來南寧賓州地方。屯哨日久。勞苦良多。即今歲暮天寒。各兵遠離鄉土。豈無室家之念。故令特加犒勞。通放歸復業安生。本族官目。務要嚴整行伍。經過地方。毋得侵擾。

人家一草一木。有犯令者。即時照依軍法斬首。到家之後。仰本州縣官仍要愛惜下人。輯和隣境。毋得恃強凌弱。倚衆暴寡。越理踰分。自取罪累。遵守朝廷法制。保爾土地人民。牌仰本州縣官執照遵守。到家之日。俱依准回報。

劄付永順宣慰司官舍彭宗舜冠帶聽調

據湖廣永順等處軍民宣慰使司領征官帶舍把彭明倫田大有等呈稱。統兵土舍彭宗舜。係致仕宣慰彭明輔嫡生次子。伊兒彭宗漢身故。本舍應該襲替。嘉靖五年。宗漢奉征田州。蒙軍門劄付冠帶殺賊。惟本舍見統目兵聽用。又自備家丁三千報効。切恐未授官職。軍威無所瞻肅。呈乞比照故兒彭宗漢事體授職。便益等因。到爵。爲照軍旅之政。非威嚴則不肅。等級之辨。非冠帶無以章。今官舍彭宗舜於常調之外。自備家丁。隨父報効。不避艱險。勤勞王事。固朝廷之所嘉與。况又勘係應襲次男。今以土舍領兵。於體統未肅。合就遵照勅諭。便宜事理。給與冠帶。以便行事。除事寧另行具奏外。爲此劄仰官舍彭宗舜先行冠帶。望闕謝恩。仍須秉節持身。正己律下。中嚴約束。而使兵行所在。無犯秋毫。作興勇敢。而使兵威所加。有如破竹。務竭忠貞。以圖報稱。功成之日。具奏旌賞。國典具存。先具冠帶日期。依准繳報。仍行本省。鎮巡衙門知會。毋得違錯。

批廣西布政二司請建講堂呈

據參政汪必東僉事吳天挺呈請建講堂號舍。以便生員肄業事。看得感發奮勵。見諸生之有志。作興誘掖。實有司之盛心。不有藏修之地。難成講習之功。况境接諸蠻之界。最宜用夏變夷。而時常梗化之餘。尤當敷文來遠。雖亦俎豆之事。實關軍旅之機。准如所議。動支軍餉銀兩。卽爲起蓋。務爲經久之計。毋飾目前之觀。完日開數繳報。

批立社學師耆老名呈（嘉靖七年正月）

據思明府申稱。要令土人譚勤蘇彪加以社學師名號。鄉老黃永堅加以耆老名號。看得教民成俗。莫先於學。然須誠愛惻怛。實有視民如子之心。乃能涵育薰陶。委曲開導。使之感發興起。不然。則是未信而勞其民。反以爲厲。

已矣。據本縣所申。是亦良法。但須行以實心。節用愛民。施爲有漸。不致徒飾一時之名。務垂百年之澤。始可。該道守巡官仍加勞來。匡直。開其不逮。備行該府查照施行。

議處江古諸處獠賊

節據各道哨守官兵呈報。照得廣西府江古田洛容諸處獠賊。日來勢益猖獗。皆由近年以來大征之舉。旣爲虛文。而征剿又復絕響。是以爲彼所窺。肆無忌憚。今思田事體漸就平息。湖兵西歸有日。正可相機行事。爲此牌行左布政嚴紘。密切會同參政龍誥。按察使錢宏。副使李如圭。翁素。將各稔惡賊巢。務訪的確。密拘知因鄉道。備詢我兵所由道路險夷遠近。及各賊巢所在。議謀旣定。卽可迎約湖兵。決機行事。要在聲東擊西。後發先至。但誅其罪大惡極者一處兩處。其餘且可悉行寬撫。容令改惡從善。務在去暴除殘。懲一戒百。不必廣捕多殺。致令玉石無分。驚疑遠邇。後難行事。若其事勢連絡廣遠。關係重大。亦且不宜輕動。本院尙駐南寧。彼中事機。勢難遙度。諒各官平日素有深謀沉勇。秉義奮功。一切機宜。自能周悉。近報剷平之獲。已見用心之勤。尙須後効。一并奏請。凡有申稟。密切封來。

批嶺西道立營防守呈（二月）

據僉事李香呈稱。顧募打手。立營防守緣由。看得所議。旣得其要略。但屯兵固不可分。而合兵又不宜頓。必須該道及統兵官時將屯聚之兵。督率於賊盜出沒要害。往來巡視操演。因而或修復營堡。或開通道路。或戒飭反側。獠寨。或撫安凋弊民村。巡行慣熟。遠近不疑。擇其長惡不悛者。間行鷗剿。懲一戒百。如農夫之植耒。必逐漸而耕。如園丁之去草。必以次而芟除。庶屯聚之民。無坐食之患。而有日新之功矣。仰備行各官查照施行。

稿送湖兵

照得先該軍行奏調湖廣永順保靖二宣慰司土官目兵前來征剿田州等處。今照各夷自縛歸降。地方平靖。爲

照宣慰彭明輔彭九霄雖未及衝冒矢石。摧堅破敵。然跋涉道途。間關山海。不但勞苦之備嘗。且其勤事之忠。赴義之勇。不戰而勝。全師以歸。隱然之功。亦不可掩。所據宴勞之理。相應照舊舉行。其沿途該用廩給口糧等項。亦合計算總支。庶免阻滯。及省偏州下邑之擾。爲此牌仰本官行會左參政龍誥。僉吳天挺。參議汪必東。督行南寧府。於賞功綵段金銀花枝錢兩內。照依開數支出。齎送各宣慰。并給賞各舍目收領。以慰其勞。仍將永保二司官舍頭目人等合用分給口糧等項。查取見在確數各有若干。亦行南寧府查自本府起至梧州府止。計算幾縣。每驛扣算該銀若干。就於軍餉銀內支給。又自梧州起至桂林府止。查算縣驛若干。亦就行該府支銀應付。又自桂林府起。照前計算至全州止銀兩。亦行該府查給。其各州縣止是應付人夫。再不許別項科派於民。仍通行南寧潯州梧州平樂桂林全州各查照單內預行整辦犒勞下程。聽候各官舍目到彼分送犒勞給賞施行。

批嶺西道撫處盜賊呈

看得各處盜賊。全在撫處得宜。綏柔有道。使之畏威懷德。歲改月化。自然不敢爲惡。乃爲善策。雖鷓鴣之舉。亦不得已而後一行。至於待其猖獗肆恣。然後懸金以購首級之獲。掩襲以求斬捕之多。抑亦未矣。今後該道官務思撫處綏柔之長策。如駕舟之舵。御馬之轡。操持有要。而運動由己。若舍舵與轡。而廣求駕御之術。雖極工巧習熟。終亦不免傾跌之虞。一應賞罰。量功大小。以爲多寡。軍門原有舊規。軍職累功陞級。亦有見行事例。臨陣退縮。仰遵勅諭事理。當時以軍法從事。俱仰查照施行。繳。

禁革輕委職官

據廣東布政司呈參廣州左等四衛掌印指揮王冕海信杜隆馮凝千戶陸宗等百戶劉愷等不脩職業。委棄城地。遠中經旬。肆無忌憚。應合參問。參看擅離職役。律有明條。今各處軍衛有司官。往往輒因私事。棄職遠出。或因上司經由。過爲趨諂。越境送迎。往回動經旬月。上下相安。恬不爲異。仰布政司通行禁革究治。今後不係緊急軍

機重務。其餘問候申請等項。雖亦公事。勢有輕緩者。止役吏胥差使。不許輕委職官。非但糜給夫馬。騷擾道途。勞費不少。抑且城池庫獄一有虧失。貽累匪輕。各該衙門首領官。今後俱要置立文簿。凡遇掌印佐貳及胥俸等官。公事出入。俱要開記月日。因某事。到某處。送迎或承何衙門到某處。差委某年月日回任。歲終繳報本院。以憑查究。大抵天下之不治。皆由有司之失職。而有司之失職。獨非小官。下吏偷惰苟安。僥倖度日。亦由上司之人。不遵國憲。不恤民事。不以地方爲念。不以職業經心。既無身率之教。又無警戒之行。是以蕩弛日甚。亦宜分受其責可矣。仰布政司備行各該守巡各兵備守備及府州衛縣所等大小衙門。仰各查照施行。該衛掌印官等姑記未究。其陸宗劉愷。遵照本院欽奉勅諭事。先行提究。以警其將來。此繳。

分派思田土目辦納兵糧（四月）

照得思恩田州二府。各設流官知府。治以土俗。其二府原舊甲分城頭。除割田州八甲分立土官知府。以存岑氏之後。其餘悉照舊規。不必開闢立里。但與酌量分析。各立土目之素爲衆所信望者。以爲土官。巡檢屬之。流官知府聽其各以土俗自治。照舊辦納兵糧。效有勤勞。遞加陞授。其襲授調發。必皆經由於知府。其官職土地。皆得各傳其子孫。除其題外。爲照市甲城頭既已分析。若不先令各自暫行分管。誠恐事無統紀。別生弊端。爲此牌仰田州府土目龍寄等。遵照後開甲分。每歲應該納辦官糧。查照開數。依期完納。出辦一應供役征調等項事情。悉聽知府調度約束。本目仍要守法奉公。正己律下。愛養小民。保安境土。毋得放縱恣肆。諭分干紀。自取罪累。後悔無及。候奏請命下。仰各欽遵施行。

計開 凌時甲 每年納夏稅秋糧米八十八石八斗七升七合 每調出兵三百八十四名 每年表箋用銀三錢二分 須知一本赴廣西用銀一錢一分 須知二本赴京用銀八錢八分 每年納官豬等例銀一十三兩 每年納官禾四十担重一百斤 每年供皂隸禾七擔

完冠特陶甲

案行廣西揭陽道興舉思田學校

照明田州新服用夏變夷宜有學校。但瘡痍逃竄之餘。尙無受慶之民。即欲建學。亦爲徒勞。然風化之原。終不可緩云云。除具題外。擬合就行。爲此仰抄案回道。着落當該官吏。備行所屬儒學遵照。但有生員。無拘廩增。願改田州府學。及各處儒生。願附籍入學者。各赴告本道。徑自查發。選委教官一員。暫領學事。相與講肄游息。或興起孝弟。或倡行鄉約。隨事開引。漸爲之兆。俟休養生息一二年後。該府建有學校。然後將各生徒通發該學肄業。照例充補增廩。以次起貢。俱無違錯。

揭陽縣主簿季本鄉約呈（四月）

據揭陽縣主簿季本呈爲鄉約事。足見愛人之誠心。親民之實學。不卑小官。克勤細務。使爲有司者皆能以是實心脩舉。下民焉有不被其澤。風俗焉有不歸於厚者乎。但本官見留軍門應川。該縣若無委官相繼督理。未免一暴十寒。況本院近行十家牌諭。雖經各府縣編報。然訪詢其實。類是虛文搪塞。且編寫人丁。惟在查考善惡。乃聞加以義勇之名。未免生事擾衆。已失本院息盜安民之意。訪得潮州府通判張繼芳。持身端確。行事詳審。仰該府掌印官將發去牌式。再行曉諭所屬。就委張繼芳。遍歷屬縣。督令各該縣官。勤加操演。務要不失本院立法初意。仍先牌諭所開事理。再四紬繹。必須明白透徹。眞如出自己心。庶幾運用皆有脈絡。而施爲得其調理。該縣鄉約。仰委縣丞曹森管理。毋令廢墮。

賑給思田二府（四月）

照得近因思田二府攘亂。該前總鎮等官奏調三省漢土官軍兵快人等前來南寧府屯住防守。軍民大小。男不得耕。女不得織。而湖兵安斂之家。騷擾尤甚。今雖地方平靖。湖兵已回。然瘡痍未起。困苦未蘇。況自三月已來。天

道亢旱。種未入土。民多缺食。誠可憫念。已經行仰同知史立誠。遍查停歇湖兵之家。開報相應。量行賑給。爲此牌仰南寧府。着落當該官吏。專委同知史立誠。即將十名以上七十一家。各給米二石。鹽魚二十觔。五名以上三百五十六家。各給米一石三斗。鹽魚十三觔。五名以下四百五十四家。各給米一石。鹽魚十觔。就於該府軍餉米魚內支給開報。其餘大小軍民之家。諭以本院心雖無窮。而錢糧有限。各宜安心生理。勤儉立家。毋縱驕奢。毋習游惰。比之豐亨豫大之日。雖不足。而方之兵戈擾攘之時。則有餘矣。

牌行靈山縣延師設教（六月）

看得理學不明。人心陷溺。以上習日偷。風教不振。近該本院久駐南寧。該府及附近各學師生。前來朝夕聽講。已覺漸有奮發之志。但窮鄉僻邑。本院既未暇身至其地。則諸生亦何由耳聞其說。合行委官遠行訓告。看得原任監察御史今降合浦縣丞陳迥。理學素明。志存及物。見在軍門。相應差委。除行本官外。爲此牌仰靈山縣當該官吏。即便具禮敦請本官。於該縣學安歇。率領師生。朝夕考德問業。務去舊染卑污之習。以求聖賢身心之功。該縣諸生。應該赴試者。臨期起送。不該赴試者。如常朝夕聽講。或時出與經書策論題目。量作課程。不得玩易怠忽。虛應故事。須加時敏之功。庶有日新之益。該縣仍要日逐供給薪米之類。候該縣掌印官應朝之日。本官不妨訓迪諸生。就行兼署該縣印信。

牌行委官陳迥設教靈山

看得理學不明云云。除行廉州府及所屬縣外。牌仰本官即便前去該府及所屬縣。行各掌印官。召集各該縣師生。遍行開導訓告。務行立志敦本。求爲身心之學。一洗舊習之陋度。量道里折中處所。於靈山縣儒學住歇。令各縣師生。可以就近聽講。其諸生該赴試者。臨期起送。不該赴試者。如常朝夕聚會。考德問業。毋令一暴十寒。虛應文具。亦或時出經書策論題目。量作課程。就與講析文義。以無妨其舉業之功。大抵學絕道喪之餘。人皆駭於創

開。必須包蒙俯就。涵育薰陶。庶可望其改化。諒本官平日素能孜孜汲引。則此行必能循循善誘。該縣掌印官應朝之日。本官不妨訓迪諸生。就行兼署該縣印信。待後縣官應朝回日。方許交還。

牌行南寧府延師設教

看得理學不明。人心陷溺。是以士習益偷。風教不振。近該本院久住南寧。與該府縣學師生。朝夕開道訓告。頗覺漸有興起向上之志。本院又以八寨進兵。前往貴州等處調度。則興起諸生。未免又有一暴十寒之患。看得原任監察御史。今降揭揚縣主簿李本。久抱溫故知新之學。素有成己成物之心。即今見在軍門。相應委以師資之任。除行本官外。仰南寧府掌印官。即便具禮率領府縣學師生。敦請本官前去新創敷文書院。闡明正學。講析義理。各該師生。務要專心致志。考德問業。毋得玩易怠忽。徒應虛文。其應該赴省考試者。扣算程期。臨時起送。不該赴試者。仍要如常朝夕質疑問難。或時出與經書題目。量作課程。務加時敏之功。以求日新之益。該府縣仍要量送柴米供給。

牌行委官季本設教南寧

看得理學不明。人心云云。除行該府掌印官率屬敦請外。仰本官就於新創敷文書院內安歇。每日拘集該府縣學諸生。爲之勤勤開誨。務在興起聖賢之學。一洗習染之陋。其諸生該赴考試者。臨期起送。不該赴試者。如常朝夕聚會。考德問業之外。或時出與經書論策題目。量作課程。就與講析文義。以無妨其舉業之功。大抵學絕道喪之餘。未易解脫。舊聞舊見。必須包蒙俯就。涵育薰陶。庶可望其漸次改化。諒本官平素最能孜孜汲引。則今日必能循循善誘。諸生之中。有不率教者。時行檟楚。以警其惰。本院回軍之日。將該府縣官員師生查訪勤惰。以示勸懲。

批嶺東道類編民壯呈（六月）

據嶺東道巡守官呈。議將各額編民壯存留。照舊守城。并追工食雇募打手調用。看得本院自行十家牌式。若使有司果能着實舉行。則處處皆兵。家家皆兵。人人皆兵。防守之備既密。則追捕之兵。自可以漸減。省以節民財。以寬民力。但今有司類皆視為虛文。未曾實心脩舉。一日添將額設民壯三分減一。則意外不測之虞。果亦有如各官所呈者。今日姑從所議。將各民壯照舊存留。備行該道所屬查照施行。仍仰各官務要用心舉行。十家牌式。不得苟且因循。惟事支吾目前。徒倚繁難自弊之術。以為上策。反視易簡久安之法。以為迂緩。噫。果有愛民之誠心。處官事如家事者。其忍言者之諄諄。而聽之。乃爾其藐藐耶。凡我各官。戒之敬之。此繳。

裁革文移

據布政司呈。今後但有牌案行屬者。則於備仰語後。止令奉行官吏具遵行過緣由回報。看得近來官府文移日煩。如造冊依准等項。果係徒勞徒費。虛文無補。本院欲革此弊久矣。因軍務紛劇。未及舉行。據呈前因。可謂先得我心之同然者。自今事關本院。除例該奏報及倉庫錢糧金帛賊罰紙價預備稻穀等項。仍於每歲終開項共造手冊一本送院查考外。其餘一應不大緊要文冊。及依准等項。通行裁革。務從簡實。以省勞費。凡我有官。皆要誠心實意。一洗從前廢文粉飾之弊。各竭為德為民之心。共圖正大光明之治。通備行各該衙門查照施行。繳。

批右江道關和寨目呈

據副使翁素呈。湖潤寨目兵徑赴鎮安取調。准議備出印信下帖。給與該府該司各永永執照。以杜後爭。湖潤既已自知原屬鎮安。自此必益供事大之職。鎮安既欲自求仍統湖潤。自此必益施字小之仁。須要誠心協和。庶可永絕禍患。若徒迫脇矯誣於一時。終必反覆變亂於日後。此乃自取滅亡。後悔何及。仰各知悉。遵照毋違。此繳。

批南寧府吳揚先哲申

據南寧府申稱。北門外高嶺原有廟宇。以祠宋樞密使狄武襄公青經略使余公靖樞密直學士孫公沔邕州太

守忠壯蘇公緘推官忠愍譚公必緣年久傾頽山存基址今思田既平所宜脩復以繫屬人心以警示諸夷看得表揚先哲以激勵有位此正風教之首况舊基猶存相應修復准支在庫無礙官銀重建祠宇其牌位祭物等項照舊修舉完日具由回報此繳

批增城縣改立忠孝祠申

據增城縣申稱參得廣東參議王綱字性常洪武年間因靖潮寇父子貞忠大孝合應崇祀於城南門外天妃廟改立忠孝祠看得表揚忠孝樹之風聲以興起民俗此最爲政之先務而該縣知縣朱道瀾乃能因該學師生之請振舉廢墜若此則其平日職業之修志向之正從可知矣仰行該縣悉如所議施行其神像牌位及祭物等項俱聽從宜酌處完日具由回報此繳

批參政張懷奏留朝覲呈

據左參政張懷所呈憫念兵荒欲留府縣正官足見留心地方但今歲應朝事體頗重朝廷勵精圖治必有維新之政各該正官正官一行以快觀感似難通行奏留仰各照例依期起程况該道守巡既得賢能官員各肯憂勞盡心若此各府州縣雖一正官其各佐貳亦必警戒修省自堪驅策其間果有闕冗不才不任委寄者該道卽行別委相應官員署管仰卽通行查照施行毋再疑滯繳

經理書院事宜（八月）

據僉事吳天挺呈稱將南寧城東西二壕花利通收府庫支與書院師生應用剩銀修理仍置教官私宅號房以爲定規石得所呈事宜足見該道官留心學校興起上習之美意俱准照議施行但事無成規難垂久遠而管理非人終歸廢墜該道仍須置立文簿將區處過事宜逐件開載給付該府縣學及管理書院官各收一本存照相繼查考舉行以防日後埋沒侵漁之弊仍於各教官內推舉學行端方堪爲師範者呈來定委專管書院諸務訓

勵諸生。庶幾法立事行。人存政舉。而今日書院之設爲不虛矣。仍行提督學校官知會。一體查督舉行。及備行該府縣學官吏師生查照施行。俱毋違錯。此繳。

牌行南寧府延師講禮（月八）

照得安上治民。莫善於禮。冠婚喪祭諸儀。固宜家諭而戶曉者。今皆廢而不講。欲求風俗之美。其可得乎。况茲邊方遠郡。土夷錯雜。頑梗成風。有司徒事刑驅勢迫。是謂以火濟火。何益於治。若教之以禮。庶幾所謂小人學道則易使矣。近據福建莆田儒學生員陳大章前來南寧遊學。進見之時。每言及禮。而因扣以冠婚鄉射諸儀。果亦頗能通曉。看得近來各學諸生。類多束書高閣。飽食嬉遊。散漫度日。豈若使與此生朝夕講習於儀文節度之間。亦足以收其放心。固其肌膚之會。筋骸之束。不猶愈於博奕之爲賢乎。爲此牌仰南寧府官吏。即便館穀陳生於學舍。於各學諸生之中。選取有志習禮。及年少質美者。相與講解演習。自此諸生得於觀感興起。砥礪切磋。修之於其家。而被於里巷。達於鄉村。則邊徼之地。自此遂化爲鄒魯之鄉。亦不難矣。諸生講習。已有成效。該府仍要從厚措置禮幣。以申酬謝。仍備由差人送至廣西提督學校官。以次送發各府州縣。一體演習。其於風教要亦不爲無補。

劄付同知林寬經理田寧

照得思田二府平復。議將田寧府改設流官。見今無官管理。看得化州知州林寬。才識通敏。幹辦勤勵。本府巡撫江西。知其可用。近因改建府治。修復城垣。已經委令經理。即若陞以該府同知。而使久於其職。必有可觀。已經具題。奉有明旨。續該本院看得南寧。自宣化縣至於田寧。逆流十日之程。其間錯以土夷村寨。奸弊百出。本府近因躬撫南寧。思龍諸圖。鄉民擁道控告。願立縣治。因爲經理相度。得村名那久者。寬平源厚。江水縈迴。居民千餘家。竹樹森鬱。且向武各州道路。皆經由其傍。亦爲四通之地。堪以設立縣治。屬之田寧。亦足以鎮據要害。消沮盜賊。

又經具題外。爲照新陞知府張鉞尚未到任。合就劄仰本官。即便管理府事。撫綏目民。其修築城垣。廡宇。及那久新立縣治等項事宜。公同各該委官。用心督理。務在修築堅固。工程早完。以圖經久。候知府張鉞到任。仰本官專督思龍縣治。務要清查所割圖里錢糧明白。毋令奸民飛詭影射。致貽紛爭。本官素有才識。志在建功立業。况奉新命。耀佐專城。遠近士目人等。側耳注目。思有維新之政。本官務要竭心殫力。展布才猷。以仰答朝廷之恩。俯慰下民之望。中無負於軍門之委託。如其因循玩愒。墮事廢功。不但聲名毀辱。抑且罪責難逃。

劄付同知桂鑿經理思恩

照得思田二府半復。已經具題將柳州府同知桂鑿經理思恩府事。休勞息困。當有所濟。續該本爵看得岑濬新移府治。皆暫山絕壁。如處戈矛劍戟之中。况瘴霧昏塞。薄午始開。本爵近因督勦八寨。親往相度。看得地名荒田。寬衍膏腴。可以建府治。而上林縣地名三里者。乃在八寨之間。其地多良田茂林。村落相望。堪以移設鳳化縣治。量築城垣。廡宇。招撫逃亡。可以成一方之保障。尚將上林一縣。通割以屬思恩。似於事勢爲便等因。又經具題外。爲照署掌府印。遷築府城。新創縣治。及蓋廡宇等項。皆不可缺人督理。合就劄仰本官。即便星馳前去。思恩府署掌印信。撫綏目民。其遷築府城於荒山。移設縣治於三里。及創建廡宇等項。一應事宜。公同各該委官。用心督理。云云。如其因循玩愒。墮事廢功。豈徒身名毀辱。兼亦罪責難逃。

牌行南昌府保昌縣禮送故官

照得保昌縣縣丞杜洞。久在軍門。管理軍賞。清介自持。賢勞茂著。郡屬之中。實爲翹然。今不幸病故。使人檢其行囊。蕭然無以爲歸殯之資。殊可傷悼。今尋常故官小吏。無洞一日之勞者。猶且有水手殯殮之例。况洞從征惡寇。跋涉險阻。衝冒瘴毒。又且平日才而且賢。所謂以死勤事者矣。焉可以不從厚待之。是賢不肖略無所辨也。爲此牌仰本府官吏。即於庫貯無礙官錢內。給與水夫二名。棺殮銀十兩。就行照例起關。應付船隻脚力。查照家屬名

數給與口糧。務要從厚資送還鄉開報。及仰保昌縣官吏。即便僉撥長行水手二名。棺殮銀二十兩。及將本官應得俸糧馬夫銀兩照數支給交付伊男。及差的當人役護送還鄉。毋致稽悞。

調發土兵（十月）

照得各州土兵。征調頻數。本非良法。非但耗費竭財。抑且頓兵倒銳。必須各州輪年調發。一以省供饋之費。一以節各兵之勞。庶幾土人稍有休息之期。而官府亦獲精銳之用。已經行仰該司遵照備行。南丹州官族莫振亨。即就揀選勇敢精銳。目兵三千名。躬親統領。照依尅定日期。前赴廣西省城。聽調殺賊。果能輸忠報効。立有奇功。即與具奏。准襲該州官職。自今八月初一日爲始。至下年八月初一日止。却調東蘭州土兵。依期更替。自今各州目兵。軍門斷不輕易調發。致令奔波勞苦。亦決不姑息隱忍。縱令驕惰玩弛。但有稽抗遲悞。違犯節制。輕則量行罰治。重則擊革去冠帶。又重則貶級削地。又重則舉兵誅討。斷不虛言。通行各土官兵。目知悉。俱仰改心易慮。毋蹈前非。自貽後悔。去後。今據所呈。爲照本院軍令。既出。難再輕改。失信下人。但本官呈稱。勦缺兵。固亦一時權宜。况稱原係本州先年自願報効。不在秋調之數。亦合姑從所請。暫准取調。爲此牌仰本官。即便會同鎮守太監。傅倫行。仰該州土官韋虎林。照數精選目兵。前赴岩城。聽各官調遣勦賊。待三兩月間事畢。隨即撤放回州。遵照軍門批行事理。依期更班聽調。不許久留失信。其所呈。聽勦事宜。悉聽會同三司掌印守巡兵備等官。依擬施行。事完之日。通將獲過功次。用過錢糧數目。開報查考。俱毋違錯。仍行總鎮總兵鎮巡等巡門知會。

犒獎儒士岑伯高

照得思田之亂。上厯九重。命將出師。動調四省軍馬錢糧。洵洵兩年。功未告成。而變日不測。本院前來勘處。是固仰賴皇上好生之仁。格於天地。至誠動物。不疾而速。是以宣布威德。而旬月之間。諸夷即爾革心向化。翕然來歸。然而奔走服役。固有効勞於下者。其間乃有深謀秘計之士。潛開默導。以會合事機。其功隱而難見。此惟主將知

之功成行賞。是所謂首功者也。照得儒士岑伯高素行端介。立心忠直。積學待時。安貧養母。一毫無所苟取。而人皆服其廉。一言不肯輕發。而人皆服其信。遊學橫州南寧之間。遠近士夫。及各處士官士夷。莫不聞風向慕。仰其高節。本院撫臨之初。卽用此生。使之深入諸夷。仰布朝廷之德。下宣本院之誠。是以諸夷孚信之速。至於如此。本生實與有方焉。當時平復奏。卽欲具列本生之功。而事變方息。深謀秘計。未欲張布於諸夷。但本生志在科第。發身不肯異途。苟進。堅辭力請。本院不欲重違雅志。遂爾未及奏列。今思田旣已大定。凡有微勞於茲役者。莫不開列。而本生之功。泯然未表。其於報功勵忠之典。誠有未當。仰抄案回司。卽於軍餉銀內動支一百兩。及置買彩幣羊酒。禮送本生。以見本院慰賞犒勞之意。仍仰遵本院欽奉勅諭便宜事理。給於軍功冠帶。以勞其身。該司仍備給劄付執照。并行原籍官司以禮優待。免其雜泛差徭。明朝廷賞功之典。彰軍門激勵之道。旣以遂其養母之願。且以遂其高尚之心。是後本生志求科第。其冠帶自不相妨。仍行兩廣總鎮總兵鎮巡等衙門知會。

征勦八寨斷藤峽牌（七年三月以下俱征八寨）

據留撫田州思恩等處地方右布政使林富原任副總兵部指揮同知張祐連名呈稱。田州思恩平復。居民悉已各安生理。土夷亦皆各事農耕。地方實已萬幸。惟八寨獠賊云云。合就仰遵勅諭事理。量撥官兵。協同盧蘇王受等土兵。分路進勦。除差官舍費。捧令旗令牌。分投督押土兵。本院親至賓州思恩等處。相機調度。而授方略外。爲此牌仰右布政使林富副總兵張佑。卽使督領官軍。督發土目盧蘇王受等兵。從公堯思恩取路進勦。後聞寨分。務要聲言各賊累年殺害良民。攻劫州縣鄉村之罪。殲厥渠魁。及其黨與。罪惡顯著者。明正天討。以絕禍根。除臨陣擒斬外。其餘脅從老弱。一切皆可宥免。今茲之舉。惟以定亂安民爲事。不以黷武多獲爲功。各官務要仰體朝廷憂憫困窮之心。俯念地方久遭盜賊屠戮之苦。督各官兵目兵人等。務殲真正惡目。一洗民冤。永除民患。以靖地方。仍禁兵馬所過鄉村。毋得侵擾民間一草一木。有犯令者。卽遵本院欽奉勅諭事理。當卽處以軍法。俱

毋有違節制方略。自取罪戾。

牌行領兵官

牌行左參將署都指揮僉事張經會同該道守巡守備官及湖廣督兵僉事汪濬都指揮謝珮督永順宣慰彭明輔統兵進勦牛腸諸賊云云。及監都保靖宣慰彭九霄統兵進勦六寺磨刀等寨諸賊云云。未至信地三日之前。停軍中途。候約參將張經與同守巡各官集議。先將進兵道路之險易遠近。各集賊徒之多寡強弱。及所過良民村分之經由往復。而同各鄉道人等逐一備細講究明白。務要彼此習熟通曉。若出一人。然後尅定日時。偃旗息鼓。寂若無人。密至信。乘其速發。務使迅雷不及掩耳。將各稔惡賊魁。盡數擒勦。以除民害。以靖地方。除臨陣斬獲外。其餘脇從老弱。一切皆可宥免。今茲之舉。惟以定亂安民爲事。不以多獲首級爲功。各官務要仰體朝廷憂憫困窮之心。俯念地方久罹荼毒之苦。仍要禁約軍民人等。所爲良民村分。毋得侵擾一草一木。有犯令者。當以軍法斬首示衆。本官既有地方責任。兼復素懷忠義。當茲委用。務竭心力。大展才猷。以祛患安民。一應機宜牌內該載不盡者。聽公同各官計議。從便施行。一面呈報事完之日。通將獲過功次。開報紀功御史衙門紀驗。以憑奏報。仍密行總鎮鎮巡等衙門知會。俱毋違錯。

戒諭土目（五月）

案照先經行委副總兵張祐督率官土目兵人等進勦思恩八寨獠賊。今據頭目盧蘇王受等稟報。皆已攻破各寨。斬獲賊級雖未日久。苦亦無多。且又未見獲有真正首惡。中間恐有容隱脫放情弊。合行戒諭督促。爲此牌仰本官。上緊親行督諭各頭目及土兵人等。俱要協力齊心。竭忠報効。務圖勦滅。以絕禍根。庶可以表明各目盡忠圖報之真心。若是少有縱容。復留遺孽。亦是徒勞一場。不足爲功。適足爲罪。非惟不能仰報朝廷再生之恩。其於本院所以勤勤懇懇。不顧利害是非。務要委曲成就爾等之意。亦辜負矣。牌至。卽以此意勸諭各目各兵。此舉非

獨爲除地方之害。亦爾等建子孫久長之業。蓋此一番辛苦。使可一勞永逸矣。發去良民。其榜可給則給。可止則止。一應事機俱仰相機而行。其號色等項。已付思田報効人役徑自帶回分俵。亦宜知悉。

追捕逆賊

據同知桂整稟報。領兵七目盧蘇王受等。各已屯兵八寨。斬獲賊首賊徒數多。巢穴悉已破蕩。即今方在分兵四路搜勦。及稱附近上林縣一十八村。俱搬移上山躲避。又訪得鐵坑那埋。保賊村界連遷江洛春高徑大潘思。廣北三向北夷種村。分今皆逃往潛住。又訪得八寨賊徒。我兵未進之前。陸續出劫鄉村。今皆不敢回寨。散入賓州。濠里并貴縣涼傘壘紙等夷種村。分藏躲。合行分兵搜捕等因。看得八寨猖賊。稔惡多年。攻劫鄉村。殺害人民。擄掠財畜。百姓怨恨。痛入骨髓。今惡貫滿盈。民怨神怒。巢穴破蕩。分崩離析。如失林之梟。投置之兔。迷魄喪魂。正可煎獵而盡。是乃上天欲亡此賊之秋。若不乘此機會。奉行天討。以雪百姓之冤。以舒神人之怒。以除地方之禍。存其遺孽。復爲他日根芽。此豈爲民父母之心乎。及訪得平日哨守八寨官兵人等。往往與賊交通者。據法俱應。明正典刑。今日姑未拏究。容其殺賊報効。立功自贖。除各差官督勦外。爲此牌仰指揮程萬全督率遷江所土官。指揮黃祿千戶黃瑞百戶凌顯等。各起集管下土兵人等。前去北三思盧等處搜捕各賊。仍行曉諭各良善。向化村寨。務將逃躲各賊。盡數擒斬。以泄軍民之憤。獲功解報一體給賞。若是與賊通謀。容留隱蔽。訪究得出。國憲難逃。如是各賊果有誠心悔罪。願來投撫。立功報効者。亦准免其一死。帶來軍門撫諭安插。各官務要盡忠竭力。上報國恩。下除民患。副軍門之委託。立自己之功名。仍督平日與賊交通之人。令其向道追捕。痛加懲改。及此機會。立功自贖。果能奮不顧身。多獲真正惡賊。非但免其既往之罪。抑且同受維新之賞。若猶疑貳觀望。意圖苟免。定行斬首示衆。斷不虛言。本院數日之後。亦且親臨地方。躬行賞罰。仰各上緊立功。毋自取悔。

牌行委官林應聰督諭土目（五月）

看得田州思恩領兵頭目盧蘇王受等所領目兵。皆係驍勇慣戰之人。今又各爲身家子孫之計。自願出力報効。立功贖罪。既已攻破賊巢。分屯其地。則其搜捕潰散之賊。當如探囊取物。數日可盡。今已半月有餘。尙未見有成。功。氣勢日見萎靡。比必軍中收有賊巢婦女等項。貪戀女色財物。不肯割舍脫離。奮勇殺賊。苟且偷安。遂致兵氣日衰。軍威不振。若諸賊聞此消息。乘此懈怠。掩襲不備。我軍必致撓敗。如此。則是各目此舉。本欲立功。而反敗事。本欲贖罪。而反增罪。非惟不能仰報朝廷之德。抑且有損軍門之威矣。正名定罪。後悔何及。爲此牌仰原任戶部郎中。今降徐聞縣丞林應驄。齎執令旗令牌。會同總兵監軍等官。公同署田州府事。知州林寬。身督領兵頭目盧蘇等。閱視各營。但有收得賊巢婦女財物者。通行搜出。俱各開紀名數。別立老營一所。選委老成頭目。另撥謹實小心兵夫。晝夜管守。將各貪戀女色財物。不肯奮勇殺賊頭目兵夫。姑且免其罰治。責令卽出搜山。果能多有擒斬。旬日之內。功成班師。仍將前項婦女財物。照名給還。亦不追究前罪。若有貪戀女賊。違犯軍令。仍前不肯効力者。卽即遵照軍門號令。當時斬首示衆。斷毋姑息容忍。致敗三軍大事。蓋前月之招撫。專以慈愛惻怛爲念者。乃是本院憐憫兩府之民。無罪而就死地。乃是父母愛子之心。惟恐一民不遂其生也。至於今日用兵。却須號令嚴明。有功必賞。有罪必戮。乃是本院欲安兩府之民。使之立功贖罪。以定其身家。而因以除去地方之患。是乃帥師行軍之道。不如此。不足以取勝。而成功也。差去旌牌官員。務要星火催督。毋事姑息。若旬日之後。再無成功。本院親臨分地。定先將監軍督軍等官。問正軍法。其推奸避事。不肯奮勇殺賊頭目。通行斬首。決不虛言。

牌委指揮趙璇留勦餘賊（六月）

牌仰指揮趙璇。前去督哨副總兵張祐處。查審各寨稔惡驕賊。會否勦絕。各兵見住何處。聞已出屯三里。卽就各營土兵目夫。凡有疾病老弱者。俱令在營將息調理。其精壯驍勇目兵。仍仰本官務要三四日或五六日。督令入山巡勦一番。出意外之奇。以示不測之武。須候各山果無潛遁之奸。各巢已無復歸之賊。俟軍門牌至。方許回兵。

仍論士曰。盧蘇王受等。只如此來。如前所連。各兵久在山中。辛勤勞苦。本院不以憐恤。令俱一則欲爲爾等立功。一則欲爲地方除害。雖不忍久勞爾等。而勢有所不能已也。爾等其務體本院之意。再耐旬日之苦。以成百年之功。毋得欲速一時。致貽後悔。事完之日。通至賓州。本院親行犒賞。就領牌劄。仰各知悉。

牌行副總兵張祐搜勦餘巢（十月）

訪得上林相近地方。如綠茅等村。皆係陽招陰叛。與八寨諸賊。翼應外合。積年流毒地方。即其罪惡。尤有甚於八寨諸賊。若不勦滅。終遺禍根。爲此令差指揮趙璇齋牌前去督哨副總兵張祐處計議。仰即密召領兵頭目盧蘇王受等。令各挑選精兵一千或一千五百。以搜巡八寨爲名。當日乘夜速發。分道夾勦。後開各賊村。分務要殲除黨與。蕩平巢穴。若是各賊奔竄大名深山。各兵就可留屯其地。食其禾米六畜。分兵探賊。向往追捕。本院曾發有武緣鄉兵。分搜大名諸山。遙計此時各賊正回山下各村躲住。及今往勦。正合事機。仰諭各目務要潛機速發。不得遲留隔宿。必致透漏消息。徒勞無功。發兵進勦之後。一面差人飛報。

計開 綠茅 通親 綠小 批頭 羅煖 其餘各巢。不能盡開。須要量其罪惡大小。可勦則勦。可撫則撫。相機而應。

犒勞從征土目（八月）

照得思田二府。獨目盧蘇王受等。率領部下兵夫。自備衣糧。征勦八寨。擒賊。渠魁殄滅。羣黨削平。即今地方寧靖。旋師奏凱。實由各目兵夫。不避炎蒸。奮勇効勞。但進兵以來。妨廢一年耕種。况今青黃不接之時。部下兵夫家屬。未免缺乏。相應量爲賑給。以慰人心。爲此牌仰同知桂鑿。即便會同南寧府掌印官。將該府軍餉糧米魚鹽內。照依開數。支給各頭目收領。但念思恩南寧道里相去隔遠。糧米搬運不便。合就於武緣縣見貯軍餉米內。支給與各領用。以見本院體恤之心。仍開給散過數目。繳報查考。毋得違錯。

緩柔流賊（五月）

據左江道叅議等官汪必榮等呈稱。古陶白竹石馬等賊。近雖誅勦。然尚有流出府江諸處者。誠恐日後爲患。乞調歸順土官岑燾兵一千名。萬承龍英共五百名。或韋貴兵一千名。住劄平南桂平衝要地方。及該府知府程雲鵬等。亦申量留湖兵及調武靖州狼兵防守等因。始觀論議。似亦區畫經久之圖。徐考成功。終亦支吾目前之計。蓋用兵之法。伐謀爲先。處夷之道。攻心爲上。今各徭征勦之後。有司卽宜誠心撫恤。以安其心。若不服其心。而徒欲久留湖兵。多調狼卒。憑藉兵力。以威劫把持。謂爲可久之計。則亦未矣。殊不知遠來客兵。怨憤不肯爲用。一也。供饋之需。稍不滿意。求索訾詈。將無抵極。二也。就居民間騷擾濁亂。易生離隙。三也。困頓日久。資財耗竭。適以自弊。四也。欲借此以衛民。而反爲民增一苦。欲借此防賊。而反爲吾招一寇。各官之意。豈不虞各賊乘間突出。故欲振揚兵威。以苟幸目前之無事。抑亦不睹其害矣。前歲湖兵之調。旣已大拂其情。乃今復欲留之。其可行乎。夫刑賞之用。當而後善有所勸。惡有所懲。勸懲之道。明而後政得其安。今稔惡各徭。舉兵征勦。刑旣加於有罪矣。然破敗奔竄之餘。卽欲招撫。彼亦未必能信。必須先從其傍。良善各巢。加厚撫恤。使爲善者益知所勸。而不肯與之相連相比。則黨惡自孤。而其勢自定。使良善各巢。傳道引諭。使各賊咸有回心向化之機。然後吾之招撫。可得而行。而凡綏懷御制之道。可以次而舉矣。夫柔遠人而撫戎狄。謂之柔與撫者。豈專恃兵甲之盛。威力之強而已乎。古之人能以天地萬物爲一體。故能通天下之志。凡舉大事。必順其情而使之。因其勢而導之。乘其機而動之。及其時而興之。是以爲之。但見其易。而成之。不見其難。此天下之民。所以陰受其庇。而莫知其功之所自也。今皆反之。豈所見若是其相遠乎。亦由無忠誠惻怛之心。以愛其民。不肯身任地方利害爲久遠之圖。凡所施爲。不本於精神心術。而惟事補輟掇拾。支吾粉飾於其外。以苟幸吾身之無事。此蓋今時之通弊也。合就通行計處。仰抄案回道。卽行知府程雲鵬。公同指揮周繼宗。及各縣知縣等官。親至已破賊巢。各鄰近良善村寨。以次加厚撫恤。給以

告示。犒以魚鹽。待以誠信。敕以德恩。噉以朝廷。所以誅勦各賊者。爲其稔惡不悛。若爾等良善守分村寨。我官府何嘗輕動爾等一草一木。爾等各宜益堅向善之心。毋爲彼所扇惑搖動。從而爲之推選。衆所信服。立爲會長。以連屬之。優其禮待。厚其犒賞。以漸綏來調習。使之日益親附。又喻以稔惡各賊。彼若不改。一征不已。至於再征不已。至於三。至於四五。至於六七。必使滅絕而後已。此後官府若行勦除。爾等但要安心樂業。無有驚疑。若各賊果能改惡遷善。實心向化。今日來投。今日卽待以良善。卽開其自新之路。決不追既往之惡。爾等卽可以此意傳告開諭之。我官府亦未嘗有必欲殺彼之心。若彼賊果有相引來投者。亦就實心撫安招來之。量給鹽米。爲之經紀生業。亦就爲之選立酋長。使有統率。毋令渙散。一面清查侵占田土。開立里甲。以息日後之爭。禁約良民。毋使乘機報復。以激其變。如農夫之植嘉禾。而去稂莠。深耕易耨。芸蓄灌溉。專心一事。勤誠無惰。必有秋穫。夫善者益知所勸。則助惡者日衰。惡者益知所懲。則向善者益衆。此撫柔之道。而非專有恃於兵甲者也。至於本院近行十家牌諭。誠亦引盜安民之良法。而今之有司。槩以虛文抵塞。莫肯實心推求舉行。雖已造冊繳報。而尙不知其間所屬何意。所處地方。該道仍要用心督責整理。誠使此法一行。則不待調發而處處皆兵。不待屯聚而家家皆兵。不待蓄養而人人皆兵。無餽運之勞。而糧餉足。無關隘之設。而守禦固。習之愈久而法愈精。行之彌廣而功彌大。其前項區處摘調之兵。有虛名而無實用。可張皇於暫時。而不可施行於永久者。勞逸煩簡。相去遠矣。惟有該府議欲散撤雇倩機決等項。調取武靖州土兵使之就近防守一節。區畫頗當。然以三千之衆。而常在一處屯頓坐食。亦未得宜。必須分作六班。每五百名爲一班。每兩箇月日而更一次。若有勦等項。然後通行起調。然必須於城市別立營房。毋使與民雜處。然後可免於騷擾嫌隙。蓋以十家牌門之兵。而爲守土安民之本。以武靖起調之兵。而備追捕勦截之用。此亦經權交濟相須之意。合就准行。仰該道仍將行糧等項。再議停當。備行該州土目人等遵照奉行。自今以後。免其秋調。各處哨守等役。專在漳州地方聽憑守備參濟調用。凡遇緊急調取。卽要星馳

赴信地。不得遲違時刻。守巡各官。仍要時加戒諭。撫輯。毋令日久玩弛。又成虛應故事。本院疎才多病。精力不足。不能躬親細務。獨其憂患地方。欲爲建立久安長治。一念真切。自不能已。是以不覺其言之叨叨。各官務體此意。毋厭其多言。而必務爲紬繹。毋謂其迂遠。而必再與精思。務竭其忠誠。務行其切實。同心協德。共濟時艱。通行總鎮總兵。鎮巡等衙門。知會。仍行三司各道。守巡守備等官。事有相類者。悉以此意推而行之。發去魚鹽。或有不足。再行計處定奪。

告諭村寨

近年牛腸等寨積年稔惡。是以舉兵征勦。爾等良善村寨。我官府自加撫恤。決無侵擾。各宜益堅爲善之心。共享太平之樂。其間平日縱有罪犯。從今但能中心改過。官府決不追論舊惡。毋自疑沮。或爲彼所扇惑。自取滅亡。後悔無及。就使已勦餘黨。若能悔罪。自新官府亦待以良善。一體撫恤。若是長惡不悛。一勦十勦。至於百勦。必加殄滅。斷不虛言。爾等各寨爲善爲惡。日後自見。各宜知悉。

議立縣衛

吾得八寨。痛賊稔惡。爲患巢穴。連絡千里。實爲廣西衆賊之淵藪。近該本院進勦。掃蕩巢穴。若不及今設置軍屯。衛縣據其心腹要害。以扼塞各賊呼吸之咽喉。斷絕各賊牽引之脈絡。不過數年。又將屯聚生息。禍根終未剪除。本院身親督調各兵。看得周安堡正當八寨之中。而三里堡亦當八寨之隘。俱各山勢回抱。堪以築立城郭。移衛設縣。但未經廣詢博訪。詳審水土之善惡。民情之逆順。中間有無利害得失。擬合再行查訪。爲此牌仰分巡右江道兵備副使翁素。會同該道分守官。即便督同同知桂榮。指揮孫綱等。帶領高年知識。親至其地。經營相度。若果風氣包完。水土便利。卽行料理規制。釐定方向。各另畫圖貼說。仍要咨訪父老子弟。通曉賊情。習知民俗者。卽今移立縣衛。其於四遠誠築。果否足能控制民情。有無使益妨損。務在人心樂順。足爲經長永久之計。然後備由呈

來以憑審奏。就將築城垣合用木石甄灰人夫匠作料價工食等項議估停當。具揭呈來。以憑先行。一面委官分督辦理。及時興工。毋得忽意苟且。玩愒遲延。致誤事機。

撫恤來降（八月）

據參將張經呈稱。武靖州耕守黃璋等一十四名。被十冬總甲黃鄧護等妄捏窩賊。乞行釋放。仍給榜諭。看得本院屢經牌仰該道該府等官將各向化良善村寨加意撫恤懷柔。以收其散亡之勢。而堅其向善之心。庶使遠近知勸。而惡黨自孤。各官略不體承本院勤懇懇之意。肆志妄行。輕信十冬奸民之言。輒便推求往事。爲之報復。舊讎。沮抑歸向之望。驚疑反側之心。聽其所爲。必成激變。後雖寸斬奸民之骨。固亦何救地方之患。所據違法各官。即合治以軍法。姑且記罪。再行飭諭。仰將見監黃璋李舉等一十四名。即行釋放。仍加慰諭。令其復業寧家。其十冬黃鄧護等。監候本院撫諭。解赴軍門發落。今後仍要備細開諭該府該縣十冬里老人等。各要守法安分。務以寧靖地方爲重。不得乘機挾勢。侵剝新舊投撫之人。協取財物。泄憤報怨。及至釀成變亂。却又貽累地方。勞煩官府。今後有違犯者。體訪得實。或被入告發。決行拿送軍門。治以軍法。斷不輕恕。仍將發去告示。即行刊刻。給赴十冬里老人等。遵照奉行。具遵行過緣由繳報。

批廣東市舶司提舉及官水手呈

看得廣東市舶司提舉已故錢邦用。平日果係清白自守。足稱廉能。乃今客死遠鄉。情殊可閔。仰廣州府即與量撥水手。起關資送還鄉。其原領文憑。發該衙門轉繳。此繳。

卷十九

外集一 賦 詩

賦騷七首

太白樓賦（丙辰）

歲內辰之孟冬兮。泛扁舟于南征。凌濟川之驚濤兮。覽層構乎任城。曰太白之故居兮。儼高風之猶在。蔡侯導余以從陟兮。將放觀乎四海。木蕭蕭而亂下兮。江浩浩而無窮。鯨敖敖而湧海兮。鵬翼翼而承風。月生輝於采石兮。日留景於嶽峯。蔽長煙乎天姥兮。渺匡廬之雲松。慨昔人之安在兮。吾將上下求索而不可蹇。予雖非白之儔兮。遇季真之知我。羌後人之視今兮。又烏知其不果。吁嗟太白公。奚爲居其此兮。余奚爲其復來倚穹霄以流盼兮。固千載之一哀。昔夏桀之顛覆兮。尹退乎莘之野。成湯之立賢兮。迺登庸而伐夏。謂鼎俎其要說兮。維黨人之擠。詎曾聖哲之匡時兮。夫焉前枉而直後。當天寶之末代兮。淫好色以信讒。惡來妹喜其猖獗兮。衆皆狐媚以貪婪。判獨毅而不顧兮。爰命夫以僕妾之役。寧直死以顛頌兮。夫焉患得而局促。開元之紹基兮。亦遑遑其求理。生逢時以就列兮。固雲臺麟閣而容與。夫何漂泊于天之涯兮。登斯樓乎延佇。信深俗之嫉妬兮。自前世而固然。懷夫子之故都兮。沛余涕之潑潑。廟堂之假塞兮。或非情之所好。惟不合於斯世兮。恣沉酣而遠眺。進吾不遇於武丁兮。退吾將顏氏之箴瓢。奚麴蘖其昏迷兮。亦夫子之所逃。管仲之輔糾兮。孔聖與其改行。佐隣而失節兮。始以見道之未明。觀夜郎之有作兮。橫逸氣以徘徊。亦初心之無他兮。故雖悔而弗摧。吁嗟其誰無過兮。抗直氣之爲難。輕萬乘於褐夫兮。固孟軻之所嘆。曠絕代而相感兮。望天宇之漫漫。去夫子其千祀兮。世益隘以周容。媒婦妾以馳驚兮。又從而爲之吮癰。賢者化而改度兮。兢規曲以爲同。卒曰。嶧山青兮。河流瀉。風颼颼兮。澹平野。凭高樓兮。不見舟楫紛兮。樓之下。舟之人兮。儼服亦有庶幾。夫子之蹤者。

九華山賦（壬戌）

循長江而南下。指青陽以幽討。啟鴻濛之神秀。發九華之天巧。非效靈於神軸。孰構奇於玄造。涉五溪而徑入。宿

無相之窈窕。訪王生於遠谷。掬金沙之清涼。凌風雨乎半霄。登望江而遠眺。步千仞之蒼壁。俯龍池於深窅。吊謫仙之遺跡。躋化城之縹緲。欽鉢孟之朝露。見蓮花之孤標。扣雲門而望天柱。列仙舞於晴昊。儼雙椒之闕門。真人駕陽雲而獨躡。翠蓋平臨乎石照。綺霞掩映乎天姥。二神升於翠微。九子鄰於積石。炎燄起於玉甌。爛石碑之文藻。回澄秋於枕月。建少微之星旌。覆甌承滴翠之餘瀝。展旗立雲外之旛纛。下安禪而步逍遙。覽雙泉於松杪。踰西洪而憩黃石。懸百文之灑灑。瀨流觴而縈紆。遺石船於澗道。呼白鶴於雲峰。釣嘉魚於龍沼。倚透碧之峗岬。謝塵寰之紛擾。變齊雲之巉巖。鑑琉璃之浩漭。沿東陽而西歷。殫九節之蒲葦。橙人導余以冥探。排碧雲之猛島。羣辯醫其繆誤。失陰陽之昏眩。垂上布之沉沆。靈魚隱而復徙。履高僧而屢招賢。問白日之杲杲。試明茗於春陽。汲垂雲之澗湫。凌縹緲而據石屋。何文殊螺髻之蟠糾。梯拱辰而北盼。驟遺光於拾寶。緇裳迓於黃匏。休圓寂之幽。借鳥呼春於叢筍。和雲詔之鸞鸞。喚起促余之晨興。落星河於簪擦。護山嘎其驚飛。恠遊人之太早。攬卉木之如。灌被晨暉而爭姣。靜幾聲之剝啄。幽人馴參巖於冥杏。碧鷲曠於青林。飄翻雲而失皓。隱搗藥於樛蘿。挾提壺餅。焦而翔繞。風風承孟冠以相漉。飲沈瀝之仙醪。奉竹管以嬉翔。集梧枝之媚媚。風欲雨而霏霏。鳴濕濕於薔葆。躡三遊而轉青嶠。拂天香於茫渺。席泓漭以濯纓。浮桃瀉而揚縞。淙淅淅而落蔭。飲猿猱之捷狡。睨斧柯而昇大。還望會仙於雲表。憫子京之故宅。款知微之碧樓。條金光之閃映。眊累景於穹均。弄玄珠於赤水。舞千尺之潛蛟。並花塘而峻極。散香林之迥颺。撫浮屠之突兀。泛五釵之翠濤。襲珍芳於絕巘。鼻金步之搖搖。莎羅躑躅芬敷。而燦耀。幢玉女之妖嬌。寒龍鬚於靈寶。墮鉢囊之飄飄。聞仙掌於嶽嵌。散青馨之迢迢。披白雲而躡崇巖。見參錯之僧寮。日既夕而山冥。掛星辰於繚綖。宿南臺之明月。虎夜嘯而罷嘯。鹿麋羣遊有左右。若將侶幽人之岑寥。迥高寒其無寐。聞冰擊之洞簫。溪女厲晴瀧而曝朮。雜精苓之春苗。激予觴以玉液。飯玉粒之瓊瑤。溘辭予而遠去。颯霞裾之飄飄。復中峯而悵望。或仙蹤之可招。迺下見陽陵之蜿蟺。忽有感於子明之官要。逝予將遺世之獨立。採石

芝於層霄。雖長處於窮僻。迺永離乎懸霧。彼蒼黎之緝緝。固吾生之同胞。苟顛連之能濟。吾豈靳於一毛。矧狂胡之越獫。王師局而奔勞。吾寧不欲請長纓於闕下。快平生之鬱陶。頓力微而任重。懼覆敗於或遭。又出位以圖遠。將無謂於鷓鴣。嗟有生之迫隘。寧滅沒於風泡。亦當貴其奚爲。猶榮華之一朝。曠百世而輿感。蔽雄傑於蓬蒿。吾誠不能同草木而腐朽。又何避乎。喙之吻。已矣乎。吾其鞭風霆而騎日月。被九霞之翠袍。搏鸞翼於北溟。釣三山之巨鰲。道崑崙而自鶴。聽玉母之璫呼。浮丘於子晉。招勾曲之三茅。長遨遊於碧落。共太虛而逍遙。歌曰。蓬壺之藟藟兮。列仙之所逃兮。五華之矯矯兮。吾將於此巢兮。匪塵心之足攪兮。念鞠育之劬勞兮。苟初心之可紹兮。永矢弗撓兮。

吊屈平賦（丙寅）

正德丙寅某以罪謫。賜取道沅湘。感屈原之事爲文而吊之。其詞曰。

山黯慘兮江夜波。風颼颼兮木落森柯。汎中流兮焉泊。湛椒醕兮吊湘壘。雲冥冥兮。月星蔽晦。冰峻嶮兮霰又下。壘之宮兮安在。恨無見兮愁千。高岸兮嗽崎。紛糾錯兮樛枝。下深淵兮不惻。穴澗洞兮蛟螭。山岑兮無極。空谷豁兮逾寥寂。猿啾秋兮吟雨。能熊暉兮虛交蹟。念壘之窮兮焉托處。四山無人兮駭狐鼠。魍魅遊兮萃跳嘯。蹶出入兮爲壘姦宄。媿壘之百兮。反詆爲殃。昵比上官兮子蘭爲賊。幽叢薄兮疇侶。懷故都兮增傷。望九疑兮參差。就重華兮陳辭。沮詰雪兮關絕。洞庭渺邈兮天路迷。要彭咸兮江潭。召申屠兮使騷。娥鼓瑟兮馮夷舞。聊遨遊兮湘之浦。乘回波兮泊澗渚。瞻故都兮獨延佇。君不還兮郢爲墟。心壹鬱兮欲誰語。郢爲虛兮。函擘亦焚。讒鬼通戮兮快不酬。冤靡千載兮欺忠愍。君可復兮排帝閭。望道歸兮涓陽。箕羅囚兮。其祥以狂。報古兮晦明。懷若人兮將予。退懷宗國淪兮摧。俯肝忠憤激兮中道難。勉以回兮不忍。溘目沉兮心所安。雄之諛兮讒喙。衆狂穉兮謂壘揚己。爲魍魎兮。爲姦妄。觀苦風兮佞類。有此壘。忽舉兮雲中。龍竇竄兮飄風。橫四海兮倏忽。驪玉虬兮上

衝降兮大壑。由用兮。分。家。窮。逝。去兮無窮。懷故都兮蜷局。歌曰。日西夕兮沉湘流。楚山嵯峨兮無冬秋。疊不見兮鴻泗。世愈隆兮孰知我愛。

思歸賦（庚辰）

陽明子之官于虔也。解之後喬木蔚然。退食而望。若處深麓而遊於其鄉之園也。構軒其下。而名之曰思歸焉。門人相謂曰。歸乎。夫子之役役於兵革。而沒沒於徵纒也。而靡寒暑焉。而髮蕭蕭焉。而色焦焦焉。雖其心之固驚囂也。而不免於嘔噉焉。嘔噉焉。亦奚爲乎。稿中竭外。而徒以勞勞焉爲乎哉。且長谷一迢迢也。窮林之寥寥也。而耕焉。而樵焉。亦焉往而弗宜矣。夫退身以全節。大知也。歛德以亨道。大時也。怡神養性以遊於造物。大熙也。又夫子之夙期也。而今日之歸。又奚以思爲乎哉。則又相謂曰。夫子之思歸也。其亦在陳之懷歟。吾黨之小子。其狂且簡。佞俵然若瞽之無與偕也。非吾夫子之歸。孰從而裁之乎。則又相謂曰。嗟乎。夫子而得其歸也。斯土之人。爲失其歸矣乎。天下之人也。而皆若是焉。其誰與爲理乎。雖然。夫子而得其歸也。而後得於道。惟夫天下之不得於道也。故若是其質質。夫道得而志全。志全而化理。化理而人安。則夫斯人之徒。亦未始爲不得其歸也。而今日之歸。又奚疑乎。而奚以思爲乎。陽明子聞之。憮然而嘆曰。吾思乎。吾思乎。吾親老矣。而暇以他爲乎。雖然。言也。其始也。吾私焉。其次也。吾資焉。又其次也。吾幾焉。乃援琴而歌之。歌曰。歸兮歸兮。又奚疑兮。吾行日非兮。吾親日衰兮。胡不然兮。日思予旋兮。後悔可遷兮。歸兮歸兮。二三子之言兮。

答言（丙寅）

正德丙寅冬十一月。守仁以罪下錦衣獄。省愆內訟。時有所述。既出而錄之。

何玄夜之漫漫兮。悄予懷之獨結。嚴霜下而增寒兮。皦明月之在隙。風嘖嘖以憎木兮。鳥驚乎而未息。魂營營以惴惴兮。目窅窅其焉極。懷寒飈之中人兮。杳不知其所自。夜展轉而九起兮。沾予襟之如泗。胡定省之弗遑兮。豈

荼甘之如養。懷前哲之耿光兮。恥周容以爲比。何天高之冥冥兮。孰察予之哀。予匪戚於累囚兮。特匪予之爲恫。沛洪波之浩浩兮。造雲阪之濛濛。稅千駕其安止兮。終予去此其焉從。飢饜擦之在頸兮。謂累足之何傷。熏目而弗顧兮。惟盲者以爲常。孔訓之服膺兮。惡訐以爲直辭。婉變期巷遇兮。豈予言之未力。皇天之無私兮。鑒予情之靡他。寧保身之弗知兮。膺斧鑕之謂何。蒙出位之爲愆兮。信愚忠而蹈亟。苟聖明之有裨兮。雖九死其焉恤。歌曰。予年將中。歲月遒兮。溪谷崆嶺。逝息逝兮。飄然凌風。八極周兮。飢樂之同。不均憂兮。匪脩名崇仁之求兮。出處時從。天命何憂兮。

守儉弟歸口仁歌楚聲爲別予亦和之

庭有竹兮青青。上喬木兮鳥嚶嚶。妹之來兮。弟與偕行。竹青青兮。雨風鳥嚶嚶兮。西東弟之歸兮。兄誰與同。江雲閣兮。暑雨江波渺渺兮。慈子弟別兄兮。須臾兄思弟兮。何處景翳翳兮。桑榆念重闌兮。離居路脩遠兮。崎嶇沮風波兮。江湖山有洞兮。洞有雲。深林篔簹兮。澗洞曠。松落落兮。葛纍纍。猿啾啾兮。鶴怨羣。山之人兮。不歸。山鬼晝嘯兮。下上煙雲。風嫋嫋兮。桂花落。草萋萋兮。春日遲。葺子屋兮。雲間荒。予圃兮。溪之陽。驅虎豹兮。無踐我藿。擾麋鹿兮。無駭我場。解子綬兮。鍾阜委。予佩兮。江涘往者不可追兮。嘆鳳德之日衰。將沮溺其耦耕兮。歆接輿之避予。回予駕兮。扶桑。鼓子樵兮。滄浪。終搗汝兮。空谷採三秀兮。徜徉。

祈雨辭（正德丙子南贛作）

嗚呼。十日不雨兮。田且無禾。一月不雨兮。川且無波。一月不雨兮。民已爲疴。再月不雨兮。民將奈何。小民無罪兮。天無咎民。撫巡失職兮。罪在予臣。嗚呼。盜賊兮。爲民大屯。天或罪此兮。赫威降曠。臣則何罪兮。玉石俱焚。嗚呼。民則何罪兮。天何遽怒。油然興雲兮。雨茲下土。彼罪曷逋兮。哀此窮苦。

歸越詩三十五首（弘治壬戌年以刑部主事告病歸越并楚遊作）

遊牛峯寺四首（牛峯今改名淨峯）

洞門春靄蔽深松。飛磴纏空轉石峯。猛虎踞厓如出柙。斷螭蟠頂訝懸鐘。金城絳闕應無處。翠壁丹書尚有踪。天下名區皆一到。此山殊不厭來重。

縈紆鳥道入雲松。下數湖南百二峯。巖犬吠人時出樹。山僧迎客自鳴鐘。凌鷗陟險真扶病。異日探奇是舊踪。欲扣靈關問丹訣。春風羅薛隔重重。

偶尋春寺入層峯。曾到渾疑是夢中。飛鳥去邊懸棧道。馮夷宿處於幽宮。溪雲晚度千巖雨。海月涼飄萬里風。夜擁蒼厓臥丹洞。山中亦自有王公。

一臥禪房隔歲心。五峯煙月聽猿吟。飛湍映樹懸蒼玉。香粉吹香落細金。翠壁年多霜蘚合。石牀春盡雨芷深。勝遊過眼俱陳迹。珍重新題滿竹林。

又四絕句

翠壁看無厭。山池坐益清。深林落輕葉。不道是秋聲。怪石有千窟。老松多半枝。清風灑巖洞。是我再來時。

人間酷暑避不得。清風都在深山中。池邊一坐即三日。忽聽巖頭碧樹紅。兩到浮峯興轉劇。醉眠三日不知覺。眼前風景色色異。惟有人聲似世間。

姑蘇吳氏海天樓次鄭尹韻

晴雪吹寒春事濃。江樓三月尚殘冬。青山暗逐回廊轉。碧海真成捷徑通。風暖簷牙雙燕劇。雲深簾幙萬花重。倚闌天北疑回首。思像丹梯下六龍。

山中立秋日偶書

風吹蟬聲亂。林臥驚新秋。山池靜澄碧。暑氣亦已收。青峯出白雲。突兀成瓊樓。相榻坐溪石。對之心悠悠。倏忽無定態。變化不可求。浩然發長嘯。忽起雙白鷗。

夜雨山翁家偶書

山空秋夜靜。月明松檜涼。沿溪步月色。溪影搖空蒼。山翁隔水語。酒熟呼我嘗。褰衣涉溪去。笑引開竹房。謙言值暮夜。盤食百無將。露華明橋袖。摘獻冰盤香。洗盞對酬酢。歌人蒼茫。醉拂巖石臥。言歸遂相忘。

尋春

十里湖光放小舟。謾尋春事及西疇。江鷗意到忽飛去。野老情深只自留。日暮草香含雨氣。九峯晴色散溪流。吾儕是處皆行樂。何必滿亭說舊遊。

西湖醉中謾書二首

十年塵海勞魂夢。此日重來眼倍清。好景恨無蘇老筆。乞歸徒有賀公情。白鷺飛處青林晚。翠壁明邊返照晴。爛醉湖雲宿湖寺。不知山月墮江城。

掩映紅粧莫謾猜。隔林知是藕花開。共君醉臥不須到。自有香風拂面來。

九華山下柯秀才家

蒼峯抱厝嶂。翠瀑繞雙溪。下有幽人宅。羅深客到迷。

夜宿無相寺

春宵臥無相。月照五溪花。掬水洗雙眼。披雲看九華。巖頭金佛國。樹杪謫仙家。彷彿聞笙鶴。青天落絳霞。

題四老圍棋圖

世外煙霞亦許時。至今風致後人思。却懷劉項當年事。不及山中一着棋。

無相寺三首

老僧巖下屋。繞屋皆松竹。朝聞春鳥啼。夜伴巖虎宿。
坐望九華碧。浮雲生曉寒。山靈應秘惜。不許俗人看。
靜夜聞林雨。山靈似欲留。只愁梯石長。不得到峯頭。

化城寺六首

化城高宿萬山深。樓閣憑空上界侵。天外清秋度明月。人間微雨結浮陰。鉢龍降處雲生座。巖虎歸時風滿林。最愛山僧能好事。夜堂燈火伴孤吟。

雲裏軒窗半上鉤。望中千里見江流。高林日出三更曉。幽谷風多六月秋。仙骨自憐何日化。塵緣翻覺此生浮。夜深忽起蓬萊興。飛上青天十二樓。

雲端鼓角落星斗。松頂袈裟散雨花。一百六峯開碧漢。八十四梯踏紫霞。山空仙骨埋金槩。春暖石芝抽玉芽。獨揮談麈拂煙霧。一笑天地實無涯。

化城天上寺。石磴入星躔。雲外開丹井。峯頂耕石田。月明猿聽偈。風靜鶴參禪。今日揩雙眼。幽懷二十年。僧屋煙霏外。山僧絕世譚。茶分龍井水。飯帶石田砂。香細雲嵐雜。窗高峯影遮。林棲無一事。終日弄丹霞。突兀開穹閣。氤氳散曉鐘。飯遺黃稻粒。花發五釵松。金骨藏靈塔。神光照遠峯。微茫竟何是。老衲話遺宗。

李白祠二首

千古人豪去。空山尚有祠。竹深荒舊徑。藓合失殘碑。雲雨羅文藻。溪泉繫夢思。老僧殊未解。猶自索題詩。謫仙棲隱地。千載尚高風。雲散九峯雨。巖飛百丈虹。寺僧傳舊事。祠客吊遺踪。回首蒼茫外。青山感慨中。

雙峯

凌崖望雙峯。蒼茫竟何在。載拜西北風。爲我掃浮靄。

蓮花峯

夜靜涼颼發。輕雲散碧空。玉鈞掛新月。露出青芙蓉。

列仙峯

靈峭九萬丈。參差生曉寒。仙人招我去。揮手青雲端。

雲門峯

雲門出孤月。秋色坐蒼濤。夜久翠籟絕。樹照官錦袍。

芙蓉閣二首

青山意不盡。還向月中看。明日歸城布。風塵又馬鞍。

巖下雲萬重。洞口桃千樹。終歲無人來。惟許山僧住。

書梅竹小畫

寒倚春霽蒼玉杖。九華峯頂獨歸來。柯家草亭深雲裏。却有梅花傍竹開。

山東詩六首（弘治甲子年秋復主試山東時作）

登泰山五首

曉登泰山道。行入烟霏。陽光散巖壑。秋容淡相輝。雲梯掛青壁。仰見珠絲微。長風吹海色。飄飄送天衣。峯頂動笙樂。青童兩相依。振衣將往從。凌雲忽高飛。揮手若相待。丹霞閃餘暉。凡軀無健羽。悵望未能歸。

二

天門何崔嵬。下見青雲浮。泱泱絕人世。迥豁高天秋。暝色從地起。夜宿天上樓。天鷄鳴半夜。日出東海頭。隱約蓬

壺樹。縹緲扶桑洲。浩歌落青冥。遺響入滄流。唐虞遠楚漢。滅沒如風漚。貌矣鶴巾慙。李處豈堪求。金砂費日月。顏竟難留。吾意在龐公。冷然取涼颯。相期廣成子。太虛顯遨遊。枯槁向巖谷。黃綺不足儔。

二

窮陬不可極。飛步凌烟虹。危泉瀉石道。空影垂雲松。千峯互攢簇。掩映青芙蓉。高臺倚巉削。傾側臨崆峒。失足墮烟霧。碎骨顛匡中。下愚竟難曉。摧折紛相從。吾方坐日觀。披雲笑天風。赤水問軒后。蒼梧叫重瞳。隱隱落天語。闔闔開玲瓏。去去勿復道。濁世將焉窮。

丙

塵網苦羈縻。富貴真露草。不如騎白鹿。東遊入蓬島。朝登太山望。洪濤隔縹緲。陽輝出海雲。來作天門曉。遙見碧霞君。翩翩起真嶠。玉女紫鸞笙。雙吹入晴昊。舉首望不及。下拜風浩浩。擲我玉虛篇。讀之殊未了。傍有長眉翁。一能指道。從此煉金沙。人間跡如掃。

五

我才不救時。匡扶志空大。置我有無間。緩急非所賴。孤坐萬峯巔。嗒然遺下塊。已矣復何求。至精諒斯在。澹泊非虛杳。灑脫無芥蒂。世人聞予言。不笑即吁咤。吾亦不強語。惟復笑相待。魯叟不可作。此意聊自快。

泰山高次王內翰司獻韻

歐生誠楚人。但識廬山高。廬山之高猶可計。尋丈若夫泰山仰視恍惚。吾不知其尚在青天之下乎。其已直出青天上。我欲做擬試作泰山高。但恐培塿之見未能測識。高大筆底難具狀。扶輿磅礴元氣鍾。突兀半遮天地東。南衡北恆西秦華。俯視僂僂誰爭雄。人寰茫昧乍隱見。雷雨初解開鴻濛。繡壁丹梯烟霏靄。壽海日初湧照耀蒼中。平麓遠抱滄海灣。日觀正與扶桑對。聽濤聲之下瀉。知百川之東會。天門石扇豁然中開。幽岸邃谷巖積隱埋中。

有。遞。世。之。流。魚。潛。雌。伏。殞。霞。吸。秀。於。其。間。往。往。恠。譎。多。僊。才。上。有。百。丈。之。飛。湍。懸。空。絡。石。穿。雲。而。直。下。其。源。疑。自。青。天。來。巖。頭。磨。寸。出。煙。霧。須。臾。滂。沱。遍。九。垓。古。來。登。封。七。十。二。主。後。來。相。效。紛。紛。如。雨。玉。檢。金。函。無。不。爲。只。今。埋。沒。知。何。許。但。見。白。雲。猶。復。起。封。中。斷。碑。無。字。天。外。日。月。磨。剛。風。飛。塵。過。眼。倏。忽。飄。蕩。豈。復。有。遺。踪。天。空。翠。華。遠。落。日。辭。千。峯。魯。郊。獲。麟。岐。陽。會。鳳。明。堂。既。毀。闕。宮。興。頌。宣。尼。曳。杖。道。遙。一。去。不。復。來。幽。泉。鳴。咽。而。含。悲。翠。巒。拱。揖。如。相。送。俯。仰。宇。宙。千。載。相。望。墮。山。喬。嶽。尙。被。其。光。峻。極。配。天。無。敢。頡。頏。嗟。子。瞻。眺。門。壇。外。何。能。彷彿。窺。室。堂。也。來。攀。附。攝。遺。跡。三。千。之。下。不。知。亦。許。再。拜。占。未。行。吁。嗟。乎。秦。山。之。高。其。高。不。可。極。半。壁。回。首。此。身。不。覺。已。在。東。斗。傍。

京師詩八首（弘治乙丑年改除兵部主事時作）

憶龍泉寺

我愛龍泉寺。寺僧頗踈野。晝日坐井欄。有時臥松下。一夕別山雲。三年走車馬。媿殺巖下泉。朝夕自清瀉。

憶諸弟

久別龍山雲。時夢龍山雨。覺來枕簟涼。諸弟在何許。終年走風塵。何似山中住。百歲如轉蓬。拂衣從此去。

寄舅

老舅近何如。心性老不改。世故惱情懷。光陰不相待。借問同輩中。鄉鄰幾人在。從今且爲樂。舊事無勞悔。

送人東歸

五洩佳山水。平生思一游。送子東歸省。尊鱸况茂秋。幽探須及壯。世事苦悠悠。來歲春風裏。長安憶故丘。

寄西湖友

子有西湖夢。西湖亦夢子。三年長闊別。近事竟何如。况有諸賢在。他時終卜廬。但恐吾歸日。君還軒冕拘。

贈伯陽

伯陽卽伯陽。伯陽或安在。大道卽人心。萬古未嘗改。長生在求仁。金丹非外待。謬矣三十年。于今吾始悔。故山

鑑水終年碧。雲山盡田閑。故山不可到。幽夢每相關。霧豹言長隱。王龍欲共攀。緣知丹壑意。未勝紫宸班。憶鑿湖友

長見人來說。扁舟每獨游。著風梅市曉。月色鑿湖秋。空有煙霞好。猶爲塵世留。自今當勇往。先與報江鷗。獄中詩十四首（正德丙寅年十二月以上疏忤逆瑾下錦衣獄作）

不寐

天寒歲云暮。冰雪關河迥。幽室癩生。不寐知夜永。驚風起林木。驟若波浪洶。我心良匪石。鉅爲戚欣動。滔滔眼前事。逝者去相踵。臣窮猶可陟。水深猶可泳。焉知非日月。胡爲亂予衷。深谷自逶迤。烟霞日悠永。匡時在賢達。歸哉盍耕墉。

有室七章

有室如鑊。周之崇墉。室如穴處。無秋無冬。耿彼屋漏。天光入之。瞻彼日月。何嗟及之。倏晦倏明。淒其以風。倏雨倏雪。常晝而蒙。夜何其矣。靡星靡粲。豈無白日。寤寐永嘆。心之憂矣。匪家匪室。或其啓矣。殞予匪恤。氤氳其埃。日之光矣。淵淵其鼓。明旣昌矣。朝旣式矣。日旣夕矣。悠悠我思。曷其極矣。

讀易

因居亦何事。省愆懼安飽。瞑坐玩義易。洗心見微奧。乃知先天翁。畫畫有至教。包蒙戒爲寇。童叟事宜早。蹇蹇匪爲節。齷齪未違道。懸四夔我心。蠶上庸自保。俛仰天地間。觸目俱浩浩。簞瓢有餘樂。此意良匪矯。幽哉陽明麓。可以忘吾老。

歲暮

兀坐經旬成木石。忽驚歲暮還思鄉。高簷白日不到地。深夜黠鼠時登床。峯頭霽雪開草閣。瀑下古松開石房。溪鶴洞猿爾無恙。春江歸棹吾相將。

見月

屋罅見明月。還見天上霜。客子夜中起。旁皇涕沾裳。匪爲嚴霜苦。悲此明月光。月光如流水。徘徊照高堂。胡爲此幽室。奄忽踰飛揚。逝者不可及。來者猶可望。盈虛有天運。嘆息何能忘。

天涯

天涯歲暮冰霜結。永巷人稀罔象游。長夜星辰瞻閣道。曉天鐘鼓融雲樓。思家有淚仍多病。報主無能合遠投。留得昇平雙眼在。且應篋笠臥滄洲。

屋罅月

幽室不知年。夜長晝苦短。但見屋罅月。清光自虧滿。佳人宴清夜。繁絲激哀管。朱閣出浮雲。高歌正淒婉。寧知幽室婦。中夜獨愁嘆。良人寧游俠。經歲去不返。來歸在何時。年華忽將夜。蕭條念宗祀。淚下長如霰。

別友獄中

居常念朋舊。每領成濶絕。嗟我二三友。胡然此等毒。累累囹圄間。講誦未能輟。桎梏敢忘罪。至道良足悅。所恨精

誠時尚口徒自蹶。天下本明聖。旋已但中熱。行藏未可期。明當與君別。願言無詭隨。努力從前誓。

赴謫詩五十五首（正德丁卯年赴謫貴陽龍場驛作）

答汪抑之三首

去國心已恫。別子意彌憫。伊邇怨昕夕。况茲萬里隔。戀戀岐路間。執手何能默。子有昆弟居。而我遠親側。回思菽水慳。羨子何由得。知子念我深。夙夜敢忘惕。良心忠信資。纒緇非我戚。

北風春尚號。浮雲正南馳。風雲一相失。各在天一涯。客子懷往路。起視明星稀。驅車赴長阪。迢迢入嵐霏。旅宿蒼山底。霧雨昏朝彌。間關不足道。嗟此白日微。切礎此良久。願言毋心違。

聞子賦茆屋。來歸在何年。索居問楚越。連峯鬱參天。緬懷巖中隱。磴道窮扳緣。江雲動蒼壁。山月流澄川。朝採石上芝。暮漱松間泉。鵝湖有別釣。鹿洞多遺編。寄子春鴻書。待我秋江船。

陽明子之南也。其友湛元明歌九章以贈。崔子鍾和之以五詩。於是陽明子作八詠以答之。

君莫歌九章。歌以傷我心。微言被寥寂。重以離別吟。別離悲尚淺。言微感逾深。瓦缶易諸俗。誰辯黃鐘音。

其二

君莫歌五詩。歌之增離憂。豈無良朋侶。洵樂相遨遊。譬彼桃與李。不爲倉困謀。君莫忘五詩。忘之我焉求。

其三

洙泗流浸微。伊洛僅如綫。後來三四公。瑕瑜未相掩。嗟予不量力。跛蹇期致遠。屢與還屢仆。喘息幾不免。道逢同心人。秉節倡予敢。力爭毫釐間。萬里或可勉。風波勿相失。言之淚徒泫。

其四

此心還此理。寧論己與人。千古一嘯吸。誰爲嘆離羣。浩浩天地內。何物非同春。相思輒奮勵。無爲俗所分。但使心

無間。萬里如鄉親。不見宴遊交。微逐胥以淪。

其五

器道不可離。二之即非性。孔聖欲無言。下學從泛應。君子勤小物。蘊蓄乃成行。我誦窮索箴。於子既開命。如何圓中土。空谷以爲靜。

其六

靜虛非虛寂。中有未發中。中有亦何有。無之即成空。無欲見直體。忘助皆非功。至哉玄化機。非子孰與窮。

其七

億與美人別。贈其青琅函。受之不敢發。焚香始開幃。諷誦意彌遠。期我濂洛間。道遠恐莫致。庶幾終不慚。

其八

億與美人別。惠我雲錦裳。錦裳不足貴。遺我冰雪腸。寸腸亦何遺。誓言終不渝。珍重美人意。深秋以爲期。

南遊三首

元明與予有衡嶽羅浮之期。賦南遊中約也。

南遊何迢迢。蒼山亦南馳。如何衡陽鴈。不見燕臺書。莫歌澧浦曲。莫吊湘君祠。蒼梧煙雨絕。從誰問九疑。

其二

九疑不可問。羅浮如可攀。遙拜羅浮雲。奠以雙瓊環。渺渺洞庭波。東逝何時還。人生不努力。草木同衰殘。

其三

洞庭何渺茫。衡嶽何崔嵬。風飄迴鴈雪。美人歸未歸。我有紫瑜珮。留掛芙蓉臺。下有蛟龍峽。往往與雲雷。

憶昔答喬白巖因寄柴墟三首

憶昔與君約。玩易探玄微。君行赴西嶽。經年始來歸。已將事窮索。忽復當遠辭。相去萬里餘。後會安可期。問我長生訣。惑也吾誰欺。盈虧消息間。至哉天地機。聖狂天淵隔。失得分毫釐。

其二

毫釐何所辯。惟在公與私。公私何所辯。天動與人爲。遺體豈不貴。踐形乃無虧。願君崇德性。問學刊支離。無爲氣所役。毋爲物所疑。恬淡自無欲。精專絕交馳。博奕亦何事。好之甘若飴。吟咏有性情。喪志非所宜。非君愛忠告。斯語容見嗤。試問柴墟子。吾言亦何如。

其三

柴墟吾所愛。春陽溢鬢眉。白巖吾所愛。慎默長如愚。二君廊廟器。予亦山泉姿。度量較齒德。長者皆吾師。置我五人末。庶亦忘崇卑。迢迢萬里別。心事兩不疑。北風送南鴈。慰我長相思。

一日懷抑之也。抑之之贈。既嘗答以三詩。意若有歉焉。是以賦也。

一日復一日。去子日以遠。惠我金石言。沉鬱未能展。人生各有際。道誼尤所眷。嘗嗤兒女悲。憂來仍不免。緬懷滄洲期。聊以慰遲晚。

其二

遲晚不足嘆。人命各有常。相去忽萬里。河山鬱蒼蒼。中夜不能寐。起視江月光。中情良自抑。美人難自忘。

其三

美人隔江水。彷彿若可覩。風吹葭葭雪。飄蕩知何處。美人有瑤瑟。清奏含太古。高樓明月夜。惆悵爲誰鼓。

夢與抑之昆季語。滿崔皆在焉。覺而有感。因紀以詩三首。

夢與故人語。語我以相思。纔爲旬日別。宛若三秋期。令弟坐我側。屈指如有爲。須臾洪君至。崔子行相隨。看醜旋

羅列語笑如平時。縱言及微奧。會意忘坐辭。覺來復何能。起坐空嗟咨。

其二

起坐憶所夢。默迥猶歷歷。初談自有形。繼論人無極。無極生往來。往來萬化出。萬化無停機。往來何時息。來者胡爲信。往者胡爲屈。微哉屈信間。子午當其屈。非子盡精微。此理誰與測。何當衡廬間。相携玩義易。

其三

衡廬曾有約。相携尙無時。去事多翻覆。來踪豈前知。斜月滿虛牖。樹影何參差。林風正蕭瑟。驚鵲無寧枝。邈彼二三子。怒焉勞我思。

因雨和杜韻

晚堂疎雨暗柴門。忽入殘荷瀉石盆。萬里滄江生白髮。幾人燈火坐黃昏。客途最覺秋先到。荒徑惟憐菊尙存。却憶故園耕釣處。短篴長笛下江村。

赴謫次北新關喜見諸弟

扁舟風雨泊江關。兄弟相看夢寐間。已分天涯成死別。寧知意外得生還。投荒自識君恩遠。多病心使吏事閒。攜汝耕樵應有日。好移茅屋傍雲山。

南屏

溪風漠漠南屏路。春服初成病眼開。花竹日新僧已老。湖山如舊我重來。層樓雨急青林迥。古殿雪晴碧嶂迴。獨有幽禽解相信。雙飛時下讀書臺。

臥病靜慈寫懷

臥病空山春復夏。山中幽時最能知。雨晴階下泉聲急。夜靜松間月色遲。把卷有時眠白石。解纓隨意濯清漪。吳

山越嶠俱堪老。正奈燕雲繫遠思。

移居勝會寺二首

江上但知山色好。峯迴始見寺門開。半空虛閣有雲住。六月深松無暑來。病肺正思移枕簟。洗心兼得遠塵埃。富春咫尺烟濤外。時倚層霞望釣臺。病餘巖閣坐朝暉。異景相新得未聞。日脚倒明千頃露。雨聲高度萬峯雲。越山陣水當吳嶠。江月隨潮上海門。便欲携書從此老。不教猿鶴更移文。

憶別

憶別江干風雪陰。艱難歲月兩侵尋。重看骨肉情何限。况復斯文約舊深。賢聖可期先立志。塵凡未脫謾言心。移家便住烟霞壑。綠水青山長對吟。

泛海

險夷原不滯胸中。何異浮雲過太空。夜靜海濤三萬里。月明飛錫下天風。

武夷次壁間韻

肩輿飛度萬峯雲。回首滄波月下聞。海上直爲滄水使。山中又遇武夷君。溪流九曲初諧路。精舍千年始及門。歸去高堂慰垂白。細探更擬在春分。

草萍驛次林見素韻奉寄

山行風雪瘦能常。會喜江花照夜航。本與宦途成懶散。頗因四景受閑忙。鄉心草色春同遠。客鬢松梢晚更蒼。料得烟霞終有分。未須連夜夢溪堂。

至山東嶽廟遇舊識嚴星士

憶昨東歸亭下路。數峯蕭管隔秋雲。肩輿欲到妨多事。鼓柁重來會有云。春夜絕憐燈節近。溪聲最好月中聞。行藏無用君平卜。請看沙邊鷗鷺羣。

廣信元夕蔣太守舟中夜話

樓臺燈火水東西。簫鼓星橋渡碧空。何處忽談塵世外。百年惟此月明中。客途孤寂渾常事。遠地相求見古風。別後新詩如不惜。衡南今亦有飛鴻。

夜泊石亭寺用韻呈陳婁諸公因寄儲柴墟都憲及喬白巖太常諸友

廿年不到石亭寺。惟有西山只舊青。白拂掛牆僧已去。紅闌照水客重經。沙村遠樹凝春望。江雨孤篷入夜聽。何處故人還笑語。東風啼鳥夢初醒。

振望沙頭成九坐。江洲春樹何青青。烟霞故國虛夢想。風雨客途真慣經。白壁屢投終自信。朱絃一絕好誰聽。扁舟心事滄浪舊。從與漁人笑獨醒。

過分宜望鈴岡廟

共傳峯頂樹。古廟有靈神。楚俗多尊鬼。巫言解惑人。望禪存舊典。捍禦及斯民。世事渾如此。題詩感慨新。

雜詩三首

危機斷我前。猛虎尾我後。倒崖落我左。絕壑臨我右。我足復荆榛。雨雪更紛驟。邈然思古人。無悶聊自有。無悶雖足珍。警惕忘爾守。君觀真宰意。匪薄亦良厚。

其二

青山清我目。流水靜我耳。琴瑟在我御。經書滿我几。措足踐坦道。悅心有妙理。頑冥非所懲。賢達何靡靡。乾乾懷往訓。敢忘情分畀。悠哉天地內。不知老將至。

羊腸亦坦道。太虛何陰晴。燈窻玩古易。欣然獲我情。起舞還再拜。聖訓垂明明。拜舞詎踰節。頓忘樂所形。歛衽復端坐。玄思窺沉冥。寒根固生意。息灰抱陽精。冲漠際無極。列宿羅青冥。夜深向晦息。始聞風雨聲。

袁州府宜春臺四絕

宜春臺上還春望。山水南來眼未嘗。却笑韓公亦多事。更從南浦羨滕王。臺名何事只宜春。山色無時不可人。不用煙花費粧點。儘教刊落儘嶙峋。持脩江漢拜祠前。正是春風欲暮天。童冠儘多歸詠興。城南兼說有溫泉。古廟香燈幾許年。增修還費大官錢。至今楚地多風雨。猶道山神駕鐵船。

夜宿宣風館

山石崎嶇古轍痕。沙溪馬渡水猶渾。夕陽歸鳥投深麓。烟火行人望遠村。天際浮雲生白髮。林間孤月坐黃昏。越南冀北俱千里。正恐春愁入夜魂。

萍鄉道中謁濂溪祠

木偶相沿恐未真。清輝亦復凜衣巾。簿書曾屑乘田吏。俎豆猶存畏壘民。碧水蒼山俱過化。光風霽月自傳神。千年私淑心喪後。下拜春祠薦渚蘋。

宿萍鄉武雲觀

曉行山徑樹高低。雨後春泥沒馬蹄。翠色絕雲開遠嶂。寒聲隔竹隱晴溪。已聞南去艱舟楫。漫憶東歸沮杖藜。夜宿仙家見明月。清先還似鑑湖西。

醴陵道中風雨夜宿泗洲寺次韻

風雨偏從險道嘗。深泥沒馬陷軍箱。虛傳鳥路通巴蜀。豈必羊腸在太行。遠渡漸看連暝色。晚霞會喜見朝陽。水南昏黑投僧寺。遠理義編坐夜長。

長沙答周生

旅倦憩江觀。病齒廢談誦。之子特相求。禮彈意彌重。自言絕學餘。有志莫與共。手持一編書。披歷見肝衷。近希小范踪。遠爲買生慟。兵符及射藝。方技靡不綜。我方懲創後。見之色亦動。子誠仁者心。所言亦屢中。願子且求志。蘊蓄事涵泳。孔聖固遑遑。與點樂歸詠。回也王佐才。閉戶避鄰閔。知子信美才。大構中梁棟。未嘗匹石求。滋植務培壅。愧子勤繕意。何以相規諷。養心在寡欲。操存舍卽縱。嶽麓何森森。遺址自南宋。江山足游息。賢迹尙堪踵。何當謝病來。士氣多沉勇。

涉湘于邁。嶽麓是遵。仰止先哲。因懷友生。麗澤與感。伐木寄言。二首。

客行長沙道。山川鬱稠繆。西探指嶽麓。凌晨渡湘流。踰岡復陟嶽。吊古還尋幽。林壑有餘采。昔賢此藏脩。我來實仰止。匪伊事盤遊。衡雲開曉望。洞野浮春洲。懷我二三友。伐木增離憂。何嘗此來聚。道誼日相求。

其二

林間憩白石。好風亦時來。春陽熙百物。欣然得予懷。緬思兩夫子。此地得徘徊。當年靡童冠。曠代登堂階。高情詎今昔。物色遺吾脩。顧謂二三子。取瑟爲我諧。我彈爾爲歌。爾舞我與偕。吾道有至樂。富貴真浮埃。若時乘大化。勿愧點與回。陟岡探松柏。將以遺所思。勿採松栢枝。兩賢昔所依。綠峰踐臺石。將以望所期。勿踐臺上石。兩賢昔所躋。兩賢去逸矣。我友何相違。吾斯未能信。役役空爾疲。胡不此簪盍。麗澤相遨嬉。渴飲松下泉。飢殮石上芝。偃仰絕餘念。遷客難久稽。洞庭春浪濶。浮雲隔九疑。江洲滿芳草。目極令人悲。已矣從此去。奚必茲山爲。戀繫乃從欲。安土惟隨時。晚聞冀有得。此外吾何知。

遊嶽麓書事

醴陵西來涉湘水。信宿江城沮風雨。不獨病齒畏風濕。泥潦侵途絕行旅。人言嶽麓最形勝。隔水溟濛隱雲霧。趙侯需晴邀我遊。故人徐陳各傳語。周生好事屢來速。森森雨脚何由住。曉來陰翳稍披拂。便携周生涉江去。戒令休遣府中知。徒爾勞人更妨務。橘州僧寺浮江流。鳴鐘出延立沙際。停橈一至答其情。三洲連綿亦佳處。行雲散漫浮日色。是時峯巒益開霽。亂流蕩漿濟倏忽。繫楫江邊老檀樹。岸行里許入麓口。周生道予勤指顧。柳蹊梅堤存彷彿。道林林壑獨如故。赤沙想像虛田中。西嶼傾頽今塚墓。道鄉荒趾留突兀。赫曦遠望石如鼓。殿堂釋菜禮從宜。下拜朱張息游地。鑿石開山而勢改。雙峯闢闕見江渚。聞是吳君所規畫。此舉良是反遭忌。九仞誰虧一簣功。嘆息遺基獨延佇。浮屠觀閣摩青霄。盤據名區遍寰宇。其徒素爲儒所擯。以此方之反多愧。愛禮思存告朔羊。况此實作匪文具。人云趙侯意頗深。隱忍調停旋脩舉。昨來風雨破棟脊。方遣圻人補殘敝。予聞此說心稍慰。野人蔬蕨亦羅置。欣然一酌纔舉盃。津夫走報郡侯至。此行隱跡何由聞。遣騎候訪自吾宮。潛來鄙意正爲此。倉率行庖益勞費。整冠出迓見兩蓋。乃知王君亦同御。看羞層疊絲竹繁。避席輒辭懇莫拒。多儀劣薄非所承。樂園觴周日將暮。黃堂吏散君請先。病夫沾醉須少憩。入舟冥色漸微茫。却喜順流還易渡。巖城燈火人已稀。小巷曲折忘歸路。僊宮酣倦成熟寐。曉聞簷聲復如注。昨遊偶逢宵天假。信知行樂皆有數。涉躐差償夙好心。尙有名山敢多慕。齒角盈虧分則然。行李雖淹吾不惡。

次韻答趙太守王推官

詰朝事虔謁。玄居宿齋沐。積霖喜新霽。風日散清燠。蘭撓渡芳洛。半涉見水陸。溪山儼新宇。雷雨荒大麓。皇皇絃誦區。斯文昔炳郁。興廢尙屯疑。使我懷悱悞。近聞牧守賢。經營取乘屋。方舟爲予來。飛蓋遙肅肅。花絮媚晚筵。韶景正柔淑。浴沂諒同情。及茲授春服。令德倡高祠。混珠愧魚目。努力崇脩石。迂踈白巖谷。

天心湖阻泊既濟書事

掛席下長沙。瞬息百餘里。舟人共揚眉。予獨憂其駛。日暮入沅江。抵石舟果圮。補敝詰朝發。衝風遂翻舳。暝泊後江湖。蕭條旁巖壘。月黑波濤聲。蛟鼉互睥睨。翼午風益厲。狼狽收斷汜。天心數里間。三日但遙指。甚雨迅雷電。作勢殊未已。溟溟雲霧中。四望渺涯涘。篙槳不得施。丁夫盡嗟謫。淋漓念同胞。吾寧忍暴使。餽粥且傾囊。苦且吾與爾。衆意在必濟。糧絕亦均死。憑陵向高浪。吾亦詎容止。虎怒安可撓。志同稍足倚。且令並岸行。試涉湖濱泚。收舵幸無事。風雨亦浸弛。遂巡緣泚涓。迤邐就風勢。新漲翼回湍。倏忽逝如矢。夜入武陽江。漁村穩堪艤。糴市謀晚炊。且爲衆人喜。江醪信滴濁。聊復盪胸臆。濟險在需時。微倖豈常理。爾輩勿輕生。偶然非可恃。

去婦嘆五首（楚人有問於新娶而去其婦者。其婦無所歸。去之山間獨居。懷綵不忘。終無他適。予聞其事而悲之。爲作去婦嘆。）

委身奉箕箒。中道成棄捐。蒼蠅問白壁。君心亦何愆。獨嗟貧家女。素質難爲妍。命薄良自喟。敢忘君子賢。春華不再豔。顏魄無重圓。新歡莫終恃。令儀慎周還。

依違出門去。欲行復遲遲。鄰嫗盡出列。強語含辛悲。陋質容有繆。放逐理則宜。姑老籍相慰。缺乏多所資。妾行長已矣。曾面當無時。

妾命如草芥。若身比琅玕。奈何以妾故。廢食懷憤冤。無爲傷姑意。燕爾且爲歡。中厨存宿旨。爲姑備朝飧。畜育意千緒。倉卒徒悲酸。伊邇望門屏。盡從新人言。夫意已如此。妾還當誰顏。

去矣勿復道。已去還躊躇。鷄鳴尙聞響。大戀猶相隨。感此摧肝肺。淚下不可揮。岡回行漸遠。日落羣鳥飛。羣鳥各有托。孤妾去何之。

空谷多淒風。樹木何蕭森。浣衣澗冰合。採苔山雪深。離居寄巖穴。憂思托鳴琴。朝彈別鶴操。暮彈孤鴻吟。彈苦思

彌切。巘隔雲岑。君聽甚明哲。何因聞此音。

羅舊驛

客行日日萬峯頭。山水南來亦勝游。市谷鳥啼村雨暗。刺桐花暝石溪幽。蠻烟喜過青楊瘴。鄉思愁經芳杜洲。身在夜郎家萬里。五雲天北是神州。

沅水驛

辰陽南望接沅州。碧樹林中古驛樓。遠客日憐風土異。空山惟見瘴雲浮。耶溪有信從誰問。楚水無情只自流。却幸此身如野鶴。人間隨地可淹留。

鐘鼓洞

見說水南多異迹。巖頭時有鼓鐘聲。空遺石壁千年在。未信金砂九轉成。遠地星辰瞻北極。春山明月坐更深。來年夷險還忘却。始信羊腸路亦平。

平溪館次王文濟韻

山城寥落閉黃昏。燈火人家隔水村。清世獨便吾職易。窮途還賴此心存。蠻煙瘴霧承相往。翠壁丹崖好共論。畎畝投閑終有日。小臣何以答君恩。

清平衛卽事

積雨山途喜乍晴。煖雲浮動水花明。故園日與青春遠。敵艦涼思白苧輕。烟際卉衣窺絕棧。一時土苗方仇殺。峯頭戍角隱孤城。華夷節制嚴冠履。漫說殊方列省卿。

興隆衛書壁

山城高下見樓臺。野戍參差暮角催。貴竹路從峯頂入。夜郎人自日邊來。鶯花夾道驚春老。雉堞連雲向晚開。尺

素屨題還屨。擲南那有雁飛回。

七盤

鳥道縈紆下七盤。古藤蒼木峽聲寒。境多奇絕非吾土。時可淹留是謫官。猶記邊峯傳羽檄。近聞苗俗化衣冠。投簪實有居夷志。垂白難承菽水懽。

初至龍場無所止結草菴居之

草菴不及肩。旅倦體方適。開棘自成籬。土階漫無級。迎風亦滿疎。漏雨易補緝。靈瀨響朝湍。深林凝暮色。羣獠環聚訊。語龐意頗質。鹿豕且同遊。玆類猶人屬。污樽映瓦豆。盡醉不知夕。緬懷黃唐化。略稱茅茨迹。

始得東洞遂改爲陽明小洞天三首

古洞闕荒僻。虛設疑相待。披萊歷風磴。移居快幽埲。營炊就巖竇。放榻依石壘。穹窒旅薰塞。夷坎仍灑掃。卷帙湯堆列。樽壺動光彩。夷居信何陋。恬淡意方在。豈不桑梓懷。素位聊無悔。

童僕自相語。洞居頗不惡。人力免結構。天功謝雕鑿。清泉健廚落。翠霧還成幕。我輩日嬉偃。主人自愉樂。雖無檠戟榮。且遠塵囂聒。但恐霜雪凝。雲深衣絮薄。

我聞筦爾笑。周慮愧爾言。上古處巢窟。杯飲皆汗樽。沍極陽內伏。石穴多冬暄。豹隱文始澤。龍蟄身乃存。豈無數尺椽。輕裘吾不溫。邈矣箠瓢子。此心期與論。

謫居糧絕論學于農將田南山永言寄懷

謫居屢在陳。從者有慍見。山荒聊可田。錢鏹還易辦。夷俗多火耕。做習亦頗便。及茲春未深。數畝猶足佃。豈徒實口腹。且以理荒宴。遺穗及鳥雀。貧寡發餘羨。出來在明晨。山寒易霜散。

觀稼

下田既宜稼。高田亦宜稷。種蔬須土疏。種蒔須土濕。寒多不實秀。暑多有螟螣。去草不厭頻。耘禾不厭密。物理既可玩。化機還默識。即是參贊功。毋爲輕稼穡。

採蕨

採蕨西山下。扳援陟崔嵬。遊子望鄉國。淚下心如摧。浮雲塞長空。頽陽不可回。南歸斷舟楫。北望多風埃。已矣供子職。勿更貽親哀。

猗猗

猗猗澗邊竹。青青巖畔松。直幹歷冰雪。密葉留清風。白期永相托。雲壑無違踪。如何兩分植。憔悴嘆西東。人事多翻覆。有如道上蓬。惟應歲寒意。隨處還當同。

南溟

南溟有瑞鳥。東海有靈禽。飛遊集上苑。結侶珍樹林。願言飾羽儀。供舞簫韶音。風雲忽中變。一失難相尋。瑞鳥既遭廢。靈禽投荒岑。天衢雨雪積。江漢虞羅侵。哀哀鳴索侶。病翼飛未任。羣鳥亦千百。誰當會其心。南嶽有竹實。丹溜青松陰。何時共棲息。永托雲泉深。

溪水

溪石何落落。溪水何泠泠。坐石弄溪水。欣然濯我纓。溪水清見底。照我白髮上。年華若流水。一去無回停。悠悠百年內。吾道終何成。

龍岡新構

諸夷以予穴居頗陰濕。請構小廬。欣然趨事。不月而成。諸生聞之。亦皆來集。請名龍岡書院。其軒

曰何陋

謫居聊假息。荒穢亦須治。弊蠟薤林條。小構自成趣。開牕入遠峯。架屏深出樹。墟寨俯逶迤。竹木互蒙翳。畦蔬稍
溉鋤。花藥頗雜蒔。宴適豈專子。來者得同憇。輪奐非致美。毋令易傾蔽。

營茅乘田隙。洽旬始苟完。初心待風雨。落成還美觀。鋤荒既開徑。拓樊亦理園。低簷避松偃。踈土行竹根。勿翦牆
下棘。東列因可藩。莫插林間羅。蒙籠覆雲軒。素缺農圃學。因茲得深論。毋爲輕鄙事。吾道固斯存。

諸生來

簡滯動罹咎。廢幽得幸免。夷居雖異俗。野朴意所眷。思親獨疚心。疾憂庸自遣。門生頗羣集。樽俎亦時展。講習性
所樂。記問復懷視。林行或沿澗。洞遊還陟巘。月榭坐鳴琴。雲牕臥披卷。澹泊生道真。曠達匪荒宴。豈必鹿門栖。自
得乃高踐。

西園

方園不盈畝。蔬卉頗成列。分溪免壅灌。補籬防豕躡。蕪草稍焚薙。清雨夜來歇。濯濯新葉敷。熒熒夜花發。放鋤息
重陰。舊書漫披閱。倦枕竹下石。醒望松間月。起來步閑謠。晚酌簷下設。盡醉卽草鋪。忘與鄰翁別。

水濱洞

送遠憩岵谷。濯纓俯清流。沿溪涉危石。曲洞藏深幽。花靜馥常闕。溜暗光亦浮。平生泉石好。所遇成淹留。好鳥忽
雙下。儻魚亦羣遊。坐久塵慮息。澹然與道謀。

山石

山石猶有理。山木猶有枝。人生非木石。別久寧無思。愁來步前庭。仰視行雲馳。行雲隨長風。飄飄去何之。行雲有
時定。遊子無還期。高梁始歸燕。題鳩已先悲。有生豈不苦。逝者長若斯。已矣復何事。商山行采芝。

無寐二首

烟燈暖無寐。覺思坐長往。寒風振喬林。葉落聞牆響。起窺庭月光。山空遊罔象。懷人阻積雪。崖冰幾千丈。
其二
窮厓多雜樹。上與清宴連。穿雲下飛瀑。誰能識其源。但聞清猿嘯。時見皓鶴翻。中有避世士。宴寂栖其巔。繫予亦
同調。路絕難攀緣。

諸生夜坐

謫居澹虛寂。眇然懷同遊。祇入山氣夕。孤亭俯平疇。草際見數騎。取徑如相求。漸近識顏面。隔樹停鳴驄。投樽鴈
鷺進。攜榼各有羞。分席夜堂坐。絳藟清樽桴。鳴琴復散帙。壺矢交觥籌。夜弄溪上月。曉陟林丘間。村翁或招飲。洞
客偕探幽。講習有真樂。談笑無俗流。緬懷風沂興。千載相爲謀。

艾草次胡少叅韻

艾草莫艾蘭。蘭有芬荒姿。况生幽谷底。不礙君稻畦。艾之亦何益。徒令香氣衰。荆棘生滿道。出刺傷人肌。持刀忌
觸手。睨視不敢揮。艾草須艾棘。勿爲棘所欺。

鳳雛次韻答胡少叅

鳳雛生高厓。風雨摧其翼。養疴深林中。百鳥驚辟易。虞人視爲妖。舉網爭彈弋。此本王者瑞。惜哉誰能識。吾方哀
其窮。胡忍復相亟。鷗鼻據叢林。驅鳥恣搏食。嗟爾獨何心。梟鳳如白黑。

鸚鵡和胡韻

鸚鵡生隴西。羣飛恣鳴遊。何意虞羅及。充直來中州。金縷繫華屋。雲泉謝林丘。能言實階禍。吞聲亦何求。主人有
隱寇。竊發聞其謀。感君惠養德。一語思所酬。懼君不見察。殺身反爲尤。

諸生

人生多離別。往會難再遇。如何百里來。三宿便辭去。有琴不肯彈。有酒不肯御。遠陟見深情。寧予有弗顧。洞雲還自栖。溪月誰同步。不念南寺時。寒江雪將暮。不記西園日。桃花夾川路。相去倏幾月。秋風落高樹。富貴猶塵沙。浮名亦飛絮。嗟我二三子。吾道有真趣。胡不攜書來。茆堂好同住。

遊來僊洞早發道中

霜風清木葉。秋意生蕭疎。衝星策曉騎。幽事將有徂。股蟲亂飛擲。道狹草露濡。傾暑特晨發。征夫已先途。浙米石間溜。炊火巖中廬。烟峯上初日。林鳥相嚶呼。意欣物情適。戰勝耀色腴。行樂信宇宙。富貴非吾圖。

別友

幽尋意方結。奈此世累牽。凌晨驅馬別。持盃且爲傳。相求苦非遠。山路多風烟。所貴明哲士。秉道非苟全。去矣崇令德。吾亦行歸田。

贈黃太守澍

歲宴鄉思切。客久親舊疎。臥疴閉空院。忽來故人車。入門辯眉宇。喜定還驚吁。遠行亦安適。符竹膺新除。荒郡號難理。况茲征索餘。君才素通敏。窘劇宜有紓。蠻鄉雖瘴毒。逐客猶安居。經濟非復事。時還理殘書。山泉足遊憩。鹿麕能友予。澹然穹壤內。容膝皆吾廬。惟縈垂白念。旦夕懷歸圖。君行勉三事。吾計終五湖。

寄友用韻

懷人坐沉夜。帷燈嚶幽光。耿耿積煩緒。忽忽如有忘。玄景逝不處。朱災化微涼。相彼谷中菊。重陰殞衰黃。感此遊客子。經年未還鄉。伊人不在目。絲竹徒滿堂。天深雁書杳。夢短關塞長。情好矢無斃。願言覲終償。惠我金石編。徽音激宮商。馳輝不可卽。式爾增子傷。馨香襲肝膺。聊用中心藏。

秋夜

樹暝栖翼噴。螢飛夜堂靜。遙穹出晴月。低簷入峯影。窅然坐幽獨。恍爾抱深警。年徂道無聞。心遠跡未屏。蕭瑟中林秋。雪凝松桂冷。山泉豈無適。離人懷故境。安得駕雲鴻。高飛越南景。

採薪二首

朝溪山上荆。暮採谷中栗。深谷多淒風。霜露霑衣濕。採薪勿辭辛。昨來斷薪拾。晚歸陰壑底。抱甕還自汲。薪水良獨勞。不愧食吾力。

倚擔青厓際。歷斧厓下石。持斧起環顧。長松百餘尺。徘徊不忍揮。俯略澗邊棘。同行笑吾餒。爾斧安用歷。快意豈不能。物材各有適。可以相天子。衆穉詎足識。

龍岡謾興五首

投荒萬里入炎州。却喜官卑得自由。心在夷居何有陋。身雖吏隱未忘憂。春山卉服時相問。雪塞藍輿每獨遊。擬把犁鋤從許子。願將絃誦止言游。

斯況蕭條寄草堂。虛簷落日自生涼。芳春已共烟花盡。孟夏俄驚章木長。絕壁千尋凌杳靄。深厓六月宿冰霜。人間不有宣尼叟。誰信中棘未是剛。

路僻官卑病益閑。空林惟聽鳥聞關。地無醫藥憑書卷。身處蠻夷亦故山。用世謾懷伊尹恥。思家獨切老萊斑。夢魂兼喜無餘事。只在耶溪舜水灣。

臥龍一去望消息。千古龍岡漫有名。草屋何人方管樂。桑間無耳聽咸英。江沙漠漠遺雲鳥。草滿蕭蕭動甲兵。好共鹿門龐處事。相期採藥入青冥。

歸與吾道在滄浪。顏氏何曾擊柝忙。枉尺已非賢者事。斲輪徒有古人方。白雲晚憶歸岩洞。蒼蘚春應遍石床。寄語峯頭雙白鶴。野夫終不久龍場。

客毛拙菴見招書院

野夫病臥成疎懶。書卷長拋舊學荒。豈有威儀堪法象。實慚文檄過稱揚。移居正擬投醫肆。虛席仍煩避講堂。範我定應無所獲。空令多士笑王良。

老檜

老檜斜生古驛傍。客來繫馬解衣裳。托根非所還憐汝。直幹不撓終異常。風雪凜然存節概。刮摩聊爾見文章。何當移植山林下。偃蹇從渠拂漢蒼。

却巫

臥病空山無藥石。相傳土俗事神巫。吾行久矣將焉禱。衆義紛然反見迂。積習片言容未解。輿情三月或應孚。也知伯有能爲厲。自笑孫僑非丈夫。

過天生橋

水光如練落長松。雲際天橋隱白虹。遼鶴不來華表爛。僊人一去石橋空。徒聞鵠駕橫秋夕。謾說秦鞭到海東。移放長江還濟險。可憐虛却萬山中。

南霽雲祠

死矣中丞莫謾疑。孤城援絕久知危。賀蘭未滅空遺恨。南八如生定有爲。風雨長廊嘶鐵馬。松杉陰霧捲靈旗。英魂千載知何處。歲歲邊人賽旅祠。

春晴

林下春晴風漸和。高巖殘雪已無多。遊絲冉冉花枝靜。青壁迢迢白鳥過。忽向山中懷舊侶。幾從洞口夢煙蘿。客衣塵土終須換。好與湖邊長芰荷。

陸廣曉發

初日曛曛似曉霞。雨痕新霽渡頭沙。溪深幾曲雲藏峽。樹老千年雪作花。白鳥去邊回驛路。青崖缺處見人家。遍行奇勝才經此。江上無勞羨九華。

雪夜

天涯久客歲侵尋。茆屋新開楓樹林。漸慣省言因病齒。屢經多難解安心。猶憐未繫蒼生望。且得閒爲白石吟。乘興最堪風雪夜。小舟何日返山陰。

元夕二首

故園今夕是元宵。獨向蠻村坐寂寥。賴有遺經堪作伴。喜無車馬過相邀。春還草閣梅先動。月蒙虛庭雪未消。堂上花燈諸弟集。重闌應念一身遙。

去年今日臥燕臺。銅鼓中宵隱地雷。月傍苑樓燈彩淡。風傳閣道馬蹄迴。炎荒萬里頻回首。羌笛三更謾自哀。尙憶先朝多樂事。孝皇曾爲兩宮開。

家僮作紙燈

寥落荒村燈事賒。蠻奴試巧剪春紗。花枝綽約含輕霧。月色玲瓏映綺霞。取辦不徒酬令節。賞心兼是惜年華。何如京國王侯第。一盞中人產十家。

白雲堂

白雲僧舍市橋東。別院迴廊小徑通。歲古籐松存獨幹。春還庭竹發新叢。晴牕暗映羣峯雪。清梵長飄高閣風。遷客從來甘寂寞。青鞋時過月明中。

來僊洞

古洞春寒客到稀。綠苔荒徑草霏霏。書懸絕壁留僧偈。花發厨羅繡佛衣。壺榼遠從童輩集。杖藜隨處宦情微。石門遙鎖陽明鶴。應笑山人久不歸。

木關道中雪

瘦馬支離緣絕壁。連峯窅窅入層雲。山村樹暝驚鴉陣。澗道雪深逢鹿羣。凍自衝茅炊火斷。望迷孤戍暮笳聞。正思講席諸賢在。絳蠟清醅坐夜分。

元夕雪用蘇韻二首

林間暮雪定歸鴉。山外鈴聲報使車。玉盞春光傳柏葉。夜堂銀燭亂簷花。蕭條音信愁邊鴈。迢遞關河夢裏家。何日扁舟還舊隱。一簑江上把魚叉。
寒威入夜益廉纖。酒甕爐牀亦戒嚴。久客漸憐衣有結。蠻居長嘆食無鹽。飢豺正爾羣當路。凍雀從渠自宿簷。陰極陽回知不遠。蘭芽行見發春尖。

曉霽用前韻書懷二首

雙闕鐘聲起萬鴉。禁城月色滿朝車。竟誰詩詠東曹掾。正憶梅開西寺花。此日天涯傷俗客。何年江上却還家。曾無一字堪驅使。覆有虛名擬八叉。
澗草巖花欲鬪纖。溪風林雪故爭嚴。連岐盡說還宜麥。煮海何曾見作鹽。路斷慙憐無過客。病餘兼喜曝晴簷。謫居亦自多清絕。門外羣峯玉笋尖。

次韻陸僉憲元日喜晴

城裏夕陽城外雪。相將十里異陰晴。也知造物曾何意。底是人心苦未平。柏府樓臺啣倒影。茆茨松竹瀉寒聲。布裘莫覆愁僵臥。積素還多達曙明。

元夕木閣山火

荒村燈夕偶逢晴。野燒峯頭處處明。內苑但知鰲作嶺。九門空說火爲城。天應爲我開奇觀。地有茲山不世情。卻恐炎威被松柏。休教玉石遂同頽。

夜宿汪氏園

小閣藏身一斗方。夜深虛白自生光。梁間來下徐生榻。座上慚無荀令香。驛樹雨聲翻屋瓦。龍池月色浸書牀。他年貴竹傳遺事。應說陽明舊草堂。

春行

冬盡西歸滿山雪。春初復來花滿山。白鷗亂浴清溪上。黃鳥雙飛綠樹間。物色變遷隨轉眼。人生豈得長朱顏。好將吾道從吾黨。歸把漁竿東海灣。

村南

花車紛紛春欲酣。杖藜隨步過村南。田翁開野教新贖。溪女分流浴種蠶。稗犬吠人依密樞。閑鳧照影立晴潭。偶逢江客傳鄉信。歸臥楓堂夢石龕。

山途二首

上山見日下山陰。陰欲開時日欲沉。晚景無多傷遠道。朝陽莫更沮雲岑。人歸暝市分漁火。客舍空林依暮隙。世事驗來還自領。古人先已得吾心。
南北驅馳任板輿。謫鄉何地是安居。家家細雨殘燈後。處處荒原野燒餘。江樹欲迷遊子望。朔雲長斷故人書。茂陵多病終蕭散。何事相如賦子虛。

白雲

白雲冉冉出晴峯。客路無心處處逢。已逐肩輿度青壁。還隨孤鶴下蒼松。此身愧爾長多繫。他日從龍謾托蹤。斷
鷺殘鴉飛欲盡。故山回首意重重。

答劉美之見寄次韻

休疑遷客迹全貧。猶有沙鷗日見親。勳業已辭滄海夢。煙花多負故園春。百年長恐終無補。萬里寧期尙得身。念
我不勞傷鬢雪。知君亦欲拂衣塵。

寄徐掌教

徐穉今安在。空梁榻久懸。北門傾蓋日。東魯校文年。歲月成超忽。風雲易變遷。新詩勞寄我。不愧鳥鳴篇。

書庭蕉

簷前蕉葉綠成林。長夏全無暑氣侵。但得雨聲連夜靜。不妨月色半牀陰。新詩舊葉題將滿。老菱疏梧根共深。莫
笑鄭人談認鹿。至今醒夢兩難尋。

送張憲左遷滇南大叅次韻

世味知公最飽諳。百年清德亦何慚。柏臺藩省官非左。江漢滇池道益南。絕域煙草憐我遠。今宵風月好誰談。交
遊若問居夷事。爲說山泉頗自堪。

南菴次韻二首

隔水樵漁亦幾家。綠岡石路入溪斜。松林晚映千峯雨。楓葉秋連萬樹霞。漸覺形骸逃物外。未妨遊樂在天涯。頻
來不用勞僧榻。已僭汀鷗一度沙。
斜日江波動客衣。水南深竹見巖扉。漁人收網舟初集。野老忘機坐未歸。漸覺雲間栖翼亂。愁看天北暮雲飛。年
年歲晚長爲客。閒殺西湖舊釣磯。

觀傀儡次韻

處處相逢是戲場。何須傀儡夜登堂。繁華過眼三更促。名利牽人一線長。穗子自應爭詫說。矮人亦復浪悲傷。本來面目還誰識。且向樽前學楚狂。

徐都憲同遊南菴次韻

巖寺藏春長不夏。江花映日豔於桃。山陰入戶川光暮。林影浮空暑氣高。樹老豈能知歲月。溪清真可鑑秋毫。但逢佳境須行樂。莫遣風霜著鬢毛。

卽席次王文濟少恭韻二首

搖落休教感客途。南來秋興未全孤。肝腸已自成金石。齒髮從渠變柳蒲。傾倒酒懷金谷罰。逼真詞格輞川圖。謫鄉莫道貧消骨。猶有新詩了舊逋。此身未擬泣窮途。隨處翻飛野鶴孤。霜冷幾枝存晚菊。溪春兩度見新蒲。荆西寇盜紆籌策。湘北流移入畫圖。莫怪當筵倍凄切。誅求滿地促官逋。

贈劉侍御二首

蹇以反身。困以遂志。今日患難。正閣下受用處也。知之。則處此當自別。病筆不能多及。然其餘亦無足言者。聊次韻。某頓首。劉侍御大人契長。

相送溪橋未隔年。相逢又過小春天。髮時敢負君臣義。念別羞爲兒女憐。道自升沉寧有定。心存氣節不無偏。知君已得虛舟意。隨處風波只晏然。

夜寒

簷際重陰覆夜寒。石松爐火坐更殘。窮荒正訝鄉書絕。險路仍愁歸夢難。僊侶春風懷越嶠。釣船明月負嚴灘。未

因譎宦傷憔悴。客髮遠羞鏡裏看。

冬至

客牀無寐聽潛雷。珍重初陽夜半回。天地未嘗生意息。冰霜不耐鬢毛催。春添衰線誰能補。歲晚心丹自動灰。料得重闌強健在。早看消息報臆梅。

春日花間偶集示門生

閒來聊與二三子。單夾初成行暮春。改課講題非我事。研幾悟道是何人。階前細草雨還碧。簷下小桃晴更新。坐起咏歌俱實學。毫釐須遣認教真。

次韻送陸文順僉憲

貴陽東望楚山平。無奈天涯又送行。杯酒豫期傾蓋日。封書煩慰倚門情。心馳魏闕星辰迥。路遠鄉山草木榮。京國交游零落盡。空將秋月寄猿聲。

次韻陸僉憲病起見寄

一賦歸來不願餘。文園多病滯相如。籬邊竹笋青應滿。洞口桃花紅自舒。荷蕢有心還擊磬。徐公無夢欲刪書。雲間憲伯能相慰。尺素長題問謫居。

次韻胡少叅見過

旋營小酌典春裘。佳客真慚竟日留。長怪嶺雲迷楚望。忽聞吳語破鄉愁。錢湖白苦堪歸老。杞國何人獨抱憂。訝聽花倍惆悵。賞心原不在枝頭。

雪中桃次韻

雪裏桃花強自春。蕭深修覺損精神。却漸幽竹節逾勁。始信寒梅肯自真。遭際本非甘冷淡。飄零須信委風塵。從

來此事還希闊。莫恠臨軒賞更新。

舟中除夕二首

扁舟除夕尚窮途。荆楚還憐俗未殊。處處送神懸楮馬。家家迎歲換桃符。江醪信薄聊相慰。世路多岐讓自吁。白髮頻年傷遠別。綵衣何日是庭趨。

遠客天涯又歲除。孤航隨處亦吾廬。也知世上風波滿。還戀山中木石居。事業無心從齒髮。親交多難絕音書。江湖未就新春計。夜半樵歌忽起予。

淑浦山夜泊

淑浦山邊泊。雲間見驛樓。灘聲迴遠樹。崖影落中流。柳放新年綠。人歸隔歲舟。客途時極目。天北暮陰愁。

遇江門巖

三年譴宦沮鬱氛。天放扁舟下楚雲。歸信應先春鴈到。閒心期與白鷗羣。晴溪欲轉新年色。蒼壁多遺古篆文。此地從來山水勝。它時回首憶江門。

辰州虎溪龍興寺聞楊名父將到留韻壁間

杖藜一過虎溪頭。何處僧房是惠休。雲起峯頭沉閣影。林疎地底見江流。煙花日煖猶含雨。鷗鷺春閒欲滿洲。好景同來不同賞。詩篇還爲故人留。

武陵湖音閣懷元明

高閣憑虛臺上尋。捲簾疎雨動微吟。江天雲鳥自來去。楚澤風煙無古今。山色漸疑衡嶽近。花源欲問武陵深。新春尚沮東歸楫。落日誰堪話此心。

關中坐雨

臺下春雲及寺門。懶夫睡起正開軒。烟蕪漲野平堤綠。江雨隨風入夜喧。道意蕭疎慚歲月。歸心迢遞憶鄉園。年來身迹如漂梗。自笑迂癡欲手援。

霧夜

雨霽僧堂鐘磬清。春國月色特分明。沙邊宿鷺寒無影。洞口流雲夜有聲。靜後始知羣動妄。閑來還覺道心驚。問津久已慚沮溺。歸向東臯學耦耕。

僧齋

盡日僧齋不厭閒。獨餘春睡得相關。簷前水漲途無地。江外雲晴忽有山。遠客趁墟招渡急。舟人曬網得魚還。也知世事終無補。亦復心存出處間。

德山寺次壁間韻

乘輿看山薄暮來。山僧迎客寺門開。雨昏碧草春申暮。雲捲青峯善卷臺。性愛煙霞終是僻。詩留名姓不須猜。岩根老衲成灰色。枯坐何年解結胎。

沅江晚泊二首

去時煙雨沅江暮。此日沅江暮雨歸。水漫遠沙村市改。泊依舊店主人非。草深麻宇無官住。花落僧房自鳥啼。處處春光蕭索甚。正思荆棘掩巖扉。

春來客思獨蕭條。處處東田沒野蒿。雷雨滿江喧日夜。扁舟經月住風濤。流民失業乘時橫。原獸爭羣薄暮號。却憶鹿門栖隱地。杖藜壺榼餉東臯。

夜泊江思湖憶元明

扁舟泊近漁家晚。茅屋深環柳港清。雷雨驟開江霧散。星河不動暮川平。夢回客枕人千里。月上春堤夜四更。欲

寄愁心無過鴈。披衣坐聽野鷄鳴。

睡起寫懷

江日熙熙春睡醒。江雲飛盡楚山青。閑觀氣態皆生意。靜悟天機入窅冥。道在險夷隨地樂。心忘魚鳥自流形。未須更覓羲唐事。一曲滄浪擊壤聽。

三山晚眺

南望長沙杳縹中。鵝羊只在暮雲東。天高雙檣哀明月。江闊千帆舞逆風。花暗漸驚春事晚。水流應與客愁窮。北飛亦有衡陽鴈。上苑封書未易通。

鵝羊山

福地相傳楚水阿。三年春色兩經過。羊亡但有初平石。書罷誰籠道士鵝。禮斗壇空松影靜。步虛臺迥月明多。巖房一宿猶緣薄。遙憶開雲住薜蘿。

泗洲寺

淥水西頭泗洲寺。經過轉眼又三年。老僧熟認直呼姓。笑我清癯只似前。每有客來看宿處。詩留佛壁作燈傳。開軒掃榻還相慰。慚愧維摩世外緣。

再經武雲觀書林玉璣道士壁

碧山道士曾相約。歸路還來宿武雲。月滿樓臺依鶴侶。書留蒼壁看鵝羣。春巖多雨林芳淡。暗水穿花石溜分。奔走連年家尚遠。空勞魂夢到柴門。

再過濂溪祠用前韻

曾向圖書識面真。半生長自愧儒巾。斯文久已無先覺。聖世今應有逸民。一自支離乖學術。競將雕刻費精神。瞻

依多少高山意。水漫蓮池長綠蘋。

卷二十

外集二 詩（廬陵詩六首）

遊瑞華二首

簿領終年未出郊。此行聊解俗人嘲。憂時有志懷先達。作縣無能愧舊交。松古尙存經雪幹。竹高還長拂雲梢。溪山處處堪行樂。正是浮名未易拋。

其二

萬死投荒不擬回。生還且復荷栽培。逢時已負三年學。治劇兼非百里才。身可益民寧論屈。志存經國未全灰。正愁不是中流砥。千尺狂瀾豈易摧。

古道

古道當長坂。肩輿入暮天。蒼茫聞驛鼓。冷落見炊烟。凍燭寒無焰。泥爐濕未燃。正思江檻外。閑却釣魚船。

立春日道中短述

臘意中宵盡。春容傍曉生。野塘冰轉綠。江寺雪消晴。農事沾泥犢。羈懷聽谷鶯。故山梅正發。誰寄欲歸情。

公館午飯偶書

行臺依獨寺。僧屋自成鄰。殿古凝殘雪。牆低入早春。巷泥晴淖馬。簷日暖堪人。雪散小岩碧。松梢桂月新。

午憩香社寺

脩程動百里。往往餉僧居。佛鼓迎官急。床禪爲客虛。桃花成井落。雲水接郊墟。不覺泥塗澀。看山興有餘。

京師詩二十四首（正德庚午年十月。陞南京刑部主事。辛未年入覲。調北京吏部主事作。）

夜宿功德寺次宗賢韻二絕

山行初試夾衣輕。脚軟黃塵石路生。一夜洞雲眠未足。湖風吹月渡溪清。
水邊楊柳覆茅楹。飲馬春流更一登。坐久遂忘歸路夕。溪雲正瀉暮山青。

別方叔賢四首

西樵山色遠依依。東指江門石路微。料得楚雲臺上客。久懸秋月待君歸。
自是孤雲天際浮。篋中枯蠹豈相謀。請君靜後看羲畫。曾有陳篇一字否。
休論寂寂與惺惺。不安由來卽性情。笑却慙慙諸老子。翻從知見覓虛靈。
道本無爲只在人。自行自住豈須鄰。坐中便是天台路。不用漁郎更問津。

白灣六章

宗巖文先生居白浦之灣。四方學者稱曰白浦先生。而不敢以姓字。某素高先生。又辱爲之僚。因爲書白灣二字。并詩以詠之。

浦之灣。其白漫漫。彼美君子。在水之盤。

灣之浦。其白瀾瀾。彼美君子。在水之涘。

雲之溶溶。于灣之淵。君子于處。民以爲期。

雲之油油。于灣之委。君子于興。施及四海。

白灣之渚。于遊以處。彼美君子兮。可以容與。

白灣之洋。于濯以湘。彼美君子兮。可以徜徉。

寄隱巖

每逢水山地。便有卜居心。終歲風塵裏。何年滄海濔。洞寒泉滴細。花暄石房深。青壁須留姓。他時好共尋。

香山次韻

尋山到山寺。得意却忘山。巖樹坐來靜。壁蘿春自閑。樓臺星斗上。鐘磬翠微間。頓息塵寰念。清溪踏月還。

夜宿香山林宗師房次韻

幽壑來尋物外情。石門遙指白雲生。林間伐木時聞響。谷口逢僧不記名。天壁倒涵湖月曉。烟梯高接緯堦平。松堂靜夜渾無寐。到枕風泉處處聲。

久落泥途惹世情。紫崖丹壑是平生。養真無力常懷靜。竊祿未歸羞問名。樹隱洞泉穿石細。雲迴溪路入花平。道人只住層蘿上。明月峯頭有磬聲。

別湛甘泉二首

行子朝欲發。驅車不得留。驅車下長坂。顧見城東樓。遠別情已慘。况此艱難秋。分手訣河梁。涕下不可收。車行望漸杳。飛埃越層丘。遲回岐路側。孰知我心憂。

兵二

我心憂以傷。昔去阻且長。一別豈得已。母老思所將。奉命危難際。流俗反猜量。黃鶴萬里逝。豈伊爲稻粱。棟火及羽毛。燕雀猶棲堂。跳梁多不測。君行戒前途。達命諒何滯。將母能忘虞。安居尤穿窬。關路非鼓輓。合德崇易簡。可以知險阻。結菑湖水陰。幽期終不忘。伊爾得相就。我心亦何傷。世艱變倏忽。人命非可常。斯文天未墜。別短會日長。南寺春月夜。風泉聞竹房。逢僧或停轍。先掃白雲床。

贈別黃宗賢

古人戒從惡。今人戒從善。從惡乃同污。從善翻滋怨。紛紛嫉媚與。指謫相非訕。自非篤信士。依違多背面。寧知竟漂流。淪胥亦污賤。卓哉汪陂子。奮身勇厥踐。拂衣還舊山。霧隱期豹變。嗟嗟吾黨賢。白黑匪難辯。歸越詩五首（正德壬申年。陞南京太僕寺少卿。使道歸越作。）

四明觀白水二首

邑南富巖壑。白水尤奇觀。興來每思往。十年就茲觀。停驂指絕壁。涉澗緣危蟠。百源旱方歇。雲際猶飛湍。霏霏灑林薄。漠漠凝風寒。前聞若未愜。仰視終莫攀。石陰暑氣薄。流觸迴迴瀾。茲遊詎盤樂。養靜意所關。逝者諒如斯。哀此歲月殘。擇幽雖得所。避時時猶難。劉樊古方外。感慨有餘嘆。

千丈飛流舞白鸞。碧潭倒影鏡中石。藤蘿半壁雲烟濕。殿角長年風雨寒。野性從來山水癖。直躬更覺世途難。卜居漸擬如周叔。高臥無勞比謝安。

枝錫道中用張憲使韻

山鳥權呼欲問名。山花含笑似相迎。風迴碧樹秋聲早。雨過丹巖夕照明。雪嶺插天開玉帳。雲溪環碧抱金城。懸燈夜宿茅堂靜。洞鶴林僧相對清。

又用曰仁韻

每逢佳處問山名。風景依稀過眼生。歸霧忽連千嶂暝。夕陽偏放一溪晴。晚投巖寺依雲宿。靜愛楓林送雨聲。夜久披衣還起坐。不禁風月照人清。

書杖錫寺

杖錫青冥端。澗壁環天險。垂巖下陡壑。涉水攀絕巘。溪深聽喧瀑。路絕駭危機。捫蘿登峻極。披翳見平行。僧逋寄孤衲。守慶遺荒殿。傷茲窮墟僻。曾未誅求免。探幽冀累息。憤時翻意慘。拯援才已疎。栖遲心益眷。哀猿嘯春嶂。懸

燈宿西龕。誅茆竟何時。白雲愧舒卷。

滁州詩三十六首（正德癸酉年到太僕寺作）

梧桐江用韻

鳳鳥久不至。梧桐生高岡。我來竟日坐。清陰灑衣裳。援琴俯流水。調短意苦長。遺音滿空谷。隨風遞悠揚。人生貴自得。外慕非所臧。顏子豈忘世。仲尼固遑遑。已矣復何事。吾道歸滄浪。

林間睡起

林間盡日掃花眠。祇是官閑媿俸錢。門徑不妨春草合。齋居長對晚山妍。每疑方朔非真隱。始信揚雄誤太玄。混世亦能隨地得。野情終是愛丘園。

贈熊彰歸

門徑荒涼蔓草生。相永深媿遠來情。千年絕學蒙塵上。何處澄江無月明。坐石遠山凝暮色。忽驚慶葉起秋聲。歸途望巖多幽興。爲問山田待耦耕。

別易仲

辰州劉易仲從子滌陽。一日問道可言乎。子曰。啜子喫苦瓜。與你說不得。爾要知我苦。還須你自喫。易仲省然有悟。久之辭歸。別以詩。

迢遞滁山春。子行亦何遠。雖然良苦心。惆恍不遑飯。至道不外得。一悟失羣鬧。秋風洞庭波。遊子已歸晚。結蘭意方勤。寸草心先斷。未學久世離。頽波竟誰挽。歸哉念流光。一逝不復返。

送守中至龍盤山中

未盡師生六日情。天教風雪阻西行。茅堂豈有春風坐。江郭虛留一月程。客邸琴書燈火靜。故園風竹夢魂清。何

年穩閑陽明洞。搭樓山爐。養石羹。

龍蟠山中用韻

無奈青山處處情。村沽日日辨山行。真慚廩食虛官守。只把山遊作課程。谷口亂雲隨騎遠。林間飛雪點衣輕。長思澹泊還真性。世味年來久絮羹。

瑯琊山中三首

草堂寄放瑯琊間。溪鹿巖僧且共閒。冰雪能回草木死。春風不化石頑頑。六經散地莫收拾。叢棘披道誰刊刪。已矣驅馳二子子。鳳圖不出吾將還。廷歌莫笑酒盃增。異境人間得未曾。絕壁倒翻銀海浪。遠山真作玉龍騰。浮雲野思春前動。虛室清香靜後凝。懶拙惟餘林壑計。伏檀長自媿無能。風景山中雪後增。看山雪後亦誰曾。隔溪巖犬迎人吠。飲澗飛猿蹕樹騰。歸騎林間燈火動。鳴鐘谷口暮光凝。塵踪正自縉龍任。一宿雲房尙未能。

答朱汝德用韻

東去蓬瀛合有津。若爲風雨動經旬。同來海岸登舟在。俱是塵寰欲渡人。弱水洪濤非世險。長年三老定誰真。青鸞眇眇無消息。悵望烟花又暮春。

送惟乾二首

獨見長年思避地。相從千里欲移家。慚予豈有萬間庇。借爾剛餘一席沙。古洞幽期攀桂樹。春溪歸路問桃花。故人勞念還相慰。回鴈新秋寄綵霞。

簷笈連年愧遠求。本來無物若爲酬。春城驛路聊相送。夜雪空山且復留。江浦雲開虛嶽曙。洞庭湖闊九疑浮。懸

知再鼓瀟湘柁。應是芙蓉湘水秋。

別希顏二首

中歲幽期亦幾人。是誰長負故山春。道情暗與物情化。世味爭如酒味醇。耶水雲門空舊隱。青鞋布襪定何晨。童心如故容顏改。慚愧年年草木新。後會難期別未輕。莫辭行李滯江城。且留南國春山興。共聽西堂夜雨聲。歸路終知雲外去。晴湖想見鏡中行。爲尋洞裏幽棲處。還有峯頭雙鶴鳴。

山中示諸生五首

路絕春山久廢尋。野人扶病強登臨。同遊仙侶須乘興。共探花源莫厭深。鳴鳥遊絲俱自得。閑雲流水亦何心。從前却恨牽文句。展轉支離嘆陸沉。

其二

滌流亦沂水。童冠得幾人。莫負詠歸興。溪山正暮春。

其三

桃源在何許。西峯最深處。不用問漁人。沿溪踏花去。

其四

池上偶然到。紅花間白花。小亭閒可坐。不必問誰家。

其五

溪邊坐流水。水流心共閒。不知山月上。松影落衣斑。

龍潭夜坐

何處花香入夜清。石林茅屋隔溪聲。幽人月出每孤往。棲鳥山空時一鳴。草露不辭芒屨濕。松風偏與葛衣輕。臨流欲寫猗蘭意。江北江南無限情。

送德觀歸省二首

雪裏閉門十日坐。開門一笑忽青天。茅簷正好負暄日。客子胡爲思故園。椿樹慣經霜雪老。梅花偏向歲寒妍。瑯琊春色如相憶。好放山陰月下船。瑯琊雪是故園雪。故園春亦瑯琊春。天機動處卽生意。世事到頭還俗塵。立雪洛沂傳故事。吟風弄月是何人。到家好謝二三子。莫向長沮錯問津。

送蔡希淵三首

正德癸酉冬。希淵赴南宮試。訪予滁陽。遂留閱歲。旣而東歸。問其故。辭以疾。希淵與予論學瑯琊之間。於斯道旣釋然矣。別之以詩。

風雪蔽曠野。百鳥凍不翻。孤鴻亦何事。嗷嗷迺寒雲。豈伊稻梁計。獨往求其羣。之子眇萬鍾。就我滁水濱。野寺同遊論。春山共攀援。鳥鳴幽谷曙。伐木西澗曛。清夜湛玄思。晴牕玩奇文。寂景賞新悟。微言欣有聞。寥寥絕代下。此意冀可論。

羣鳥暄北林。黃鶴獨南逝。北林豈無枝。羅弋苦難避。之子丹霞姿。辭我雲門去。山空響流泉。路僻迷深樹。長谷何盤紆。紫芝春可茹。求志暫棲巖。避喧寧遯世。繫子犀風塵。送子媿雲霧。匡時已無術。希聖徒有慕。倘入陽明峯。爲尋舊棲處。

何事憧憧南北行。望雲依闕兩關情。風塵暫息滁陽駕。鷗鷺還尋鑑水盟。悟後六經無一字。靜餘孤月滿虛朋。從知歸路多相憶。代木山山春鳥鳴。

贈守中北行二首

江北梅花雪易殘。山牕一樹自家看。臨行撥贈聊數顆。珍重清香是歲寒。來何匆促去何遲。來去何心莫漫疑。不爲高堂雙雪髻。歲寒寧受北風欺。

鄭伯與謝病還鹿門雪夜過別賦贈三首

之子將去遠。雪夜來相尋。秉燭耿無寐。憐此歲寒心。歲寒豈徒爾。何以贈遠行。聖路塞已久。千載無復尋。豈無羣儒迹。蹊徑榛蕪深。涔流須尋源。積土成高岑。攬衣望遠道。請君從此征。涔流須有源。植木須有根。根源未涔植。枝派寧先蕃。謂勝通夕話。義利分毫間。至理匪外得。譬猶鏡本明。外塵蕩瑕垢。鏡體自寂然。孔訓示克己。孟子垂反身。明明賢聖則。請君勿與諉。鹿門在何許。君今鹿門去。千載龐德公。猶存棲隱處。潔身匪亂倫。其次乃避地。世人失其心。顧瞻多外慕。安宅舍弗居。狂馳驚奔駑。高言詆獨善。交非遂巧智。瑣瑣功利儒。寧復知此意。

門人王嘉秀實夫蕭琦子玉告歸書此見別意兼寄聲辰陽諸賢

王生兼養生。蕭生頗慕禪。迢迢數千里。拜我滁山前。吾道既匪佛。吾學亦匪仙。坦然山簡易。日用匪深玄。始聞半疑信。既乃心豁然。譬彼土中鏡。闇闇光內全。外俱去昏翳。精明燭嬾妍。世學如翦綵。粧綴事蔓延。宛宛具枝葉。生理終無緣。所以君子學。布種培根原。萌芽漸舒發。暢茂皆由天。秋風動歸思。共鼓湘江船。湘中富英彥。往往多及門。臨岐綴斯語。因之寄拳拳。

滁陽別諸友

滁陽諸友從遊。送子至烏衣。不能別及暮。王性甫汝德諸友送至江浦。必留居俟子渡江。因書此促之歸。并寄諸賢。庶幾共進此學。以慰離索耳。

滁之水入江流。江湖日復來。滁州相思若潮水。來往何時休。空想思亦何益。欲慰相思情。不如崇令德。掘地見泉。水隨處無弗得。何必驅馳爲千里。遠相卽。君不見堯囊與舜墻。又不見孔與跖。對面不相識。逆旅主人多慇懃。出門轉盼成路人。

寄浮峯詩社

晚涼庭院坐新秋。微月初生亦滿樓。千里故人誰命駕。百年多病有孤舟。風霜草木驚時態。砧杵關河動遠愁。飲水向肱吾自樂。菲堂今在越溪頭。

棲雲樓坐雪二首

纔看庭樹玉森森。忽漫階除已許深。但得諸生通夕坐。不妨老子半酣吟。瓊花入座能欺酒。冰溜垂簷欲墮針。却憶征南諸將上。未禁寒夜鐵衣沉。

此日棲棲樓上雪。不知天意爲誰深。忽然夜半一言覺。又動人間萬古吟。玉樹有花難結果。天機無線可通針。曉來不覺城頭鼓。老懶羲皇睡正沉。

與商貢士二首

見說浮山麓。深林遶石溪。何時拂衣去。三十六巖棲。

其二

見說浮山勝。心與浮山期。三十六巖內。爲選一巖奇。

南都詩四十七首（正德甲戌年四月陸南京鴻臚寺卿作）

題歲寒亭贈汪尙和

一覺紅塵夢欲殘。江城六月滯風湍。人間炎暑無逃處。歸向山中臥歲寒。

與徽州程舉二子

句句糠粃字字陳。卻於何處覓知新。紫陽山下多豪俊。應有吟風弄月人。

山中懶睡四首

竹裏藤床識懶人。脫巾山麓任吾真。病夫已久逃方外。不受人間禮數噴。
掃石焚香任意眠。醒來時有客談玄。松風不用蒲葵扇。坐對青崖百丈泉。
古洞幽深絕世人。石床風細不生塵。日長一覺羲皇睡。又見峯頭上月輪。
人間白日醒猶睡。老子山中睡却醒。醒睡兩非還兩是。溪雲漠漠水冷冷。

題灌山小隱二絕

弗屋山中早晚成。任他風雨任他晴。男婚女嫁多年畢。不待而今學向平。
一自移家入紫煙。深林住久遂忘年。山中莫道無供給。明月清風不用錢。

六月五章

六月乙亥。南都熊峯少宰石公以少宗伯召南都之上聞之。有惻然而戚者。有欣然而喜者。其戚者曰。公端介敏直。方爲留都所倚重。今茲往。善類失所恃。羣小罔以。辨惑考學者曷從而討究。剖政斷疑者曷從而咨決。南都非根本地乎。而獨不可以公遺之。其喜者曰。公之端介敏直。寧獨留都所倚重。其在京師獨無善類乎。獨無羣小乎。獨無辨惑考學剖政斷疑者乎。且天子之召之也。亦寧已少宗伯。將必大用。大用則以庇天下。斯堯征之慶也。公聞之曰。戚者非吾之所敢喜者。乃吾之所憂也。吾思所以逃吾之憂者。而不得其道。若之何。陽明子素知于公。旣以戚衆之戚。喜衆之喜。而復憂公之憂。乃叙其事。爲賦六月庸以贈公之行。

六月凄風。七月苦雨。倏雨倏寒。道脩以阻。允允君子。迪爾寢興。毋沾爾行。國步斯類。

哀此下民。靡屈靡極。不有老成。其何能國。吁嗟老成。獨遺典型。若屋之傾。尙支其楹。心之憂矣。言靡有所。如彼暗人。食荼與苦。依依長谷。言采其芝。人各有能。我歸孔時。昔彼叔季。沉湎以逞。耄集以咨。我人自靖。允允君子。淑慎爾則。靡曰休止。民何于極。日月其逝。如彼滄浪。南北其望。如彼參商。允允君子。毋沾爾行。如日之升。以曷不光。

守文弟歸省攜其手歌以別之

爾來我心喜。爾去我心悲。不爲倚門念。吾寧舍爾歸。長途正炎暑。爾行慎興居。涼茗勿頻啜。節食但無飢。勿出船旁立。勿登岸上嬉。收心每澄坐。適意時觀書。申洪皆冥頑。不足長嘆咎。見人勿多說。慎慎真如愚。接人莫輕率。忠信持謙卑。從來爲己學。慎獨乃其基。紛紛多嗜欲。爾病還爾知。到家良足樂。恰顏報重闈。昨秋垂蒙去。今夏成人歸。長者愛爾敬。少者悅爾慈。親明稱嘖嘖。羨爾能若茲。信哉學問功。所貴在得師。吾匪崇外飾。欲爾沾名爲。望爾日慙慙。聖賢以爲期。九兄及印弟。誦此共勉之。

書扇面寄館賓

湖上羣山落照晴。湖邊萬木起秋聲。何年歸去陽明洞。獨棹扁舟鑑裏行。

用寶夫韻

詩從雪後吟偏好。酒向山中味轉佳。巖瀑隨風雜鐘磬。水花如雨落袈裟。

游牛首山

春尋指天闕。烟霞眇何許。雙峯久相遠。千巖來舊主。浮雲刺中天。飛閣凌風雨。探秀澗阿入。羅陰息篔簹。滅迹避塵纓。清朝入深沮。風磴仰門歷。淙壑屢窺俯。梯雲躋石閣。下榻得吾所。釋子上方候。鳴鐘出延佇。頽景耀回盼。層巖翼經舉。暖暖林方暮。冷冷石泉語。清宵耿無寐。峯月升烟宇。會晤得良朋。可以寄心腑。

送徽州洪僊承瑞

平生舉業最疎慵。挾冊虛煩五月從。竹院檢方時論藥。芴堂放鶴或開籠。憂時漫有孤忠在。好古全無一藝工。念我還能來夜雪。逢人休說坐春風。

病中大司馬喬公有詩見懷次韻奉答二首

十日無緣拜後塵。病夫心地欲生榛。詩篇極見憐才意。伎倆慚非可用人。黃閣望公長秉軸。滄江容我老垂綸。保釐珍重回天手。會看春風萬木新。

一自多岐分路塵。堂堂正道遂生榛。聊將膚淺窺前聖。取謂心傳啟後人。淮海帝圖須節制。雲雷大造看經綸。枉勞詩句裁風雅。欲借盤銘獻日新。

送諸伯生歸省

天涯送爾獨傷神。歲月龍山夢裏春。爲謝江南諸故舊。起居東嶽太夫人。閑中書卷堪時展。靜裏工作要日新。能向塵途薄軒冕。不妨簑笠老江濱。

寄熊雪湖二首

竿竹誰隱扶桑東。白眉之叟今龐公。隔湖聞鷄謝墅接。渡海有鶴蓬山通。鹵田經歲苦秋雨。浪痕半壁驚湖風。歌聲屋低似金石。點也此意當能同。

海岸西頭湖水東。他年簑笠擬從公。釣沙碧海羣鷗借。樵徑青雲一鳥通。席有春陽堪坐雪。門垂五柳好吟風。于今猶是天涯夢。悵望青宵月色同。

諸用文歸用子美韻爲別

一別煙雲歲月深。天涯相見二毛侵。孤帆江上親朋意。樽酒燈前故國心。冷雪晴林還作雨。鳥聲幽谷自成吟。飲

餘莫上峯頭望。煙樹迷茫思不禁。

題王贊夫畫

隨處山泉着草廬。底須松竹掩柴扉。天涯遊子何曾出。畫裏孤帆未是歸。小西諸峯開夕照。虎溪春寺入煙霏。他年還向辰陽望。却憶題詩在翠微。

贈潘給事

五月滄浪濯足歸。三塘荷葉製初衣。甲非乙是君休問。西水辰山志正違。沙鳥不須疑雀舫。江雲先爲掃魚磯。武陵溪壑猶存僻。以畧移家人翠微。

與沅陵郭掌教

記得春眠寺閣雲。松林水鶴日爲羣。諸生問業衝星入。稚子拈香靜夜焚。世事暗隨江草換。道情曾許碧山聞。別來點瑟誰敲鼓。悵望烟花此送君。

別葉太叔克彰

情深宗族誼同方。消息那堪別後荒。江上相逢疑未定。天涯獨去意重傷。身閑最覺湖山靜。家近殊聞草本香。雲路莫憐遲發轍。世塗崎曲朗羊腸。

登憑虛閣和石少宰韻

山閣新添負一登。酒邊孤興晚堪乘。松間鳴瑟驚棲鶴。竹裏茶煙起定僧。望遠每來成久坐。傷時有涕恨無能。峯頭見說連圍闔。幾欲排雲尙未曾。

登閩江樓

絕頂樓荒舊有名。高皇曾此駐龍旌。險存道德虛天慙。守在蠻夷豈石城。山色古今餘王氣。江流天地變秋聲。登

臨授簡誰能賦。千古新亭一愴情。

獅子山

殘暑須還。雨清。高峯極目快新晴。日門潮落江聲急。吳苑秋深樹脚明。烽火正防胡騎入。羽書愁見朔雲橫。百年未有涓埃報。白髮今朝又幾莖。

遊清涼寺三首

春尋載酒本無期。乘興還嫌馬足遲。古寺共憐春草沒。遠山偏與夕陽宜。雨晴澗竹消蒼粉。風煖巖花落紫蕤。昏黑更須凌絕頂。高懷想見少陵詩。

其二

積雨山行已後期。更堪多病益遲遲。風塵漸覺初心負。丘壑真於野性宜。綠樹陰層新作蓋。紫蘭香細尙餘蕤。輞川圖畫能如許。絕是無聲亦有詩。

其三

不顧尚書。日期。欲爲花外板輿遲。繁絲急管人人醉。竹徑松堂處處宜。雙樹暗芳春寂寂。五峯晴秀晚羲羲。暮鐘杳杳催歸。惆悵煙光不盡詩。

寄張東所次前韻

遠趨君命忽中違。此意年來識者稀。黃綺曾爲炎祚出。子陵終尙富春歸。江船一話千年濶。塵夢今驚四十非。何日孤帆過天目。海門春浪掃漁磯。

別余縉子紳

不須買棹往來頻。我亦攜家向海濱。但得青山隨鹿豕。未論黃閣畫麒麟。喪心疾已千年痼。起死方存六籍真。歸

向蘭溪溪上問。桃花春水正迷津。

送劉伯光

五月茅茨靜竹扉。誠心方治忽辭歸。滄江獨棹衝新暑。白髮高堂戀夕暉。謾道六經皆註脚。還誰一語悟真機。相知若問。來意已傍西湖買釣磯。

冬夜偶書

百事支離力不禁。一官棲息病相侵。星辰魏闕江湖迫。松栢茅茨歲月深。欲倚黃精消白髮。由來空谷有餘音。曲肱已醒浮雲。荷簣休疑擊磬心。

寄潘南山

秋風吹。錦雲。一笑南山雨後新。詩妙異從言外得。易微誰見畫前真。登山脚健何妨老。留客情深不計貧。朱呂月林傳故事。他年還許上西鄰。

送胡廷尉

鍾陵雪後市燈殘。簫鼓江船發曉寒。山水總憐南國好。才猶須濟朔方艱。綵衣得侍仙舟遠。春色行應故里看。別去中宵瞻北極。五雲飛處是長安。

與郭子全

相別翻憐相見時。碧桃開盡桂北枝。光陰如許成虛擲。世故催人總不知。雲路不須朱紱去。歸帆且待綵衣隨。嵐山風景瀟溪近。此去還應自得師。

次饒子仁韻送別四首

子仁歸。以四詩請用其韻答之。言亦有過者。蓋因子仁之病而藥之。病已則去其藥。

從來尼父欲無言。須信無言已躍然。悟到鳶魚飛躍處。工夫原不在陳編。
操持有養本非禪。矯枉寧知已過偏。此去好從根脚起。竿頭百尺未須前。
野夫非不愛吟詩。才欲吟詩即亂思。未會性情涵泳地。二南還是淫辭。
道聽塗傳影響前。可憐絕學遂多年。正須閉口林間坐。莫道青山不解言。

書悟真篇答張太常二首

悟真篇是誤真篇。三註由來一手箋。狠殺妖魔圖利益。遂令迷妄競統傳。
造端難免張平叔。首禍誰誣薛紫賢。真說與君惟箇字。從頭去若野狐禪。

誤真非是悟真篇。平叔當時已有言。只爲世人多戀着。且從情欲起因緣。
癡人前豈堪談夢。真性中難更說玄。爲問道人還具眼。試看何物是青天。

贛州詩三十二首（正德丙子年九月陞南贛僉都御史以後作）

丁丑二月征漳寇進兵長汀道中有感

將略平生非所長。也提戎馬入汀漳。數峯斜日旌旗遠。一道春風鼓角揚。
莫倚貳師能出塞。極知充國善平羌。瘡痍到處曾無補。翻憶鍾山舊草堂。

回軍上杭

山城經月駐旌戈。亦復幽尋到薜蘿。南國已忻回甲馬。東田初喜出農簑。
溪雲曉度千峯雨。江漲新生兩岸波。暮倚七星瞻北極。絕憐蒼翠晚來多。

喜雨三首

即看一雨洗兵戈。使覺光風轉石蘿。順水飛檣來買舶。絕江喧浪舞漁簑。
片雲東望懷梁國。五月南征想伏波。長

擬歸耕猶未得。雲門初作漸無多。
韓門春盡猶多事。竹院空閒未得過。特放小舟乘急浪。始聞幽碧出層蘿。山田旱久兼逢雨。野老歎騰且縱歌。莫謂可塘終據險。地形原不勝人和。
吹角峯頭曉散軍。橫空萬騎下氤氳。前旛已帶洗兵雨。飛鳥猶驚捲陣雲。南畝漸忻農事動。東山休共凱歌聞。正思鋒鏑堪揮淚。一戰功成未足云。

聞曰仁買田雲上攜同志待予歸二首

見說和攜雲上耕。連箕應已出烏程。荒畝初墾功須倍。秋熟雖微稅亦輕。雨後湖舫兼學釣。餉餘堤樹合閑行。山人久有歸農興。猶向千峯夜度兵。
月色高林坐夜沉。此時何限故園心。山中古澗陰蘿合。江上孤舟春水深。百戰自知非舊學。三驅猶媿失前禽。歸期久負雲門伴。獨向幽溪雪後尋。

祈雨二首

句初一雨遍汀漳。將謂汀虔是接疆。天意豈知分彼此。人情端合有炎涼。月行今已虛纏畢。斗杓何曾解挹漿。夜起中庭成久立。正思民瘼欲沾裳。
見說虔南惟苦雨。深山毒霧長陰陰。我來偶遇一春旱。誰解挽回三日霖。寇盜柘陽方出掠。干戈塞北還相尋。憂民無計淚空墮。謝病幾時歸海潯。

還轅

積雨零都道。山途喜乍晴。淚流遲渡馬。岡樹隱前旌。野屋多移竈。窮苗尙阻兵。迎趨勸父老。無補媿巡行。

借山亭

借山亭子近如何。乘興時從夢裏過。尙想清池環醉影。猶疑花徑駐鳴珂。疎簾細雨燈前局。碧樹涼風月下砵。傳語諸公合頻賞。休令歲月亦蹉跎。

桶岡和邢太守韻二首

處處山田盡入畝。可憐黎庶半無家。興師正爲民瘼甚。陟險寧辭鳥道斜。勝世眞如領水建。先聲不礙嶺雲遮。窮巢容有漕驅脅。尙恐兵鋒或濫加。戢亂興師既有名。揮戈眞已見風行。豈云薄劣能驅策。管杖皇威自震驚。爛額尙慚爲上客。徒薪片費費經營。主恩未報身多病。旋凱須還隴上耕。

通天巖

青山隨地佳。豈必故園章。但得此身閑。寒竇亦蓬島。西林日初暮。明月來何早。醉臥石牀涼。洞雲秋未掃。

遊通天巖次鄒謙之韻

天風吹我上丹梯。始信青霄亦可躋。俯視氛竇成獨慨。却鄰人世尙多迷。東南眞境埋名久。閩楚諸峯入望眼。低道仙家全脫俗。三更日出亦聞鷄。

又次陳惟濬韻

四山落木正秋聲。獨上高峯望眼明。樹色遙連閩嶠碧。江流不盡楚天清。雲中想見雙龍轉。風外時傳一笛橫。莫遣新愁添白髮。且幸明月醉沉觥。

忘巖次謙之韻

意到已忘言。興劇復忘飯。坐我此巖中。是誰繫混沌。尼父欲無言。達者窺其本。此道何古今。斯人去則遠。空巖不見人。眞成面牆立。巖深雨不到。雲歸花亦濕。

圓明洞次謙之韻

羣山半波浪。出沒龍蛇脊。岩棲寄盤渦。沉淪遂成癖。我來汲東漢。爛煮南山石。千年熟一炊。欲餉岩中客。

潮頭岩次謙之韻

潮頭起平地。化作千丈雪。棹舟者何人。試問巖頭月。

天公素有志於學。茲得告東歸。林居靜養。其所就可知矣。臨別。以此紙索贈。漫爲賦此。遂寄盤山澤諸賢。予有山林期。荏苒風塵際。高秋送將歸。神往迹還滯。回車當盛年。養癯非遜世。垂竿鑑湖雲。結廬浮峯樹。愛日遂庭趨。芳景添游詣。掄生悟玄魄。妙靜息緣慮。眇眇素心人。望望滄湖去。東行訪天沃。雲中倘相遇。

坐忘言巖問二三子

幾日巖棲事若何。莫將佳景復虛過。未妨雲壑淹留久。終是塵寰錯誤多。澗道霜風疏草木。洞門煙月掛藤蘿。不知相繼來游者。還有吾儕此意麼。

留陳惟濬

聞說東歸欲問舟。清遊方此復離憂。却看陰雨相淹滯。莫道山靈獨苦留。薛荔巖高兼得月。桂花香滿正宜秋。烟霞到手休輕擲。塵土驅人易白頭。

棲禪寺雨中與 惟乾同登

絕頂深泥冒雨扳。天於佳景亦多慳。自憐久客頻移棹。頗羨高僧獨閉關。江草遠連雲帶澤。禁雲且斷九疑山。年來出處渾無定。慚愧沙鷗盡日閑。

茶寮紀事

萬壑風泉秋正哀。四山雲霧晚初開。不因王事兼呈入。安得閑行向北來。登陟未妨安石興。縱擒徒羨孔明才。乞

身已擬全師日。歸掃溪邊舊釣臺。

回軍九連山道中短述

百里妖氛一戰清。萬峯雷雨洗回兵。未能干羽苗頑格。深媿壺漿父老迎。莫倚謀攻爲上策。還須內治是先聲。功微不願封侯賞。但乞輪蹄絕橫征。

回軍龍南小憩王石巖雙洞絕奇徘徊不忍去因寓以陽明別洞之號兼留此作二首

甲馬新從鳥道回。覽奇還更陟崔嵬。寇平漸喜流移復。春煖兼欣農務開。兩竇高明行日月。九關深黑閉風雷。投簪最好茅山戀。士猶懷舊釣臺。

洞府人寰此最佳。當年空自費青鞵。摩幢旂旆懸仙仗。臺殿高低接緯階。天巧固應非斧鑿。化工無乃太安排。欲將點瑟携帝冠。就攬春雲結小齋。

陽明山人舊有居。此地陽明景不如。但在乾坤俱逆旅。曾留信宿卽吾廬。行窩已許人先號。別洞何妨我借書。他日巾車還舊隱。應懷茲土復鄉閩。

再至陽明別洞和邢太守韻二首

春山隨處款歸程。古洞幽虛道意生。澗壑風泉時遠近。石門蘿月自分明。林僧住久炊澆火。野老忘機罷席爭。習靜未緣成久坐。却慚塵土逐虛名。

山水平生是課程。一淹塵土遂心生。耦耕亦欲隨沮溺。七縱何緣得孔明。吾道羊腸須蠖屈。浮名蝸角任龍爭。好山當面馳車過。莫漫尋山說避名。

夜坐偶懷故山

獨夜殘燈夢未成。蕭蕭總是故園聲。草深石徑鼯鼯笑。雪靜空山猿鶴驚。漫有緘書懷舊侶。常牽纓冕負初情。雲

溪漠漠春風轉。紫茵黃花又自生。

懷歸二首

深慚經濟學封侯。都付浮雲自去留。往事每因心有得。身閒方喜世無求。狼烟幸息昆陽患。蠶測空懷杞國憂。一笑海天空濶處。從知吾道在滄州。

身經多難早知非。此事年來識者稀。老大有情成舊德。細謀無計解重圍。意常不足真夷道。情到方濃是險機。恨望衡茅無事日。漫吹松火織秋衣。

送程聲叔父歸姚并序

守仁與德聲叔父共學於家君龍山先生。叔父屢困場屋。一旦以親老辭廩歸養。交遊強之出。輒笑曰。古人一日養。不以三公易。吾豈以一老母博一弊儒冠乎。嗚呼。若叔父。真知內外輕重之分矣。今年夏來贛。視某。留三月。飄然歸興。不可挽。因謂某曰。秋風尊鱸。知子之興。無日不切。然時事若此。恐卽未能脫。吾不能俟子之歸舟。吾先歸。爲子開荒陽明之麓如何。嗚呼。若叔父。可謂真知內外輕重之分矣。某方有詩戒叔父曰。吾行子可無言。輒爲賦此。

猶記垂髫共學年。于今鬢髮兩蒼然。窮通只好浮雲看。歲月真同逝水懸。歸鳥長空隨所適。秋江落木正無邊。何時却返陽明洞。羅月松風掃石眠。

示憲兒

幼兒曹聽教誨。勤讀書。要孝弟。要謙恭。循禮義。節飲食。戒遊戲。毋說謊。毋貪利。毋任情。毋鬥氣。毋責人。但自治。能下人。是有志。能容人。是大器。凡做人。在心地。心地好。是良士。心地惡。是克類。譬樹菓。心是蒂。蒂若壞。菓必墜。吾教汝。全在是。汝諦聽。勿輕棄。

贈陳東川

白沙詩裏蒲陽子。盡是相逢逆旅間。開口向人談古禮。拂衣從此入雲山。

江西詩一百二十首（正德己卯年奉勅往福建處叛軍。至豐城遭宸濠之變。趨還吉安。集兵平之。八月。陞副都御史。巡按江西作。）

鄱陽戰捷

甲馬秋驚鼓角風。旌旗曉拂陣雲紅。勤王敢在汾淮後。戀闕真隨江漢東。辜醜漫勞同吠犬。九重端合是飛龍。涓埃未遂酬滄海。病懶先須伴赤松。

書草萍驛

九月獻俘北上。駐草萍時已暮。忽傳王師已及餘淮。遂乘夜速發。次壁間留紀之二首。

一戰功成未足奇。親征消息尙堪危。邊烽西北方傳警。民力東南以盡疲。萬里秋風嘶甲馬。千山斜日度旌旗。小臣何爾驅馳急。欲請回鑾詎六師。

千里風塵一劍當。萬山秋色送歸航。堂垂雙白虛頻疏。門已三過有底忙。羽檄西來秋黯黯。關河北望夜蒼蒼。自嗟力盡螳螂臂。此日回天在廟堂。

西湖

靈鷲高林暑體清。三天石壁雨痕晴。客來湖上逢雲起。僧住峯頭話月明。世路久知難直道。此身那得尙虛名。移家早定孤山計。種菓支茅卻易成。

寄江西諸士夫

甲馬驅馳已四年。秋風歸路更茫然。慚無國手醫民病。空有官銜糜俸錢。湖海風塵雖暫息。江湘水旱尙相沿。問

詩忽憶并州句。回首江西亦故園。

太息

一日復一日。中夜坐嘆息。庭中有嘉樹。落葉何漸瀝。蒙翳亂藤纏。學知絕根脈。丈夫貴剛腸。光陰勿虛擲。頭白眼昏昏。吁嗟亦何及。

宿淨寺四首（十月至杭。王師遣人追寧濠復還江西。是日遂謝病退居西湖。）

老屋深松覆古藤。羈棲猶紀昔年曾。棋聲竹裏消閑盡。藥裏臆前對病僧。烟艇避人長曉出。高峯望遠亦時登。而今更是多牽繫。欲似當時又不能。

常苦人間不盡愁。每拚須是入山休。若爲此夜山中宿。猶自中宵煎百憂。百戰西江方底定。六飛南甸尚淹留。何人真有回天力。諸老能無取日謀。

百戰歸來一病身。可看時事更愁人。道人莫問行藏計。已買桃花洞裏春。

山僧對我笑。長見說歸山。如何十年別。依舊不曾閑。

歸興

一絲無補聖明朝。兩鬢徒看長二毛。自識雅陰非國士。由來康節是人豪。時方多難容安枕。事已無能欲善刀。越水東頭尋舊隱。白雲茅屋數峯高。

即事漫述四首

從來野性只山林。翠壁丹梯處處尋。一自浮名縈世網。遂令眞訣負初心。夜馳險數天峯雪。秋虜強王漢水陰。辛苦半生成底事。始憐莊鳥亦哀吟。

百戰深秋始罷兵。六師冬盡尙南征。誠微未足回天意。性僻還多拂世情。烟水滄江從鶴來。風雲溟海任龍爭。他

年若訪陶元亮。五柳新居在赤城。

宵宵深愁伴客居。江船風雨夜燈虛。尙勞車駕臣多缺。無補瘡痍術已疎。親老豈堪還遠別。時危那得久無書。明朝且就君平卜。要使吾心不負初。

茅茨松菊別多年。底事寒江尙客船。強所不能儒作將。付之無奈數由天。徒聞諸葛能興漢。未必田單解誤燕。最羨漁翁閒事業。一竿明月一簑煙。

泊金山寺二首（十月將趨行在）

但過金山便一登。鳴鐘出迓每勞僧。雲濤石壁深龍窟。風雨棲臺迥佛燈。難後詩懷全欲減。酒邊孤興尙堪憑。巖梯未用妨苔滑。曾踏天峯雪棧冰。

醉人江風酒易醒。片帆西去雨冥冥。天迴江漢留孤柱。地缺東南着此亭。沙渚亂更新世熊。峯巒不改舊時青。舟人指點龍王廟。欲話前朝不忍聽。

舟夜

隨處石山一葉舟。夜深霜丹亦兼愁。翠華此際遊何地。畫角中宵起戍樓。甲馬尙屯淮海北。旌旗初散楚江頭。洪濤滾滾乘風勢。容易開帆不易收。

舟中至日

歲寒尤嘆滯江濱。漸喜陽回大地春。未有一絲添袞繡。謾提三尺淨風塵。丹心倍覺年來苦。白髮從教鏡裏新。若待完名始歸隱。桃花笑殺武陵人。

阻風

冬江盡說風長北。偏我北來風便南。未必天公真有意。劫逢人事偶相參。殘農得暖堪登樓。破屋多寒且曝簷。果

使困窮能稍濟。不妨經月阻江潭。

用韻答伍汝真

莫恠鄉思日夜深。干戈衰病兩相侵。孤腸自信終如鐵。衆口從教盡鑠金。碧水丹山曾舊約。青天白日足知心。茅茨歲晚饒風景。雲雨清溪雪滿岑。

過鞋山戲題

曾駕雙虬渡海東。青鞋失脚墮天風。經過已是千年後。蹤跡依然一夢中。屈子慢勞傷世隘。楊朱空自泣途窮。正須坐我匡廬頂。濯足寒濤步曉空。

楊蓬菴待隱

嘉園名待隱。專待主人歸。此日真歸隱。名園竟不違。巖花如其語。山石故相依。朝市都忘却。無勞更掩扉。

其二

大隱真塵市。名園陋給孤。留侯先謝病。范老竟歸湖。種竹非醫俗。移山不是愚。（是日公方移山石）對時存變理。經濟自成謨。

其三

綠野春深地。山陰夜靜時。冰霜綠逕滑。雲石向人危。平難心仍在。扶顛力未衰。江湖兵甲滿。吟罷有餘思。

其四

茲園開已久。今度始來窺。市裏烟霞靜。壺中結構奇。勝遊須繼日。虛席亦多時。莫道東山僻。蒼生或未知。

其五

芳園待公隱。屯世待公亭。花竹深臺榭。風塵暗甲兵。一身良得計。四海未忘情。語及艱難際。停盃淚欲傾。

登小孤書壁

人言小孤殊阻絕。從來可望不可攀。上有顛崖勢欲墮。下有劍石交巉頑。峽風閃壁船難進。洪濤怒撞蛟龍關。帆檣摧縮不敢越。往往退次依前山。崖傍沙岸日東徙。忽成巨浸通西灣。帝心似憫舟楫苦。神斧夜闢無痕斑。風雷倏翕見萬恠。人謀不得容其間。我來銳意欲一往。小舟微服治回瀾。側身脅息仰天寶。懸空絕棧蛛絲慳。風吹卵石眼花落。凍滑丹梯足力孱。青巖吹雨出仍沒。白鳥避客來復還。泉頭四顧盡落日。宛然風景如瀛寰。烟霞未覺三山遠。塵土聊乘半日閒。奇觀江海詎爲險。世情平地猶多艱。嗚呼。世情平地猶多艱。回瞻北極雙淚潺。

登蠓磯次草泉心劉石門韻二首（二詩壬戌年作誤入此）

中流片石倚孤雄。下有馮夷百尺宮。灑灑西蟠渾失地。長江東去正無窮。徒聞吳女埋香玉。惟見沙鷗亂雪風。往事淒微何足問。永安宮闕草萊中。

江上孤臣一片心。幾經漂沒水痕深。極恰撐住即從古。正恐崩頽或自今。蘚蝕秋螺殘老翠。蟬鳴春雨落空音。好攜雙鶴磯頭坐。明月中宵一朗吟。

望廬山

盡說廬山若箇奇。當時圖畫亦堪疑。九江風浪非前日。五老烟雲豈定期。眼慣不妨屨屐險。足跡須着短筇隨。香爐瀑布微如綫。欲決天河瀉上池。

除夕伍汝真用待隱園韻卽席次答五首

一年今又去。獨客尙無歸。人世傷多難。親庭嘆久違。壯心都欲盡。衰病特相依。旅館聊隨俗。桃符換早扉。

其二

向憶青年日。追歡興不孤。風塵淹歲月。漂泊向江湖。濟世渾無術。違時竟笑愚。未須悲蹇頭。列聖有遺謨。

其三

正逢兵亂地。况是歲窮時。天運終無息。人心本自危。憂疑紛并集。筋力頓成衰。千載高山隱。愆然獲我思。

其四

世道從厄漏。人情只管窺。年華多涉歷。變故益新奇。莫憚顛危地。曾逢全盛時。海翁機已息。應是白鷗知。

其五

星窮回曆紀。貞極起元亨。日望天迴駕。先沾雨洗兵。雪猶殘歲戀。風已舊春情。莫更辭藍尾。人生未幾傾。

元日霧

元日昏昏霧。寒空出門咫尺誤。西東人多失足投坑塹。我亦停車泣路窮。欲斬蚩尤開白日。還排閻闔拜重瞳。小臣謾有澄清志。安得扶搖萬里風。

二日雨

昨朝陰霧埋元日。向曉寒雲迸雨聲。莫道人爲無感召。從來天意亦分明。安危他日須周勃。痛哭當年笑賈生。坐對殘燈愁徹夜。靜聽晨鼓報新晴。

三日風

一霧二雨三日風。田家卜歲疑凶豐。我心惟願兵甲解。天意豈必斯民窮。虎旅歸思懷舊土。鸞輿消息望還宮。春盤濁酒聊自慰。無使戚戚干吾衷。

立春二首

才見春歸春又來。春風如舊鬢毛衰。梅花未放天機泄。萱草先將地脈回。漸老光陰逢世難。經年懷抱欲誰開。孤雲渺渺親庭遠。長日斑衣羨老萊。

天涯霜雪嘆春遲。春到天涯思轉悲。破屋多時空杼軸。東風無力起瘡痍。周王車駕窮南服。漢將旌旗守北陲。莫訝春盤飴生菜。人間菜色正離飢。

遊廬山開元寺

僻性尋常慣受猜。看山又是百忙來。北風留客非無意。南寺逢僧即未回。白日高峰開雨雪。青天飛瀑瀉雲雷。綠溪踏得支茆地。修竹長松覆石臺。

又次壁間杜牧韻

春山路僻歸樵。爲指前峯石逕遙。僧與白雲還暝壑。月隨滄海上寒潮。世情老去渾無賴。遊興年來獨未消。回首孤航又陳迹。疎鐘隔澗夜迢迢。

舟過銅陵。楚云縣東小山有鐵船。因往觀之。果見其彷彿。因題石上。

青山滾滾如奔濤。鐵船何處未停桡。人間剡木寧有此。疑是仙人之所操。仙人一去已千載。山頭日日長風號。船頭出土尚彷彿。後岡有石云船梢。我行過此費村度。昔人用心無乃切。由來風波平地惡。縱有鐵船還未牢。秦鞭驅之未能動。莽力何所施其篙。我欲乘之訪蓬島。雷師鼓舵虹爲纜。弱流萬里不勝芥。復恐駕此成徒勞。世路難行每如此。獨立斜陽首重搔。

山僧

巖下蕭然老病僧。曾求佛法禮南能。論詩自許窺三昧。入聖無梯出小乘。高閣松風飄夜磬。石床花雨落寒燈。更深月出山牕曙。漱齒焚香誦法楞。

江上望九華山二首

當年一上化城峯。十日高眠雷雨。中。霽色曉開千嶂雪。濤聲夜渡九江風。此時隔水看圖畫。幾歲綠雲住桂叢。却

負洞仙蓬海約。玉函丹訣在崆峒。
窮探雖得盡幽奇。山勢須從遠望知。
幾朵芙蓉開碧落。九天屏障列旌麾。
高同華嶽應無忝。名亞匡廬却稍卑。
信是謫仙還具眼。九華題後竟難移。

觀九華龍潭

飛流三百丈。瀨洞祕靈湫。峽坼開雷斧。
天虛下月鉤。化形時試鉢。吐氣或成樓。
吾欲鞭龍走。爲霖遍九州。

廬山東林寺次韻

東林日暮更登山。峯頂高僧有蘭若。
雲蘿磴道石參差。水聲深澗樹高下。
遠公學佛却援儒。淵明嗜酒不入社。
我亦愛山仍戀官。同是乾坤避人者。
我歌白雲聽者寡。山自點頭泉自瀉。
月明壑底忽驚雷。夜半天風吹屋瓦。

又次邵二泉韻

昨遊開元殊草草。今日東林遊始好。
手持蒼竹撥層雲。直上青天招五老。
萬壑笙竽松籟哀。千峯掩映芙蓉開。
坐俯西巖窺落日。風吹孤月江東來。
莫向人間空白首。富貴何如一杯酒。
種蓮栽菊兩荒涼。惠遠陶潛骨何朽。
乘風我欲還金庭。三洲弱水連沙汀。
他年海上望廬頂。烟際浮萍一點青。

遠公講經臺

遠公說法有高臺。一朵青蓮雲外開。
臺上久無獅子吼。野狐時復聽經來。

太平宮白雲

白雲休道本無心。隨我迢迢度遠岑。
攔路野風吹鬢斷。又穿深樹候前林。

書九江行臺壁

九華真實是奇觀。更是廬山亦耐看。
幽勝未窮三日興。風塵已覺再來難。
眼餘王老晴光碧。衣染天池積翠寒。
却

樞寺僧能好事。直來城市索詩刊。

又次李僉事素韻

省災行近郊。探幽指層麓。回飈振玄岡。頽陽薄西陸。菑田收積雨。禾稼泛平菴。取徑歷村墟。停車問耕牧。清清厲月行。暝洞披雲宿。浙米石澗溜。斧薪澗底木。田翁來聚觀。中宵尙馳逐。將迎愧深情。瘠瘵慚撫掬。幽枕靜無寐。風泉朗鳴玉。雖繆真訣傳。頗若塵緣熟。終當遁名山。鍊藥洗凡骨。械辭謝親交。流光易忽忽。

繁昌道中阻風二首

阻風夜泊柳邊亭。曉夢還鄉午未醒。臥穩從教波浪惡。地深長是水雲冥。入林沽酒村童引。隔水放歌漁父聽。頗覺看山緣獨在。蓬牕剛對一峯青。

東風漠漠水溟溟。花柳沿村春事殷。泊久漁樵來作市。心閒麋鹿漸同羣。自憐失脚趨塵土。長恐歸期負海雲。正憶山中詩酒伴。石門延望幾斜曛。

江邊阻風散步至靈山寺

歸船不遇打頭風。行脚何緣到此中。幽谷餘寒春雪在。虛簷斜日暮江空。林間古塔無僧住。花外仙源有路通。隨處看山隨處樂。莫將踪跡嘆萍蓬。

泊舟大同山溪間。諸生聞之有挾冊來尋者。

扁舟經月住林隈。謝得黃鶯日日來。兼有清泉堪洗耳。更多修竹好啣盃。諸生涉水携詩卷。童子和雲掃石苔。獨柰華峯隔烟霧。時勞策杖上崔嵬。

巖下桃花盛開攜酒獨酌

小小山園幾樹桃。安排春色候停橈。開樽旋掃花陰雪。展席平臨松頂濤。地遠不須防俗駕。溪晴還好着漁舫。雲

聞石路稀人跡。深處容無避世豪。

白鹿洞獨對亭

五老隔青冥。尋常易不見。我來騎白鹿。凌空陟飛巘。長風捲浮雲。褰帷始窺面。一笑仍舊顏。媿我鬢先變。我來爾爲主。乾坤亦郵傳。海燈照孤月。靜對有餘眷。彭蠡浮一觴。賓主聊酬勸。悠悠萬古心。默契可無辨。

豐城阻風（前歲遇難於此。得北風幸免。）

北風休嘆北船窮。此地曾經拜北風。句踐敢忘嘗膽地。齊威長憶射鉤功。橋邊黃石機先授。海上陶朱意頗同。況是倚門衰白甚。歲寒茅屋萬山中。

江上望九華不見

五旬三過九華山。一度陰寒一度雨。此來天色稍晴明。忽復昏霾起亭午。平生山水最多緣。獨此相逢容有數。人言此山天所祕。山下居人不常睹。蓬萊涉海或可求。瑤水崑崙俱舊遊。洞庭何止吞八九。五嶽曾向囊中收。不信開雲掃六合。手扶赤日照九州。駕風騎氣覽八極。視此瑣屑真浮漚。

江施二生與醫官陶楚冒雨登山人多笑之戲作歌

江生施生頗好奇。偶逢陶楚奇更癡。共言山外有佳寺。勸予往遊爭願隨。是時雷雨雲霧塞。多傳險滑難車騎。兩生力陳道非遠。楚請登高覘崎歧。三人冒雨陟岡背。既仆復起相牽攜。同儕咻笑招之返。奮袂徑往凌巖崎。歸來未暇顧沾濕。且說地近山逕夷。青林宿靄漸開霽。碧巘絳氣浮微曦。津津指譬在必往。興劇不到傍人嗤。予亦對之成大笑。不覺老興如童時。平生山水已成癖。歷深探隱忘飢疲。年來世務頗羈縛。逢場遇境心未衰。楚本求仙志方外。兩生學士亦爾爲。世人趨逐但聲利。赴湯蹈火甘傾危。解脫塵囂事行樂。爾輩狂簡翻見譏。歸與歸與吾與爾。陽明之麓終爾期。

遊九華道中

微雨山路滑。山行入輕舟。桃花夾岸迷。遠近迴巒疊。嶂盤深幽。奇峯應接勞。回首瞻之在前。忽在後。不道舟行轉。屈曲但恠青山亦奔走。薄午雨霽雲亦開。青鞋布襪無塵埃。梅蹊柳徑度村落。長松白石穿林隈。始攀風磴出木杪。更俯懸崖照瀑雷。亂山高頂藏平野。茅屋高低自成社。此中那得有人家。恐是當年避秦者。西巖日色漸欲下。日向前林秣吾馬。世途濁隘不可居。吾將此地營蘭若。

芙蓉閣

九華之山何崔嵬。芙蓉直傍青天栽。剛風到海吹不動。大雪裂地凍還開。夜半峯頭掛明月。宛如玉女臨粧臺。我拂滄海寫圖畫。題詩還媿謫仙才。

重遊無相寺次韻四首

遊興殊未盡。塵寰不可留。山青只依舊。白盡世間頭。

其二

人迹不到地。茆茨亦數間。借問此何處。云是九華山。

其三

拔地千峯起。芙蓉插曉寒。當年看不足。今日復來看。

其四

瀑流懸絕壁。峯月上寒空。鳥鳴蒼磻底。僧住白雲中。

登蓮花峯

蓮花頂上老僧居。腳踏蓮花不染泥。夜半花心吐明月。一顆懸空黍米珠。

重遊無相寺次舊韻

舊識仙源路未差。也從谷口問桃花。屢攀絕棧經殘雪。幾度清溪踏月華。虎穴相隣多異境。鳥飛不到有僧家。頻來休下仙翁榻。只借峯頭一片霞。

登雲峯望始盡九華之勝因復作歌

九華之峯九十九。此語相傳俗人口。俗人眼淺見皮膚。焉測其中之所有。我登華頂拂雲霧。極目奇峯那有數。巨壑中藏萬玉林。大劍長鎗貫武庫。有如智者深韞藏。復如淑女避讒妬。闢然避世不求知。早已尊人羞逞露。何人不道九華奇。奇中之奇人未知。我欲窮搜盡拈出。祕藏恐是天所私。旋解詩囊旋收拾。脫穎露出錐參差。從來題詩李白好。渠於此山亦潦草。曾見王維畫輞圖。安得渠來拂纖縞。

雙峯遺柯生喬

爾家雙峯下。不見雙峯景。如錐處囊中。深藏未脫穎。盛德心愈卑。幽人迹多屏。悠然望雙峯。可以發深省。歸途有僧自望華亭來。迎且請詩。

方自華峯下。何勞更望華。山僧援故事。要我到渠家。自謂遊已至。那知望轉佳。正如酣醉後。醒酒却須茶。無相寺金沙泉次韻

黃金不有地。傾沙瀉流泉。潭淨長開鏡。池分或鑄蓮。風雲爲大雨。濟世作豐年。縱有貪夫過。清風自灑然。夜宿天池月下聞雷。次早知山下大雨。二首。

昨夜月明峯頂宿。隱隱雷聲在山麓。曉來却問山下人。風雨三更捲葦屋。野人權作青山主。風景朝昏頗裁取。巖傍日脚半溪雲。山下雷聲一村雨。天池之水近無主。木魅山妖競偷取。公然又盜山頭雲。去向人間作風雨。

文殊臺夜僧佛燈

老夫高臥文殊臺。拄杖夜撞青天開。散落星辰滿平野。山僧盡道佛燈來。

書汪進之太極巖二首

一竅誰將混沌開。千年樣子道州來。須知太極元無極。始言心非明鏡臺。始信心非明鏡臺。須知明鏡亦塵埃。人人有箇圓圈在。莫向蒲團坐死灰。

勸酒

平生忠赤有天知。便欲欺人肯自欺。毛髮暗從愁裏改。世情明向笑中危。春風脈脈回枯草。殘雪依依戀舊枝。謾對芳樽辭酩酊。機關識破已多時。

重遊化城寺 首

愛山日日望山晴。忽到山中眼自明。鳥道漸非前度險。龍潭更比舊時清。會心人遠空遺洞。識面僧來不記名。真謂中丞喜忘世。前途風浪苦難行。山寺從來十九秋。舊僧零落老比丘。蒼松盡長青冥幹。瀑水猶懸翠壁流。人住層崖嫌洞淺。鳥鳴春間覺山幽。年來別有閑尋意。不似當時蓋浪遊。

遊九華

九華原亦是移文。錯怪山頭日日雲。乘興未甘回俗駕。初心終不負靈均。紫芝香煖春堪茹。青竹泉高晚更分。幽夢已分塵土累。清猿正好月中聞。

弘治壬戌。嘗遊九華。值時陰霧。竟無所覩。至是正德庚辰。復往遊之。風日清朗。盡得其勝。喜而作歌。昔年十日九華住。雲霧終旬竟不開。有如昏夜入寶藏。兩目無覩成空回。每逢好事談奇勝。即思策蹇還一來。頻

事兵革。出入賊壘衝風埃。恐恐晝夜不遑息。豈復山水能徘徊。鄱湖一戰偶天幸。遠隨歸凱停江隈。是時軍務頗多暇。况復我馬方馳驅。舊遊諸生亦萃集。遂將童冠登崔嵬。先晨霏靄尚暝晦。却疑山意猶嫌猜。肩輿一入青陽境。忽然白日開西嶺。長風擁黛掃浮陰。九十九峯如夢醒。翠巒踊躍爭巖奇。兒孫俯伏摩其頂。今來始識九華面。恨無詩筆爲傳影。層樓疊閣寫末工。千朶芙蓉抽玉井。恠哉造化亦安排。天下奇山此兼并。攬衣登高望八荒。雙闕下見日月光。長江如帶繞山麓。五湖七澤皆陂塘。逢瀛海上浮拳石。舉足可到虹可梁。仙人爲我啓閭闔。鸞軒鶴駕紛翱翔。從茲脫屣謝塵世。飄然拂袖凌蒼蒼。

巖頭閣坐漫成

盡日巖頭坐落花。不知何處是吾家。靜聽谷鳥遷喬木。閒看林蜂散午衙。翠壁泉聲穿亂石。碧潭雲影透晴沙。癡兒公事真難了。須信吾生自有涯。

將遊九華。移舟宿寺山二首

逢山未愜意。落日更移船。峽寺緣溪逕。雲林帶石泉。鐘聲先度嶺。月色已浮川。今夜巖房宿。寒燈不待懸。

其二

維舟谷口榜煙霏。共說前岡石徑微。竹杖穿雲尋寺去。藤筐採藥帶花歸。諸生晚佩聯芳杜。野老春霞綴衲衣。風詠不須沂水上。碧山明月更清輝。

登雲峯。二三子詠歌以從。欣然成謠。二首。

淳氣日凋薄。鄒魯亡真承。世儒倡臆說。愚瞽相因仍。晚途益淪溺。手援吾不能。棄之入烟霞。高歷雲峯層。開茅傍虎穴。結屋依巖僧。豈曰事高尚。庶免無予憎。好鳥求其侶。嚶嚶林間鳴。而我在空谷。空得無良朋。飄飄二三子。春服來從行。詠歌見真性。逍遙無俗情。各勉希聖志。毋爲塵所縈。

深林之鳥何間關。我本無心雲自閒。大舜亦與木石處。醉翁惟在山水間。晴牕展卷有會意。絕壁題詩無厚顏。顧謂從行二三子。遊麋鹿俱忘還。

有僧坐巖中已三年詩以勵吾黨

莫怪巖僧木石居。吾儕真切幾人如。經營日夜身心外。剽竊糠粃齒頰餘。俗學未堪欺老衲。昔賢取善及陶漁。年來奔走成何事。此日斯人亦起予。

春日遊齊山寺用杜牧之韻二首

卽看花發又花飛。空向花前嘆式微。自笑半生行脚過。何人未老乞身歸。江頭鼓角翻春浪。雲外旌旗閃落暉。羨殺山中麋鹿伴。千金難買芟荷衣。

倦鳥投枝已亂飛。林間暝色漸霏微。春山日暮成孤坐。遊子天涯正憶歸。古洞濕雲含宿雨。碧溪明月弄清暉。桃花不管人間事。只笑山人未拂衣。

重遊開元寺戲題壁

中丞不解「公事」到。看山復尋寺。尙爲妻孥守俸錢。至今未得休官去。三月開花兩度來。寺僧倦客門未開。山靈似嫌俗士駕。溪風攔路吹人回。君不見富貴中人如中酒。折腰解醒須五斗。未妨適意山水間。浮名于我亦何有。

賈胡行

賈胡得明珠。藏珠剖其軀。珠藏未能有。此身已先無。輕己重外物。賈胡一何愚。請君勿笑賈胡愚。君今奔走聲利途。鑽求富貴未能得。役精勞形骨髓枯。竟日惶惶髮毀譽。終宵惕惕防艱虞。一日僅得五升米。半級仍甘九族誅。胥靡移踵略無悔。請君勿笑賈胡愚。

送邵文質方伯致仕

君不見。罍下鷄。引頸呼羣啄。且啼。稻粱已足脂漸肥。毛羽脫落充庖廚。又不見。籠中鶴。歛翼垂頭困牢落。籠開一旦入層雲。萬里翱翔從寥廓。人生山水食認眞。胡爲利祿纏其身。高車駟馬盡桎梏。雲臺麟閣皆埃塵。嗚夷抱恨浮江水。何似乘舟逃海濱。舜水龍山予舊宅。讓公且作烟霞伯。拂衣更擬逐公回。爲予先掃峯頭石。

紀夢（并序）

正德庚辰八月廿八夕。臥小閣。忽夢晉忠臣郭景純氏以詩示予。且極言王導之奸。謂世之人徒知王導之逆。而不知王導實陰主之。其言甚長。不能盡錄。覺而書其所示詩於壁。復爲詩以紀其略。嗟乎。今距景純若干年矣。非有實惡深冤鬱結而未暴。寧有數千載之下尙懷憤不平若是者耶。

秋夜臥小閣。夢遊滄海濱。海上神仙不可到。金銀宮闕高嶙峋。中有仙人芙蓉巾。顧我宛若平生親。欣然就語下烟霧。自言姓名郭景純。攜手歷歷訴衷曲。義憤感激難具陳。切齒尤深怨王導。深奸老猾長斯人。當年王敦覬神器。導實陰主和緣蚤。不然三問三不答。胡忍使敦殺伯仁。寄書欲掇太眞舌。不相爲謀敢爾云。敦病已篤事已去。臨死嫁禍復寧敦。事。成同享帝王昔。事敗仍爲顧命臣。幾微隱約亦可見。世史掩覆多失眞。袖出長篇再三讀。覺來字字能書紳。開牕試抽晉史閱。中間事迹頗有因。因思景純有道者。世移事往千餘春。若非精誠果有激。豈得到今猶憤噴。不成之語以箴戒。敦實氣沮竟殞身。人生生死亦不易。誰能視死如輕塵。燭微先幾炳易道。多能餘事非所論。取義成仁忠晉室。龍逢虢勝心可倫。是非顛倒古多有。吁嗟景純終見伸。御風騎氣遊八垠。彼敦之徒草木黃土。臭腐同沉淪。

我昔明易道。故知未來事。時人不我識。遂傳耽一技。一思王導徒。神器良久覬。諸謝豈不力。伯仁見其底。所以敦者備。罔顧天經與地義。不然百口未負托。何忍置之死。我於斯時知有分。日中斬柴市。我死何足悲。我生良

有以。九天一人撫膺哭。晉室諸公亦可恥。舉目山河徒嘆非。攜手登亭空灑淚。王導真奸雄。千載人未議。偶感君子談中及。重與寫真記。固知倉卒不成文。自今當與頻誼戲。倘其爲我一表揚。萬世萬世萬萬世。

右晉忠臣郭景純自述詩。蓋子夢中所得者。因表而出之。

無題

巖頭有石人。爲我下嶙峋。脚踏破履五十兩。身披舊衲四十斤。任重致遠香象力。餐霜坐雪金剛身。夜寒雙虎與溫足。雨後垂龍來伴宿。手握頑磚鏡未光。舌底流泉梅未熟。夜來拾得遇寒山。翠竹黃花好共看。同來問我安心法。還解將心與汝安。

遊落星寺

女媧煉石補天漏。璇璣晝夜無停走。自從墮却玉衡星。至今七政迷前後。渾儀晝夜徒揣摩。敬授人時亦何有。玉衡墮却此湖中。眼前誰是補天手。

遊通天巖示鄒陳二子

鄒陳二子皆好遊。一往通天十日留。候之來歸久不至。我亦乘興聊尋幽。巖扉日出雲氣浮。二子晞髮登巖頭。谷轉始聞人語響。蒼壁杳杳長沐秋。嗒然坐我亦忘去。人生得休且復休。採芝共約陽明麓。白首無慚黃綺儔。

青原山次黃山谷韻

咨觀歷州郡。驅馳倦風埃。名山特乘暇。林壑盤縈迴。雲石緣欹逕。夏木深層隈。仰窮嵐霏際。始覩臺殿開。衣傳西竺舊。構遺唐宋材。風松溪溜急。湍響空山哀。妙香隱玄洞。僧屋懸穹崖。扳依儼龍象。陟降臨緯階。飛泉瀉靈竇。曲檻連雲棧。我來慨遺迹。勝事多湮埋。邈矣西方教。流傳遍中垓。如何皇極化。反使吾人猜。剝陽幸未絕。生意存枯萎。傷心眼底事。莫負生前盃。煙霞有本性。山水乞歸骸。崎嶇羊腸坂。車輪幾傾催。蕭散麋麓伴。澗谷終追陪。恬愉

返黃濟。聞寂聲喧。至樂發天籟。絲竹謝淫哇。千古白同論。豈必時代偕。珍重二三子。茲游非偶來。且從山叟宿。勿受役夫催。東臺上煙月。夜景方徘徊。

睡起偶成

四十餘年睡夢中。而今醒眼始朦朧。不知日已過夢午。起向高樓撞曉鐘。起向高樓撞曉鐘。尙多昏睡正懵懵。縱令日暮醒猶得。不信人間耳盡聾。

立春

荒村亂後耕牛絕。城郭春來見土牛。家業尙存鄉井戀。風塵先幸甲兵休。未能布領慚時令。聊復嘲詩寫我憂。爲報胡雛須遠塞。暫時擬將駐南州。

遊廬山開元寺

清晨入谷到斜曛。徧歷青霄躡紫雲。闔闔遠從雙劍闕。銀河真自九天分。驅馳此日原非暇。夢想當年亦自勤。斷擬罷官來駐此。不教林鶴更移文。

登小孤次陸良弼韻

看盡東南百二峯。小孤江上是真龍。攀龍我欲乘風去。高揖層霄絕世踪。

月下吟三首

露冷天清月更輝。可看遊子倍沾衣。催人歲月心空在。滿眼兵戈事漸非。方朔本無金馬意。班超惟願玉門歸。白頭應倚庭前樹。惟我還期秋又違。

江天月色清自秋。不管人間底許愁。謾擬翠華旋北極。正憐白髮倚南樓。狼烽絕塞寒初入。鶴怨空山夜未休。莫重三公輕一日。靈名真覺是浮瀛。

依依牕月夜還來。渺渺鄉愁坐未回。素位也知非自得。白頭無奈是親衰。當年竹下曾裘仲。何日花前更老萊。懇
疏乞骸今幾上。中宵翹首望三台。

月夜二首

高臺月色倍新晴。種浦浮沙遠樹平。客久欲迷鄉國望。亂餘愁聽鼓鼙聲。湖南水潦頻移粟。碣北風烟且罷征。濡
手未辭援溺苦。白頭方切倚闌情。
舉世困酣睡。而誰偶獨醒。病呼未能起。暝日相恹驚。反謂醒者狂。羣起環門爭。洙泗輟金鐸。濂洛傳微聲。誰鳴塗
毒鼓。聞者皆昏冥。嗟爾欲奚爲。奔走皆營營。何當聞此鼓。開爾天聰明。

雪望四首

風雪樓臺夜更寒。曉來霽色滿山川。當歌莫放陽春調。幾處人家未起烟。
初日湖山雪未融。野人村落閉重重。安居信是豐年兆。爲語田夫莫惰農。
霽景朝來更好看。河山千里思漫漫。芳簷日色猶堪曝。應是邊關地更寒。
法象冥濛失巨纖。連朝風雪費粧嚴。誰將塵世化珠玉。好與貧家聚米鹽。

火秀宮次一峯韻三首

茲山堪遁迹。上應少微星。洞裏乾坤別。壺中日月明。道心空自警。塵夢苦難醒。方嶠由來此。虛無隔九溟。

其二

清溪曲曲轉層林。始信桃源路未深。晚樹烟霏山閣靜。古松雷雨石壇陰。壺爐遺火飛殘藥。仙藥浪空寄絕音。莫
道山人才一到。千年陳迹此重尋。

其三

落日下清江。悵望關道晚。人言玉筍更奇絕。漳口停舟路非遠。肩輿取徑沿村落。心目先馳嫌足緩。山昏欲就雲
儲眠。疎林月色與風泉。夢魂忽忽到真境。侵曉循迹來洞天。洞天非人世。予亦非世人。當年曾此寄一迹。屈指忽
復三千春。巖頭坐石剝落盡。手種松柏枯龍鱗。三十六峯僅如舊。澗谷漸改溪流新。空中仙樂風吹斷。化爲鼓角
驚風塵。風塵慘淡半天地。何當一掃還吾真。從行諸生駭吾說。問我恐是茲山神。君不見廣成子。高臥崆峒長不
死。到今一萬八千年。陽明真人亦如此。

歸懷

行年忽五十。頓覺毛髮改。四十九年非。童心獨猶在。世故漸改涉。遇坎稍無礙。每當快意事。退然思辱殆。傾否作
聖功。物覩豈不快。柰何桑梓懷。衰白倚門待。

啾啾吟

知者不惑仁不憂。君胡戚戚眉雙愁。信步行來皆坦道。憑天判下非人謀。用之則行舍即休。此身浩蕩浮靈舟。丈
夫落落掀天地。豈顧束縛如窮囚。千金之珠彈鳥雀。掘土何煩用鋤耰。君不見東家老翁防虎患。虎夜入室啣其
頭。西家兒童不識虎。執竿驅虎如驅牛。痴人懲疇遂廢食。愚者畏溺先自投。人生達命自灑落。憂讒避毀徒啾啾。
居趣詩三十四首（正德辛巳年歸越後作）

歸興二首

百戰歸來白髮新。青山從此作閒人。峯巒尚憶衝蠻陣。雲起猶疑見虜塵。鳥嶼微茫滄海暮。桃花爛熳武陵春。而
今始信還丹訣。却笑當年識未真。

其二

歸去休來歸去休。千貂不換一羊裘。青山待我長爲主。白髮從他自滿頭。種菓移花新事業。茂林脩竹舊風流。老

情最愛滄州伴。日日相呼理釣舟。

次謙之韻

珍重江船冒暑行。一宵心話更分明。須從根本求生死。莫向支流辨濁清。久奈世儒橫臆說。競搜物理外人情。良知底用安排得。此物由來自渾成。

再游浮峯次韻

廿載風塵始一回。登高心在力全衰。偶懷勝事乘春到。現有良朋自遠來。還指松蘿尋舊隱。撥開雲石翦蒼萊。後期此別知何地。莫厭花前勸酒盃。

夜宿浮峯次謙之韻

日日春山不厭尋。野情原自懶朝簪。幾家茅屋山村靜。夾岸桃花溪水深。石路草香隨鹿去。洞門蘿月聽猿吟。禪堂坐久發清磬。却笑山僧亦有心。

再游延壽寺次舊韻

歷歷溪山記舊踪。寺僧遙住翠微東。扁舟曾泛桃花人。岐路心多草樹封。谷口鳥聲兼伐木。石門烟火出深松。年來百好俱衰薄。獨有幽探興尚濃。

碧霞池夜坐

一雨秋涼入夜新。池邊孤月倍精神。潛魚水底傳心訣。棲鳥枝頭說道真。莫謂天機非嗜欲。須知萬物是吾身。無端禮樂紛紛議。誰與青天掃宿塵。

秋聲

秋來萬木發天聲。點瑟可琴日夜清。絕調迥隨流水遠。餘音細入晚雲輕。洗心真已空千古。傾耳誰能辨九成。徒

使清風傳律呂。人間瓦缶正雷鳴。

林汝桓以二詩寄次韻爲別

斷雲微日半晴陰。何處高梧有鳳鳴。星漢浮槎先入夢。海天波浪不須驚。魯郊已自非常典。膳肉寧爲脫冕行。試向滄浪歌一曲。未云不是九韶聲。

堯舜人人學可齊。昔賢斯語豈難稽。君今一日真千里。我亦當年苦舊迷。萬理由來吾具足。六經原只是階梯。山中儘有閑風月。何日扁舟更越溪。

月夜二首（與諸生歌于天泉橋）

萬里中秋月正晴。四山雲霧忽然生。須臾濁霧隨風散。依舊青天此月明。肯信良知原不昧。從他外物豈能撓。老夫今夜狂歌發。化作鈞天滿太清。

處處中秋此月明。不知何處亦羣英。須憐絕學經千載。莫負男兒過一生。影響尙疑朱仲晦。支離羞作鄭康成。鏗然含瑟春風裏。點也雖狂得我情。

秋夜

春園花木始非菲。又是高秋落葉稀。天迥樓臺含氣象。月明星斗避光輝。閒來心地如空水。靜後天機見隱微。深院寂寥羣動息。獨憐烏鵲繞枝飛。

夜坐

獨坐秋庭月色新。乾坤何處更閑人。高歌度與清風去。幽意自隨流水春。千聖本無心外訣。六經須拂鏡中塵。却憐擾擾周公夢。未及惺惺陋巷貧。

心漁爲錢翁希明別號題（錢翁德洪父三歲雙瞽。好古博學。能詩文。）

有漁者歌曰。漁不以目惟以心。心不在魚。漁更深。比溟之鯨。殊小小。一舉六鰲未足歛。敢問何如其爲漁耶。曰。吾將以斯道爲網。良知爲餌。太和爲餌。天地爲舫。絜之無意。散之無方。是謂得無所得而忘無可忘者矣。

登香爐峯次羅石韻

曾從爐鼎蹠天風。下數天南百二峯。勝事縱爲多病阻。幽懷還與故人同。旌旗影動星辰北。鼓角聲迴滄海東。世故茫茫渾未定。且乘溪月放歸篷。

觀從吾登爐峯絕頂戲贈

道人不柰登山癖。日暮猶思絕棧雲。巖底獨行穿虎穴。峯頭清嘯亂猿羣。清溪月出時尋寺。歸棹城隅夜款門。可笑中郎無好興。獨留松院坐黃昏。

書扇贈從吾

君家只在海西隈。日日寒潮去復迴。莫遣扁舟成久別。爐峯秋月望君來。

嘉靖甲申冬二十一日。再登秦望。自弘治戊午登後二十七年矣。將下。適董羅石與二三子來。復坐久之。暮歸。同宿雲門僧舍。

初冬風日佳。仗策登崔嵬。自予羈宦迹。久與山谷違。屈指廿七載。今茲復一來。沿溪尋往路。歷歷皆所懷。躋險還屢息。興在知吾衰。薄午際峯頂。曠望未能回。良朋亦偶至。歸路和徘徊。夕陽飛鳥靜。羣壑擊風泉。哀悠悠。觀化意。點也可與偕。

山中謾興

清晨急雨度珠扉。餘滴煙梢尚濕衣。雨水清明桃亂吐。沿溪風煖藥初肥。物情到底能容懶。世事從前頓覺非。自擬春光還自領。好誰歌詠月中歸。

挽潘南山

聖學宮牆亦久荒。如公精力可升堂。若爲千古經論手。只作移年著述忙。末俗澆漓風益下。平生辛苦意難忘。西風一夜山陽笛。吹盡南岡落木霜。

和董蘿石菜花韻

油菜花開滿地金。鶉鴉聲裏又春深。閭閻正苦饑民色。畝畝常懷老圃心。自有牡丹堪富貴。也從蜂蝶漫追尋。年年開落渾閑事。來賞何人共此襟。

天泉樓夜坐和蘿石韻

莫厭西樓坐夜深。幾人今夕此登臨。白頭未是形容老。赤子依然混沌心。隔水鳴榔聞過棹。映牕殘月見疎林。看君已得忘言意。不是當年只苦吟。

詠良知四首示諸生

箇箇人心有仲尼。自將聞見苦遮迷。而今指與真顏面。只是良知更莫疑。問君何事日憧憧。煩惱場中錯用功。却道聖門無口訣。良知兩字是參同。人人自定有盤針。萬化根緣總在心。却笑從前顛倒見。枝枝葉葉外頭尋。無聲無臭獨知時。此是乾坤萬有基。拋却自家無盡藏。沿門持鉢效貧兒。

示諸生三首

爾身各自天真。不問求人更問人。但致良知成德業。謾從故紙費精神。乾坤是易原非畫。心性何形得有塵。莫道先生學禪語。此言端的爲君陳。

人人有路透长安。坦坦平平一直看。盡道聖賢須有秘。翻嫌易簡却求難。只從孝弟爲堯舜。莫把辭章學柳韓。不

信自家原具足。請君隨事反身觀。
長安有路極分明。何事幽人曠不行。
遂使秦豕成間塞。儘教麋鹿自縱橫。
徒聞絕境勞懸想。指與迷途却浪驚。
冒險甘投蛇虺窟。顛崖墮壑竟亡生。

答人問良知二首

良知却是獨知時。此知之外更無知。
誰人不有良知在。知得良知却是誰。
知得良知却是誰。自家痛癢自家知。
若將痛癢從人問。痛癢何須更問爲。

答人問道

饑來喫飯倦來眠。只此修行玄更玄。
請與世人渾不信。却從身外覓神仙。

寄題玉芝庵（丙戌）

塵途駿馬勞千里。月樹鷓鴣足一枝。
身既了時心亦了。不須多羨碧霞池。

別諸生

綿綿聖學已千年。兩字良知是口傳。
欲識渾淪無斧鑿。須從規矩出方圓。
不離日用常行內。直造先天未畫前。
握手臨岐更何語。慇懃莫媿別離筵。

後中秋望月歌

一年兩度中秋節。兩度中秋一樣月。
兩度當筵望月人。幾人猶在幾人別。
此後望月幾中秋。此會中人知在否。
當筵莫惜慇懃望。我已衰年半白頭。

書扇示正憲

汝自冬春來。頗解學文義。
吾心豈不喜。顧此枝葉事。
如樹不植根。暫榮終必瘁。
植根可何如。顧汝且立志。

送蕭子離憲副之任

衰疾悟止足。閑居便靜修。探芝深谷底。考槃南澗頭。之子亦早見。枉帆經舊丘。幽尋意始結。公期已先逾。星途觸來暑。拯焚能自由。黃鶴一高舉。剛風翼難收。悔茲懸丘隴。回顧未忘憂。往志局千里。豈伊枋榆投。西上營四海。細人聊自謀。聖作正思治。吾衰亮何酬。所望登才俊。濟濟揚鴻休。隱者嘉肥遯。仕者當誰儔。寧無瘳寢念。宜急瘳瘳瘳。舍藏應有時。行矣毋淹留。

中秋

去年中秋陰復晴。今年中秋陰復陰。百年好景不多遇。况乃白髮相侵尋。吾心自有光明月。千古團圓永無缺。山河大地擁清輝。賞心何必中秋節。

嘉靖丙戌十二月庚申始得子。年已五十有五矣。六月。辭齋二丈。昔與先公同舉于鄉。聞之而喜。各以詩來賀。藹然世交之誼也。次韻爲謝。

海鶴精神老益強。晚途詩韻重圭璋。洗兒患比金錢貴。爛日光呈全井祥。何物敢云繼祖武。他年只好共爺長。偶逢燈事開湯餅。庭樹春風轉歲陽。

其二

自frac秋禾後吐芒。敢云琢玉晚珠璋。漫憑先德餘家慶。豈是生申降嶽祥。攜抱且堪娛老况。長成或可望書香。不辭歲歲臨湯餅。還見吾家第幾郎。

兩廣詩二十一首（嘉靖丁亥起平思田之亂）

秋日飲月日新構別王侍御

潮山久繫念。虛限形迹。遙望一水間。十年歷由期。軍旅起衰靡。驅馳豈遑息。前旌道回岡。取捷上崎側。新構鬱

層椒石門岬深寂。是時霜始降。風凌羣卉拆。整靜影江聲。臆虛涵海色。夕陰下西岑。涼月穿東壁。觀風此餘情。撫景見高臆。匪從羣公餞。何因得良覲。而微方如燬。救焚敢辭爾。來歸幸有期。終遂幽尋僻。

復過釣臺

憶昔過釣臺。驅馳正軍旅。十年今始來。復以兵戈起。空山煙霧深。往迹如夢裏。微雨林徑滑。肺病雙足抵。仰瞻臺上雲。俯濯臺下水。人生何碌碌。高尚當如此。瘡痍念同胞。至人匪爲己。過門不遑入。憂勞豈得已。滔滔良自傷。果哉末難矣。

右正德己卯。獻俘行在。過釣臺而弗及登。今茲復來。又以兵革之役。兼肺病足瘡。徒顧瞻悵望而已。書此付桐廬尹沈元材刻置亭壁。聊以紀經行歲月云耳。嘉靖丁亥九月廿二日書。時從行進士錢德洪王汝中。建德尹楊思臣及元材凡四人。

方思道送西峯

西峯隱真境。微燈臨道衢。行役空屢屢。過眼被塵迷。青林外延望。中閣何由窺。方子巖廊器。兼已雲霞姿。每逢泉石處。須刻棠陵詩。茲山秀常玉。之子囊中錐。翠峯灑秋氣。喬木含涼吹。此行非佳餞。誰爲發幽奇。柰何眷清賞。局促牽至期。悠悠傷絕學。之子亦如斯。爲君指周道。直往勿復疑。

西安雨中諸生出候。因寄德洪汝中。並示書院諸生。

幾度西安道。江聽暮雨時。機關鷗鳥破。踪跡水雲疑。仗鉞非吾事。傳經媿爾師。天真泉石秀。新有鹿門期。德洪汝中。方卜書院。盛稱天真之奇。并寄及之。

不踏天真路。依稀二十年。石門深竹逕。蒼峽瀉雲泉。泮壁環荷海。龜疇見宋田。文明原有象。卜築豈無緣。

寄石潭二絕

僕茲行無所樂。樂與二公一會耳。得見閑齋。固已如見石潭矣。留不盡之興於後期。豈謂樂不可極耶。聞尊恙已平。復必於不出口客。無乃大以界限自拘乎。奉次二絕。用發一笑。且以致不及請教之憾。見說新居止隔山。肩輿曉出暮堪還。知公久已藩籬撤。何事深林尚閉關。乘興相尋涉萬山。扁舟亦復及門還。莫將身病爲心病。可是無關却有關。

長生

長生徒有慕。苦乏大藥資。名山遍探歷。悠悠鬢生絲。微軀一繫念。去道日遠而中歲。勿有覺。九還乃在茲。非爐亦非鼎。何坎復何離。本無終始究。寧有死生期。彼哉遊方士。詭辭反增疑。紛然諸老翁。自傳困多岐。乾坤由我在。安用他求爲。千聖皆過影。良知乃吾師。

南浦道中

南浦重來夢裏行。當年鋒鏑尚心驚。旌旗不動山河影。鼓角猶傳草木聲。已喜閭閻多復業。獨憐餓殍未寬征。迂疎何有甘棠惠。慚愧香燈父老迎。

重登黃土腦

一上高原感慨重。千山落木正無窮。前途且與停西日。此地曾經拜北風。劍氣晚橫秋色淨。兵聲寒帶暮江雄。水南多少流亡屋。尙訴征求杵軸空。

過新溪驛

猶記當年築此城。廣猿湖寇止縱橫。人今樂業皆安堵。我亦經過一駐兵。香火沿門慚老稚。壺漿過道及從行。峯山擊手疲楚甚。且放歸農莫送迎。

夢中絕句

此予十五歲時夢中所作。今拜伏波祠下。宛如夢中。茲行殆有不偶然者。因識其事于此。

卷甲歸來馬伏波。早年兵法鬢毛皤。雲埋銅柱雷轟折。六字題詩尙不磨。

巴伏波廟二首

四十年前夢裏詩。此行天定豈人爲。徂征敢倚風雲陣。所過須同時雨師。倍喜遠人知向望。却慚無術救瘡痍。從來勝算歸廊廟。恥說兵戈定四夷。

樓船金鼓宿烏蠻。魚麗罕舟夜上灘。月遶旌旗千嶂靜。風傳鈴柝九溪寒。荒夷未必先聲服。神武山來不殺難。想見虞廷新氣象。兩塔干羽五雲端。

壞斷藤峽

纔看干羽格苗夷。忽見風雷起戰旗。六月徂征非得已。一方流毒已多時。遷黃玉石分須早。柳慶雲霓怨莫遲。嗟爾有司懲既往。好將恩信撫遺黎。

平八寨

見說韓公破此蠻。貔貅十萬騎連山。而今止用三千卒。遂爾收功一月間。豈是人謀能妙算。偶逢天助及師還。窮搜極討非長計。須有恩威化梗頑。

南寧二首

一駐南寧五月餘。始因遠過宿留虛。浮屠絕壁經殘燹。井灶沿村見廢墟。撫恤尙慚凋弊後。遊觀正及省耕初。近聞樵負歸猿窟。莫陋夷方不可居。

勞矣田人莫遠迎。瘡痍未定犬猶驚。殘餘破屋須先葺。雨後荒畝莫廢耕。歸喜逃亡來負櫛。貧憐絀綉綴旗旌。聖朝恩澤寬如海。甑餠盆魚縱爾生。

往歲破桶岡。宗舜祖世麟。老宣慰實來督兵。今茲思田之役。乃隨父致仕。宣慰明輔來從軍。目擊其父子孫三世。皆以忠孝相承相尚也。詩以嘉之。

宣慰彭明輔。忠勤顧益敦。歸師當五月。冒暑淨蠻氛。九霄雖已老。報國意尤勤。五月衝炎暑。回軍立戰勳。愛爾彭宗舜。少年多戰功。從親心已孝。報國意尤忠。

題甘泉居

我見甘泉居。近連菊坡麓。十年勞夢思。今來快心目。徘徊欲移家。山南尚堪屋。渴飲甘泉泉。飢食菊坡菊。行看羅浮雲。此心聊復足。

書泉翁壁

我祖死國事。肇禮在增城。荒祠幸新復。適來奉初蒸。亦有兄弟好。念言思一尋。蒼蒼徒葭色。宛隔環瀛深。入門散鬪史。想見抱膝吟。賢郎敬父執。童僕意相親。病軀不遑宿。留詩慰殷勤。落落千百載。人生幾知音。道通著形迹。期無負初心。

王文成公全書

卷二十一

外集三 書

答修太守求雨（癸亥）

昨楊李二丞來。備傳尊教。且詢致雨之術。不勝慚悚。今早誦節推辱臨。復申前請。尤爲懇至。令人益增惶懼。天道幽遠。豈凡庸所能測識。然執事憂勤爲民之意。真切如是。僕亦何可以無一言之復。孔子云。丘之禱久矣。蓋君子之禱。不在於對越祈祝之際。而在於日用操存之先。執事之治吾越。幾年於此矣。凡所以爲民祛患除弊興利而致福者。何莫而非先事之禱。而何俟於今日。然而暑旱尙存。而雨澤未應者。豈別有所以致此者歟。古者歲旱則爲之主者。減膳撤樂。省獄薄賦。修祀典。問疾苦。引咎賑乏。爲民遍請於山川社稷。故有叩天求雨之祭。有省咎自責之文。有歸誠請改之禱。著史記所載湯以六事自責。禮謂大雩。帝用盛樂。春秋書秋九月大雩。皆此類也。僕之所聞於古如是。未聞有所謂書符呪水而可以得雨者也。唯後世方術之士。或時有之。然彼皆有高潔不污之操。特立堅忍之心。雖其所爲不必合於中道。而亦有以異於尋常。是以或能致此。然皆出小說而不見於經傳。君子猶以爲附會之談。又况如今之方士之流。曾不少殊於市井囂頑。而欲望之以揮斥雷電。呼吸風雨之事。豈不難哉。僕謂執事且宜出齋於廳事。罷不急之務。聞省過之門。洗滌寃滯。禁抑奢繁。淳誠滌慮。痛自悔責。以爲八邑之民請於山川社稷。而彼方士之祈請者。聽民間從使得自爲之。但弗之禁。而不專倚以爲重輕。夫以執事平日之所操存。苟誠無愧於神明。而又臨事省惕。躬帥僚屬。致懇乞誠。雖天道亢旱。亦自有數。使人事良修。旬日之內。自

宜有應。僕雖不肖。無以自別於凡民。以誠使可有致雨之術。亦安忍坐視民患而恬不知顧。乃勞執事之僕。僕豈無人之心者耶。一二日內。僕亦將禱於南鎮。以助執事之誠。執事其但爲民悉心。以請毋惑於邪說。毋急於近名。天道雖遠。至誠而不動者。未之有也。

答毛憲副（戊辰）

昨承遣人喻以禍福利害。且令勉赴太府請謝。此非道誼深情。決不至此。感激之至。言無所容。但差人至龍塢陵。侮。此自差人挾勢擅威。非太府使之也。龍塢諸夷與之爭鬥。此自諸夷憤慍不平。亦非某使之也。然則太府固未嘗辱某。某亦未嘗傲太府。何所得罪而遽請謝乎。跪拜之禮。亦小官常分。不足以爲辱。然亦不當無故而行之。不當行而行。與當行而不行。其爲取辱一也。廢逐小臣。所守以待死者。忠信禮義而已。又棄此而不守。禍莫大焉。凡禍福利害之爭。某亦嘗講之。君子以忠信爲利。禮義爲福。苟忠信禮義之不存。雖祿之萬鍾。爵以侯王之貴。君子猶謂之禍與害。如其忠信禮義之所在。雖剖心碎首。君子利而行之。自以爲福也。况於流離竄逐之微乎。某之居此。蓋療癘蠱毒之與處。魍魎魍魎之與游。日有三死焉。然而居之泰然。未嘗以動其中者。誠知生死之有命。不以一朝之患而忘其終身之憂也。太府苟欲加害。而在我誠有以取之。則不可謂無憾。使吾無有以取之。而橫罹焉。則亦瘴癘而已。爾。蠱毒而已。魍魎魍魎而已。爾。吾豈以是而動吾心哉。執事之諭。雖有所不敢承。然因是而益知所以自勵。不敢苟有所墜墜。則某也受教多矣。敢不頓首以謝。

與安宣慰（戊辰）

某得罪朝廷而來。惟竄伏陰崖幽谷之中。以禦魍魎。同其所宜。故雖風聞使君之高誼。經旬月而不敢見。若甚簡伉者然。省愆內訟。痛自削責。不敢比數於冠裳。則亦泯臣之禮也。使君不以爲過。使廩人餽粟。庖人餽肉。園人代薪水之勞。亦寧不貴使君之義。而諒其爲情乎。自惟罪人。何可以辱守土之大夫。懼不敢當。輒以禮辭。使君復不

以爲罪。昨者又重之以金帛。副之以鞍馬。禮益隆。情益至。某益用震悚。是重使君之辱。而甚逐臣之罪也。愈有所不敢當矣。使者堅不可卻。求其說而不得。無已其周之乎。周之亦可受也。敬受米二石。柴炭鴨鷄。悉受如來數。其諸金帛鞍馬。使君所以交於卿士大夫者。施之逐臣。殊駭觀聽。敢固以辭。伏惟使君處人以禮。恕物以情。不至再辱。則可矣。

二（戊辰）

減驛事。非罪人所敢與聞。承使君厚愛。因使者至。聞問及之。不謂其遂達諸左右也。悚息悚息。然已承見詢。則又不可默。凡朝廷制度。定自祖宗。後世守之。不可以擅改。在朝廷且謂之變亂。况諸侯乎。縱朝廷不見罪。有司者將執法以繩之。使君必日無益。縱幸免於一時。或五六年。或八九年。雖遠至二三十年矣。當事者猶得持典章而談其後。若是則使君何利焉。使君之先。自漢唐以來千百幾年。土地人民。未之或改。所以長久若此者。以世守天子禮法。竭忠盡力。不敢分寸有所違。是故天子亦不得踰禮法。無故而加諸忠良之臣。不然。使君之土地人民。富且盛矣。朝廷悉取而郡縣之。其誰以爲不可。夫驛可減也。亦可增也。驛可改也。宣慰司亦可革也。由此言之。殆甚有害。使君其未之思耶。所云奏功陞職事。意亦如此。夫剷除寇盜。以撫綏平良。亦守土之常職。今纓屨以要。則朝廷平日之恩寵祿位。願將欲以何爲。使君爲參政。亦已非守官之舊。今又干進不已。是無抵極也。勢必不堪。夫官慰守土之官。故得以世有。其上地人民。若參政則流官矣。東西南北。惟天子所使。朝廷下方尺之檄。委使君以一職。或閩或蜀。其敢弗行乎。則方命之誅。不旋踵而至。捧檄從事。千百年之土地人民。非復使君有矣。由此言之。雖今日之參政。使君將功辭去之不速。其又可再乎。凡此以利害言。揆之於義。反之於心。使君必自有不安者。夫拂心違義而行。衆所不與。鬼神所不嘉也。承問及。不敢不以正對。幸亮察。

三（戊辰）

阿賈阿札等畔宋氏。爲地方患。傳者謂使君使之。此雖或出於妬婦之口。然阿賈等自言使君嘗錫之以氈刀。漬之以弓弩。雖無其心。不幸乃有其迹矣。始三堂兩司得是說。卽欲問之於朝。旣而以使君平日忠實之故。未必有是。且信且疑。姑令使君討賊。苟遂出軍勦撲。則傳聞皆妄。何可以濫及忠良。其或坐觀逗遛。徐議可否。亦未爲晚。故且隱忍其議。所以待使君者甚厚。旣而移文三下。使君始出。衆論紛紛。疑者將信。喧騰之際。適會左右來獻阿麻之首。偏師出解洪邊之圍。羣公又復徐徐。今又三月餘矣。使君稱疾歸臥。諸軍以次潛回。其道分屯寒堡者。不開擒斬以宣國威。惟增剽掠以重民怨。衆情愈益不平。而使君之民。罔所知識。方揚言於人。謂宋氏之難。當使宋氏自平。安氏何與。而反爲之役。我安氏連地千里。擁衆四十八萬。深坑絕地。飛鳥不能越。猿猴不能攀。統遠高坐。不爲宋氏出一卒。人亦卒如我何。斯言已稍稍傳播。不知坐堂兩司已嘗聞之否。使君誠久臥不出。安氏之禍。必自斯言始矣。使君與宋氏同守上。而使君爲之長。地方變亂。皆守上者之罪。使君能獨委之宋氏乎。夫連地千里。孰與中土之一大部。擁衆四十八萬。孰與中土之一部司。深坑絕地。安氏有之。然如安氏者。環四面而居。以百數也。今播州有楊愛。愷黎有楊友。酉陽保靖有彭麒等諸人。斯言苟聞於朝。朝廷下片紙於楊愛諸人。使各自爲戰。共分安氏之所有。蓋朝令而夕無安氏矣。深坑絕地。何所用其險。使君可無寒心乎。且安氏之職。四十八支。更迭而爲。今使君獨傳者三世。而羣支莫敢爭。以朝廷之命也。苟有可乘之釁。孰不欲起而代之乎。然則揚此言於外。以速安氏之禍者。殆漁人之計。蕭牆之憂。未可測也。使君宜速出軍。平定反側。壞衆讒之口。息多端之議。弭方輿之變。絕難測之禍。補旣往之愆。安將來之福。某非爲人作說客者。使君幸熟思之。

答人問神曲（戊辰）

詢及神仙有無。兼請其事。三至而不答。非不欲答也。應可答耳。昨令弟來。必欲得之。僕誠生八歲而卽好其說。今已餘三十年矣。齒漸搖動。髮已有一三莖變化成白。目光僅盈尺。聲聞函丈之外。又常經月臥病不出。藥量驟進。

此殆其効也。而相知者猶妄謂之能得其道。足下又妄聽之。而以見詢。不得已。姑爲足下妄言之。古有至人。淳德凝道。和於陰陽。調於四時。去世離俗。積精全神。遊行天地之間。視聽八遠之外。若廣成子之千五百歲而不衰。李伯陽歷商周之代。西度函谷。亦嘗有之。若是而謂之曰無。疑於欺子矣。然則呼吸動靜。與道爲體。精骨完久。稟於受氣之始。此殆天之所成。非人力可強也。若後世拔宅飛昇。點化投奪之類。譎怪奇駭。是乃祕術曲技。尹文子所謂幻。釋氏謂之外道者也。若是而謂之曰有。亦疑於欺子矣。夫有無之間。非言語可況。存久而明。養深而自得之。未至而強喻。信亦未必能及也。蓋吾儒亦自有神仙之道。顏子三十二而卒。至今未亡也。足下能信之乎。後世上陽子之流。蓋方外技術之上。未可以爲道。若蓬磨慧能之徒。則庶幾近之矣。然而未易言也。足下欲聞其說。須退處山林三十年。全耳目。一心志。習中洒洒。不掛一塵。而後可以言此。今去仙道尚遠也。妄言不罪。

答徐成之（壬午）

承以朱陸同異見詢。學術不明於世久矣。此正吾儕今時之所宜明辨者。細觀來教。則輿庵之主象山既失。而吾兄之主晦庵亦未爲得也。是朱非陸。天下之論定久矣。久則難變也。雖微吾兄之爭。輿庵亦豈能遽行其說乎。故僕以爲二兄今日之論。正不必求勝。務求象山之所以非。晦庵之所以是。窮本極源。真有以見其幾微得失於毫忽之間。若明者之聽訟。其事之曲者。既有以辨其情之不得已。而辭之直者。復有以察其處之或未當。使受罪者得以伸其情。而獲伸者亦有所不得辭其責。則有以盡夫事理之公。即夫人心之安。而可以俟聖人於百世矣。今二兄之論。乃若出於求勝者。求勝。即是動於氣也。動於氣。則於義理之正。何啻千里。而又何是非之論乎。凡論古人得失。決不可以意度而懸斷之。今輿庵之論象山曰。雖其專以尊德性爲主。未免墮於禪學之虛空。而其持守端實。終不失爲聖人之徒。若晦庵之一於道問學。則支離決裂。非復聖門誠意正心之學矣。吾兄之論晦庵曰。雖其專以道問學爲主。未免失於俗學之支離。而其循序漸進。終不背於大學之訓。若象山之一於尊德性。則虛無

寂滅。非復大學格物致知之學矣。夫既曰尊德性。則不可謂墮於禪學之虛空。墮於禪學之虛空。則不可謂之尊德性矣。既曰道問學。則不可謂失於俗學之支離。失於俗學之支離。則不可謂道問學矣。二者之辨。間不容髮。然則二兄之論。皆未免於意度也。昔者子思之論學。蓋不下千百言。而括之以尊德性而道問學之一語。即如二兄之辨。一以尊德性爲主。一以道問學爲事。則是二者固皆未免於一偏。而是非之論。尚未有所定也。烏得各持一是而遽以相非爲乎。僕願二兄置心於公平正大之地。無以爭勝。夫論學而務以求勝。豈所謂尊德性乎。豈所謂道問學乎。以其所見。非獨吾兄之非象山與庵之非晦庵。皆失之罪。而吾兄之是晦庵與庵之是象山。亦皆未得其所以是也。稍暇當面悉。好務養心息辨毋遽。

二（壬午）

昨所奉答。適有遠客酬對。紛紜不暇細論。姑願二兄息未定之俗。各反究其所是者。必己所是已無絲髮之憾。而後可以及人之非。早來承教。乃爲僕漫爲含糊兩解之說。而細釋辭旨。若有以陰助與庵而爲之地者。讀之不覺失笑。曾謂吾兄而亦有是言耶。僕嘗以爲君子論事。當先去其有我之私。一動於有我。則此心已陷於邪僻。雖所論盡合於理。既已亡其本矣。嘗以是言於朋友之間。今吾兄乃云。爾敢不自反。其殆陷於邪僻而弗覺也。求之反復。而昨者所論。實未嘗有是。則斯言也。無乃吾兄之過歟。雖然。無是心而言之未盡於理。未得爲無過也。僕敢自謂其言之已盡於理乎。請舉二兄之所是者以求正。與庵是象山而謂其專以尊德性爲主。今觀象山文集所載。未嘗不教其徒讀書窮理。而自謂理會文字。頗與人異者。則其意實欲體之於身。其亟所稱述以誨人者。曰居處恭。執事敬。與人忠。曰克己復禮。曰萬物皆備於我。反身而誠。樂莫大焉。曰學問之道無他。求其放心而已。曰先立乎其大者。而小者不能奪。是數言者。孔子孟軻之言也。烏在其爲空虛者乎。獨其易簡覺悟之說。頗爲當時所疑。然易簡之說。出於蘇轍覺悟之說。雖有同於釋氏。然釋氏之說。亦自有同於吾儒。而不害其爲異者。惟存於幾微。

毫忽之間而已。亦何必諱於其同。而遂不敢以言。狃於其異。而遂不以察之乎。是與庵之是象山。固猶未盡其所以是也。吾兄是晦庵。而謂其專以道問學爲事。然晦庵之言曰。居敬窮理。曰非存心無以致知。曰君子之心。常存敬畏。雖不見聞。亦不敢忽。所以存天理之本。然而不使離於須臾之頃也。是其爲言。雖未盡瑩。亦何嘗不以尊德性爲事。而又烏在其爲支離者乎。獨其中日汲汲於訓解。雖韓文楚辭。陰符參同之屬。亦必與之註釋考辯。而論者遂疑其玩物。又其心慮。恐學者之躡等。而或失之於妄作。使必先之以格致。而無不明。然後有以實之於誠正。而無所謬。世之學者。掛一漏萬。求之愈繁。而失之愈遠。至有敝力終身。苦其難。而卒無所入。而遂議其支離。不知此乃後世學者之弊。而當時晦庵之自爲。則亦豈至是乎。是吾兄之是晦庵。固猶未盡其所以是也。夫二兄之所以信而是者。既未盡其所以是。則其所疑而非者。亦豈必盡其所以非乎。然而二兄往復之辯。不能一反焉。此僕之所以疑其或出於求勝也。一有求勝之心。則已亡其學問之本。而又何以謂之爲哉。此僕之所以惟願二兄之自反也。安有所謂舍胡兩解。而陰爲與庵之曲者哉。夫君子之論學。要在得之於心。衆皆以爲是。苟求之心而未嘗會焉。未敢以爲是也。衆皆以爲非。苟求之心而有契焉。未敢以爲非也。心也者。吾所得於天之理也。無間於天人。無分於古今。苟盡吾心以求焉。則不中不遠矣。學也者。求以盡吾心也。是故尊德性而道問學。尊者。尊此天也。道者。道此者也。不得於心。而惟外信於人。以爲學。烏在其爲學也。已。僕嘗以爲晦庵之與象山。雖其所爲學者。若有不同。而要皆不失爲聖人之徒。今晦庵之學。天下之人。童而習之。既已入人之深。有不容於論辨者。而獨惟象山之學。則以其嘗與晦庵之有言。而空藩離之。使若由賜之殊科焉。則可矣。而遂擯放廢斥。若砮矜之與美玉。則豈不過甚矣乎。夫晦庵折衷。以儒之說。以發明六經語孟之旨於天下。其嘉惠後學之心。真有不可得而議者。而象山辨義利之分。立大本。求放心。以示後學。篤實爲己者道。其功亦寧可得而盡誣之。而世之儒者。附和雷同。不究其實。而敢目之以禪學。則誠可冤也已。故僕嘗欲冒天下之譏。以爲象山一暴其說。雖以此得罪無恨。僕於晦庵。

亦有罔極之恩。豈欲操戈而入室者。顧晦庵之學。既已若日星之章明於天下。而象山獨蒙無實之誣。于今且四百年。莫有爲之一洗者。使晦庵有知。將亦不能一日而安享於廟廡之間矣。此僕之至情。終亦必爲吾兄一吐者。亦何肯漫爲兩解之說。以陰助於輿庵。輿庵之說。僕尤恨其有未盡也。夫學術者。今古聖賢之學術。天下之所公共。非吾三人者所私有也。天下之學術。當爲天下公言之。而豈獨爲晦庵地哉。兄又舉太極之辨。以爲象山於文義。日有所未能通曉。而其強辨自信。曾何有於所養。夫謂其文義之有未詳。不害其爲有未詳也。謂其所養之未至。不害其爲未至也。學未至於聖人。寧免太過不及之差乎。而論者遂欲以是而蓋之。則吾恐晦庵禪學之譏。亦未免有激於不平也。夫一則不審於文義。一則有激於不平。是皆所養之未至。昔孔子大聖也。而猶曰假我數年。以學易。可以無大過。仲虺之贊成湯。亦惟曰改過不吝而已。所養之未至。亦何傷於二先生之爲賢乎。此正晦庵象山之氣象。所以未及於顏子明道者在此。吾儕正當仰其所以不可及。而默識其所未至者。以爲涵養規切之方。不當置偏私於其間。而有所附會增損之也。夫君子之過也。如日月之食。人皆見之。更也。人皆仰之。而小人之道也。必文。世之學者。以晦庵大儒。不宜復有所謂過言。而必曲爲隱飾。增加務詆象山於禪學。以求伸其說。且自以爲有助於晦庵。而更相倡引。謂之扶持正論。不知晦庵乃君子之過。而吾反以小人之見而文之。晦庵有聞過則喜之美。而吾乃非徒順之。又從而爲之辭也。晦庵之心。以聖賢君子之學。期後代。而世之儒者。事之以事小人之禮。是何誣象山之厚。而待晦庵之薄邪。僕今者之論。非獨爲象山惜。實爲晦庵惜也。兄視僕平日於晦庵。何如哉。而乃有是論。是亦可以諒其爲心矣。惟吾兄去世俗之見。宏虛受之感。勿求其必同。而察其所以異。勿以無過爲聖賢之高。而以改過爲聖賢之學。勿以其有所未至者爲聖賢之諱。而以其常懷不滿者爲聖賢之心。則兄與輿庵之論。將有不待辨說。而釋然以自解者。孟子云。君子亦仁而已。何必同。惟吾兄審擇而正之。

盛价來。適人事紛紜。不及細詢。比來事既還。却殊快快。承示劉生墓誌。此實友義所關。文亦縝密。獨叙乃父側室事。頗傷忠厚。未刻石。刪去之爲佳。子於父過。諫而過激。不可以爲幾。稱子之美。而發其父之陰弘。不可以爲訓。宜更詳之。喻及交際之難。此殆謬於弘意。君子與人。惟義所在。厚薄輕重。已無所私焉。此所以爲簡易之道。世人心難於計較。毀譽得喪。交於中。而眩其當然之則。是以處之愈周。計之愈悉。而行之愈難。夫大賢吾師。次賢吾友。此天理自然之則。豈以是爲炎涼之嫌哉。吾兄以僕於今之公卿。若某之賢者。則稱謂以友生。若果與某之賢不及於某者。則稱謂以待生。豈以矯時俗炎涼之弊。非也。夫彼可以爲吾友。而吾可以友之。彼又吾友也。吾安得而弗友之。彼不可以爲吾友。而吾不可以友之。彼又不吾友也。吾安得而友之。夫友也者。以道也。以德也。天下莫大於道。莫貴於德。道德之所在。齒位不得而干焉。僕於某之謂矣。彼其無道與德。而徒有其貴與齒也。則亦貴齒之而已。然若此者。與之見亦寡矣。非以事相臨。不往見也。若此者。與凡交游之隨俗以侍生而來者。亦隨俗而侍生之。所謂事之無害於義者。從俗可也。千乘之君。求與之友。而不可得。非在我有所不屑乎。嗟乎。友未易言也。今之所謂友。或以藝同。或以事合。徇名逐勢。非吾所謂輔仁之友矣。仁者心之德。人而不仁。不可以爲人。輔仁求以全心德也。如是而後友。今特以技藝文辭之工。地勢聲望之重。而豁然欲以友乎賢者。賢者弗與也。吾兄技藝炎涼之說。貴賤少長之論。殆皆有未盡歟。孟子曰。友也者。不可以有挾。孟獻子之友五人。無獻子之家者也。曾以貴賤乎。仲由少顏路三歲。回由之贈處。蓋友也。回與曾點同時。參曰。昔者吾友。曾以少長乎。將矯時俗之炎涼。而自畔於禮。其間不能以寸矣。吾兄又以僕於後進之來。其質美而才者。多以先後輩相處。其庸下者。反待以客禮。疑僕別有一道。是道也。奚有於別。凡後進之來。其才者。皆有意於斯道者也。吾安得不以斯道處之。其庸下者。不過世俗泛然一接。吾亦世俗泛然待之。如鄉人而已。昔伊川初與呂希哲爲同舍友。待之友也。既而希哲師事伊川。待之弟子也。謂敬於同舍而慢於弟子可乎。孔子待陽貨以大夫。待回賜以弟子。謂待回賜不若陽貨可乎。師友

道廢久。後進之中。有聰明特達者。頗知求道。往往又爲先輩待之不誠。不諒其心。而務假以虛體。以取悅於後進。干待士之譽。此正所謂病於夏畦者也。以是師友之道日益淪沒。無由復明。僕常以爲世有周程諸君子。則吾固得而執弟子之役。乃大幸矣。其次有周程之高弟焉。吾猶得而私淑也。不幸世又無是人。有志之士。悵悵其將焉求乎。然則何能無憂也。憂之而不以責之己。責之己而不以求輔於人。求輔於人而待之不以誠。終亦必無所成而已耳。凡僕於今之後進。不敢以師道自處也。將來其聰明特達者。與之講明。因以自輔也。彼自以後進求正於我。雖不師事我。固有先後輩之道焉。伊。瞑目而坐。游揚侍立。不敢去。重道也。今世習於曠肆。憚於檢節。不復知有此事。幸而有一二後進。略知求道爲事。是不復明之機。又不誠心直道與之發明。而徒闔然媚世。苟且阿俗。僕誠痛之。惜之。傳曰。師嚴然後道尊。道尊然後民知敬學。夫人必有所嚴憚。然後言之而聽之也。審施之而承之也。肅。凡若此者。皆求以明道。皆循理而行。非有容私於其間也。伊尹曰。天之生斯民也。使先知覺後知。使先覺覺後覺。予天民之先覺也。非予覺之而誰也。是故大知覺於小知。小知覺於無知。大覺覺於小覺。小覺覺於無覺。夫已大知大覺矣。而後以覺於天下。不亦善乎。然而未能也。遂自以小知小覺。而不敢以覺於人。則終亦莫之覺也。仁者固如是乎。夫仁者已欲立而立人。己欲達而達人。僕之意。以爲己有分寸之知。即欲同此分寸之知於人。己有分寸之覺。即欲同此分寸之覺於人。人之小知小覺者益衆。則其相與爲知覺也益易。以明如是。而後大知大覺可期也。僕於今之後進。尚不敢以小知小覺自處。譬之凍餒之人。知耕桑之可以足衣食。而又偶聞藝禾樹桑之法。將試爲之。而遂以告其凡凍餒者使之共爲之也。亦何嫌於己之未嘗樹藝。而遂不以告之乎。雖然。君子有諸己。而後求諸人。僕蓋未嘗有諸己也。而可以求諸人乎。夫亦謂其有意於僕而來者耳。承相問。輒縷縷至此。有未當者。不措往復。

昨者草率奉報。意在求正。不覺蕪冗。承長箋批答。推許過盛。殊增悚汗也。來喻書僕不以師道自處。恐亦未爲識心直道。顧僕何人。而敢以師道自處哉。前書所謂以前後輩處之者。亦謂僕有一日之長。而彼又有求道之心者耳。若其年齒相若。而無意於求道者。自當如常待以客禮。安得例以前後輩處之。其亦妄矣。又况不揆其來意之如何。而抗顏以師道自居。世寧有是理邪。夫師法者。非可以自處得也。彼以是求我。而我以是應之耳。嗟乎。今之時孰有所謂師云乎哉。今之習技藝者。則有師。習舉業求聲利者。則有師。彼誠知技藝之可以得衣食。舉業之可以得聲利。而希美官爵也。自非誠知己之性分。有急於衣食官爵者。孰肯從而求師哉。夫技藝之不習。不過乏衣食。舉業之不習。不過無官爵。己之性分有所蔽悖。是不得爲人矣。人雖明彼而暗此也。可不哀乎。往時僕與王寅之劉景素同遊太學。每季者。寅之拔居景素前列。然寅之自以爲講貫不及景素。一旦執弟子禮師之。僕每嘆服以爲如寅之者。真可爲豪傑之上。使寅之易此心以求道。亦何聖賢之不可及。然而寅之能於彼不能於此也。曾子病革而易箴。子路臨絕而結纓。橫渠徹虎皮而使其子弟從講於二程。惟天下之大。勇無我者能之。今天下波頹風靡。爲日已久。何異於病革臨絕之時。然又人是己。莫肯相下求正。故居今之世。非有豪傑獨立之士。的見性分之不容己。毅然以聖賢之道自任者。莫之從而求師也。吾兄又疑後進之來。其資稟意向雖不足以承教。若其齒之相遠者。恐亦不當概以客禮相待。僕進書所及。蓋與有意於斯道者相屬而言。亦謂其可以客可以無客者耳。若其齒數邈絕。則名分具存。有不待言矣。孔子使闕黨童子將命曰。吾見其居於位也。見其與先生並行也。非求益者也。欲速成者也。亦未嘗無悔焉。雖然。此皆以不若己者言也。若其德器之夙成。識見之超詣者。雖生於吾後數十年。其大者吾師。次者吾友也。得以齒序論之哉。人歸邊劇。極潦草。使問批復可否。不一。

答何子元（壬申）

來書云。禮曾子問。諸侯見天子。人門。不得終禮。廢者幾。孔子曰。四。又問。諸侯相見。揖人門。不得終禮。廢者幾。孔

子曰。六。而日食存焉。曾子曰。當祭而日食。太廟火。其祭也如之何。孔子曰。接祭而已矣。如牲至未殺。則廢。孟春於此有疑焉。天子崩。太廟火。后夫人之喪。兩宮服。容。此事之不可期。或適相值。若日食。則可預推也。諸侯行禮。獨不容以少避乎。祭又何必專於是日。而匆匆於接祭哉。牲未殺。則祭廢。當殺牲之時。而不知日食之候者。何也。執事幸以見教。千萬千萬。

承喻曾子問日食接祭之說。前此蓋未嘗有疑及此者。足見爲學精察。深用嘆服。如某淺昧。何足以辨此。古者天子有日官。諸侯有日御。日官居卿以底日。日御不失日以授百官之朝。豈有當祭之日而尙未知有日食者。夫子答曾子之間。竊意春秋之時。日官多失其職。固有日食而弗之知者矣。堯命羲和。敬授人時。何重也。仲康之時。去堯未遠。羲和已失其職。迷於日月象。至日食罔聞知。故有微之。降及商周。其職益輕。平王東遷。政教號令不及於天下。自是而後。官之失職。又可知矣。春秋所書日食三十有六。今以左傳考之。其以鼓用牲幣于社及其他變常失禮書者三之一。其以官失其職書者四之二。凡日食而不書朔日者。杜預皆以爲官失之。故其必有考也。經恒公十七年冬十月朔。日有食之。傳曰。不書日。官失之也。僖公十五年夏五月。日有食之。傳曰。不書朔與日。官失之也。則傳固已言之矣。襄公之二十七年冬十二月乙卯朔。日有食之。而傳曰。辰在申。司曆過也。再失閏矣。夫推候之謬。至於再失閏。則日食之不知。殆其細者矣。古之祭者。七日戒。三日齋。致其誠敬。以交於神明。謂之當祭。而日食。則固已行禮矣。如是而中輟之。不可也。接者。疾速之義。其儀節固已簡略。接祭則可兩全而無害矣。况此以天子嘗禘郊社而言。是乃國之大祀。若其他小祭。則或自有可廢者。在權其輕重而處之。若祭于太廟。而太廟火。則亦似有不得不廢者。然此皆無明文。竊意其然。不識高而且以爲何如也。

上晉溪司馬（戊寅）

柘衡諸處。孽孽滿軫。尚多。蓋緣進剿之時。彼省土兵不甚用命。而廣兵防夾。又復稍遲。是以致此。其在目今。若無

凶荒之災。兵革之釁。料亦未敢動作。但恐一二年後。則有所不能保耳。今大征甫息。勢既未可輕舉。而地方新遭
士兵之擾。復不堪重困。將紓目前之患。不渴添立屯堡。若欲稍爲經久之圖。亦不過建立縣治。然此二端。彼省鎮
巡已嘗會奏舉行。生雖復往。豈能別有區畫。但度其事勢。屯堡之設。雖可以張布聲威。然使守瞭日久。未免怠弛
散歸。無事則虛具名數。冒費糧餉。有急則張皇賊勢。復須調兵。此其勢之所必至者。惟建縣一事。頗爲得策。又聞
所設縣分。乃瓜分兩省三縣之地。彼此各吝土地。人民豈肯安然割己所有以資異省別郡。必有紛爭異同之論。
未能歸一。則立縣之舉。勢亦未易成就。既承委責。亦已遣人再往詢訪。苟有利弊。稍可裨益者。當復舉請。但因閩
事孔棘。遙聞廟堂之議。亦欲畧以見責。故且未敢輒往。檇桂。然勅書又未見到。則閩中亦不敢遽往。且夕諮訪。其
事頗悉。頗未。一慨閩中之變。亦由積漸所致。其始作於延平。繼發於邵武。又繼發於建寧。發於汀漳。發於沿海諸
衛所。其間警聞雖小大不一。然亦皆因倡於前者。略無懲創。遂敢效尤。而與今省城渠魁雖已授首。人心尙爾驚
惶未定。邵武諸處。尤不可測。急之必致變。縱而不問。將來之禍。尤有不可勝言者。蓋福建之軍。縱恣驕悍。已非一
日。既無漕運之勢。又無征戍之役。飽食安坐。衛賦不及。居則腴民之膏血。以供其糧。有事返藉民之子弟而爲之
門。有司象養若驕子。百姓疾畏如虎狼。罔不如意。呼喚羣聚而起。焚掠居民。綁答官吏。氣箠所加。帖然惟其所欲
而後已。今其勢既盈。如將潰之隄。岌乎洶洶。匪朝伊夕。雖有智者。難善其後。固非迂劣如守仁者所能辦此也。又
况積弱之軀。百病侵剝。近日復聞祖母病危。日夜痛苦。方寸已亂。豈復堪任。臨期敗事。罪戾益重。輒敢先以情訴
狀。服曲加矜憫。改授能者。使生得全首領。歸延殘息於田野。非生一人之幸。實一省數百萬生靈之幸也。情蹙辭
隘。忘其突冒。死罪死罪。

二(己卯)

齋奏人回。每辱頒教。接引開樹。勲倦勞憊。不一而足。仁人君子。愛物之誠。與人之厚。雖在木石。亦當感動激發。而

况於人乎。無能報謝。銘諸心腑而已。生始懇疏乞歸。誠以祖母鞠育之恩。思一面爲訣。後竟牽滯兵戈。不及一見。卒抱終天之痛。今老父衰疾。又復日亟。而地方已幸無事。且蒙朝廷曾有賊平來說之旨。若再拘縛。便不獲一申其情。後雖萬死。無以贖其痛恨矣。老先生亦何惜一舉手投足之勞。而不以曲全之乎。今生已移疾舟次。若復候命不至。斷亦逃歸。死無所憾。老先生亦何惜一舉手投足之勞。而必欲置之有罪之地乎。情隘辭迫。瀆冒威嚴。臨紙涕泣。不知所云。死罪死罪。

上彭幸庵（壬午）

不孝延禍先子。自惟罪逆深重。久摺絕於大賢君子之門矣。然猶強息忍死。未即殞滅。又復有所控籲。痛惟先子平生孝友剛直。言行一出。其心之誠然。而無所飾於其外。與人不爲邊幅。而至於當大義。臨大節。則毅然奮卓。而不可回奪。忝從大夫之後。逮事先朝。亦旣荐破知遇。中遭逆瑾之變。浪伏田野。忠貞之志。抑而不申。近幸中興之會。聖君賢相。方與振廢起舊。以發舒幽枉。而先子則長已矣。德蘊壅閼而未宣。終將泯溺於俗。豈不痛哉。伏惟執事才德勳烈。動一世。忠貞之節。剛大之氣。屹然獨峙。百感不搖。真足以廉頑而立懦。夫子求舊圖新。復起以相。海內仰望其風采。凡天下之韜伏堙滯。窒而求通。絀而求直者。莫不延頸跂足。望下風而奔訴。况先子素辱知與。不肯孤亦嘗受教於門下。近者又蒙爲之刷垢雪穢。謬承推引之恩。蓋不一而足者。反自疎外。不一以其情爲請。是委先子於溝壑。而重棄於大賢君子也。不孝之罪。不滋爲甚歟。先子之沒。有司以贈諡乞。非執事之憫之也。而爲之一表口焉。其敢覬覦於萬一乎。荒迷懇迫。不自知其僭罔。瀆冒。死罪死罪。

寄楊遂庵閣老（壬午）

孤聞之。昔古之君子之葬其親也。必求名世大賢君子之言以圖其不朽。然而大賢君子之生不數數於世。固有世有其人而不獲同其時者矣。又有同其時而限於勢分。無由自通於門牆之下者矣。則夫圖不朽於斯人者。不

亦難乎。痛惟先君。室心制行。庶亦無愧於古人。雖已忝在公卿之後。而遭時未久。志未大行。道未大明。取嫉權奸。斂德而歸。今則復長已矣。不孝孤將以是歲之冬。舉葬事。圖所以爲不朽者。惟墓石之誌爲重。伏惟明公道德文章。師表一世。言論政烈。儀刑百辟。求之昔人。蓋歐陽文忠。范文正。韓魏公其人。所謂名世之大賢君子。非明公其誰歟。不幸而生不同時也。則亦已矣。幸而猶及在後進之末。雖明公固所不屑揮之門牆之外。猶將冒昧強顏而人焉。况先君幸辱知與。不肖孤又嘗在屬吏之末。受教受恩。懷知己之感。有道誼骨肉之愛。邇者又嘗辱使臨吊。寵之以文詞。惻然憫念其遺孤。而不忍遽棄遺之者。是以忘其不孝之罪。犯僭踰之戮。而輒敢以誌爲請。伏惟明公休休容物。篤厚舊故。甄陶一世之上。而各欲成其名。收錄小大之才。而惟恐沒其善。則如先君之素受知愛者。其忍靳言之惠。而使之泯然無聞於世耶。不腆先人之幣。敢以陸司業之狀。先於將命者。惟明公特垂哀矜。生死受賜。世世子孫。捐軀殞命。未足以爲報也。不勝惶悚頓越之至。荒泯無次。

二（癸未）

前日嘗奉啓。計已上達。自明公進秉機密。天下士夫。忻忻然動顏相慶。皆爲太平可立致矣。門下鄙生。獨切生憂。以爲猶甚難也。亨屯傾否。當今之時。舍明公無可以望者。則明公雖欲西避乎此。將亦有所不能。然而萬斛之舵。操之非一手。則緩急折旋。豈能盡如己意。臨事不得專操舟之權。而僨事乃與同覆舟之罪。此鄙生之所謂難也。夫不專其權。而漫同其罪。則莫若預逃其任。然在明公。亦既不能逃矣。逃之不能。專又不得。則莫若求避其罪。然在明公。亦終不得避矣。天下之事。果遂卒無所爲歟。夫惟身任天下之禍。然後能操天下之權。操天下之權。然後能濟天下之患。當其權之未得。其致之甚難。而其歸之也。則操之甚易。萬斛之舵。平時從而爭操之者。以利存焉。且風濤顛沛。變起不測。一方皇惑。喪。救死。一迫。而誰復與爭操乎。於是起而專之。衆將恃以無恐。而事因以濟。苟亦從而委靡焉。固淪胥以溺矣。故曰。其歸之也。則操之甚易者。此也。古之君子。洞物情之向背。而握其機。

察陰陽之消長以乘其運。是以動必有成。而吉無不利。伊且之於商周是矣。其在漢唐。蓋亦庶幾乎此者。雖其學術有所不逮。然亦足以定國本而安社稷。則亦斷非後世偷生苟免者之所能也。夫權者。天下之大利大害也。小人竊之。以成其惡。君子用之。以濟其善。固君子之不可一日去。小人之不可一日有者也。欲濟天下之難。而不操之以權。是猶倒持太阿。而授人以柄。希不割矣。故君子之致權也。有道。本之至誠。以立其德。植之善類。以多其輔。示之以無不容之量。以安其情。擴之以無所競之心。以平其氣。昭之以不可奪之節。以端其向。神之以不可測之機。以攝其奸。形之以必可賴之智。以收其望。坦然爲之。以上之。退然爲之後。以先之。是以功蓋天下而莫之嫉。善利萬物而莫與爭。此皆明公之能事。素所蓄而有者。惟在倉卒之際。身任天下之禍。決起而操之耳。夫身任天下之禍。豈君子之得已哉。既當其任。知天下之禍將終不能免也。則身任之而已。身任之。而後可以免於天下之禍。小人不知禍之不可以倖免。而自詭以求脫。遂致釀成大禍而已。亦卒不能免。故任禍者。惟忠誠憂國之君子能之。而小人不能也。某受知門下。不能効一得之愚。以爲報。獻其芹曝。伏惟鑒其忱悃。而憫其所不逮。幸甚。

三（丁亥）

某素辱愛下。然久不敢奉狀者。非敢自外於門牆。實以地位懸絕。不欲以寒暄無益之談。塵瀆左右。蓋避嫌之事。賢者不爲。然自嘆其非賢也。非才多病。待罪閑散。猶懼不堪。乃今復蒙顯擢。此固明公不遺下體之盛。某亦寧不知感激。但量能度分。自計已審。貪冒苟得。異時愆事。將爲明公知人之累。此所以聞命驚惶。而不敢當耳。謹具奏辭。免祈以原職致仕。伏惟明公因材而篤。於所不能。特賜曲成。俾得歸延病喘於林下。則未死餘年。皆明公之賜。其爲感激。寧有窮已乎。懇切至情。不覺瀆冒。伏冀宥恕。不具。

四（丁亥）

竊惟大臣報國之忠。莫大於進賢去讒。故前者兩奉起居。皆嘗僭及此意。亦其自信山林之志已堅。而又素受知